

## DA CA' BELÚN BENNE' GUBÁZ CHEE CRISTO

### *Dios nachebe lazre' sel-le' Be' Lá'azxa*

<sup>1</sup> Lue', Teófilo, bzuaja' chiu' lu xiche nedxu ca naca xúgute da guzú lau Jesús dxune', ne dxusédenē' nédxudaute, <sup>2</sup> cadxa begüéne' xabáa. Gate za xezé'e xexíaje' xabáa guqué'e gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'. <sup>3</sup> Ca gudé gutie', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca banē', ne bchálajlene' benne' ca' ca dxal-la' nna bea Dios.

<sup>4</sup> Gate ne zúale Jesús benne' gubáz ca', gunné xuene' le' quebe xesí'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunné chee, ca gunníqueza' neda'. <sup>5</sup> Da li Juan bchue' bēneache nisa, san lu zra caní gaca chee ca da zéaje xel-la' dxedxúa nisa, xida Be' Lá'azxa xeda-jsúe' lu xichaj lázrdaule.

### *Jesús dxegüéne' xabáa*

<sup>6</sup> Gate na' zaj nazrague' nen Jesús, na' buluchebe' Le':

—Xran, ¿güe Dios lataj nna béaqueze xezre Israel lu zra caní?

<sup>7</sup> Na' bechebe Jesús:

—Quebe naca chee nézele bátala, u bi zra gun Dios da ca' tuze Le' nape' xel-la' waca gunē'. <sup>8</sup> Gate

xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca nácaqueze xezr la xu nigá.

<sup>9</sup> Ca gude gunné' da nigá, ne dxácatē dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. <sup>10</sup> Ne zaj zra' benne' ca' dxelenné'e dxácatē dxegüén Jesús, belelá' chupa benne' zaj nácuē' ladxe' chiche lau benne' ca', <sup>11</sup> na' gulé'e benne' gubáz ca':

—Le'e, benne' Galilea, ¿bizr chee na' zele dxenna'le xabáa? Jesús nigáqueze begüéne' zexíaje' xabáa, bezé'e ládujla le'e, welé'e xetú cáqueze ble'ele Le' zexíaje'.

*Dxelequē'e Matías chee xedé'e waláz chee Judas*

<sup>12</sup> Nadxa besi'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxe' cátitēze da dxunna da nadxixruj bea na lataj xesi'aque' lu zra dxulupá'ane'. <sup>13</sup> Gate belexezrine' lu xezre na', belexegüéne' xu'u sibe naga zaj zuē'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bénnea' dxedábage' benne' Roma ca', ne Judas, zri'ine Jacobo. <sup>14</sup> Xúgutē benne' caní tu dxelezágazqueze' nen benne' biche Jesús, ne María xrna Jesús, ne xebal-la nu'ula ca', chee xuluchálajlene' Dios.

<sup>15</sup> Lu zra ca' Pedro guzé' laduj bi bíchedxu ca', zaj naque' ca tu gaxúa galaj bénneache, na' guzre' le':

<sup>16</sup> —Le'e, bi bícha'dau', beñ na ba xen guca li ca da gunná Be' Lá'azxa lu xiche chee Dios, da na'

gunná David waláz chee Dios ca naca da dxal-la' gaca chee Judas, bēneea' guché'e benne' ca' gulēl-le' Jesús. <sup>17</sup> Judas nigá guzúalēne' dxi'u tu zren, ne guque' dxi'u tuze lu zrin nigá. <sup>18</sup> Bxa'u tu cue' xezr la xu ca naca lazruj chee Judas, da guzí' lu ne'e chee da calela da bene'. Na' benne' nigá xeajcházie' suxíhajla, ne gutín le'e, na' bdx-uaj ca naca zrájlue'. <sup>19</sup> Xúgute benne' zaj zre'e Jerusalén belenne' da nigá, na' buluzúe' la xezr la xu na' Acéldama, da zéaje na: Xezr La Xu Chee Dxen. <sup>20</sup> Guca li ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lizre',

ne quebe nu chilá' sua na'.

Cá'anqueze dxenná na:

Xetú benne' té'e waláz chee'.

<sup>21</sup> 'Zaj zra' nigá benne' ca' gusá'acalēne' dxi'u ca naca dxácate guzúale Jesús dxi'u. <sup>22</sup> Guzú lau na gate bchua Juan Jesús nisa, cadxa bzrin zra begüēne' xabáa. Dxun na ba xen tu benne' caní gaque' dxi'u tuze chee xechēbe' ca guca gate bebán Jesús lu xel-la' gute.

<sup>23</sup> Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo. <sup>24</sup> Buluchálajlēne' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bēneache. Ble'e netu' nula benne' chupa caní ba nabéaju' Lue', <sup>25</sup> chee gaque' gubáz chiu', ne xedé'e waláz chee Judas, bēneea' bnitie' da naca chee' lawe' da bene' dul-la, na' bexíaje' lataj naga naca chee'.

<sup>26</sup> Nadxa gulebéaje' da gaca bea na, na' bexala Matías, na' gúcate' tuze benne' chinéaj gubáz ca'.

## 2

### *Ca guca gate bla' Be' Lá'azxa*

<sup>1</sup> Ca bzin zra Pentecostés, xúgute benne' ca' dxelájle'e chee Jesús zaj nazrague' tuze lataj. <sup>2</sup> Ca' guca, belenne' tu schaga da za' lu be' zran xabáa, ca dxun tu be' bdunu', na' belén na xúgute benne' zaj zře'e lu xu'u naga zaj dxe'e. <sup>3</sup> Nadxa belelé'ene' lu be' xi' ca', da dxelala, na' xeajlezúa na xíchaj tu tu benne' ca'. <sup>4</sup> Nadxa guzáletequeze Be' Lá'azxa xúgute benne' ca', na' tu tue' gulezú lawe' dxuluchálaje' dizra' nazrala cáteze dxuchine Be' Lá'azxa le'.

<sup>5</sup> Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúgute xezr la xu zaj dxe' lu xezr la xu nigá. <sup>6</sup> Ca belenne' bénneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxelájle'e chee Jesús. <sup>7</sup> Na' belexebánele'ene', ne belexruse', ne gulé ljwezre' tue' xetúe':

—Zaj naca benne' Galilea xúgute benne' caní dxuluchálaje'. <sup>8</sup> ¿Ájazra na' dxendxu dxuluchálaje' dizra' cha cheedxu dxi'u? <sup>9</sup> Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' chee xezre ca' zaj nababa Judea, ne benne' chee naga nababa Capadocia, ne benne' chee naga nababa Ponto,

ne benne' chee naga nababa Asia, <sup>10</sup> ne benne' chee naga nababa Frigia, ne benne' chee naga nababa Panfilia, ne benne' xezr la xu Egipto, ne benne' chee xezr la xu Africa da zua dédedxa chee xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxixruj bea chee benne' judío ca'. <sup>11</sup> Cá'anqueze nácadxu benne' xezr la xu Creta, ne benne' xezr la xu Arabia. Xúguteđxu dxendxu lu dizra' cha cheeđxu dxuluchalaj benne' caní ca naca da zren ca' da dxun Dios.

<sup>12</sup> Xúgute' belexebánene', ne quebe zaj nézene' bi da dxaca na', na' gulenaba ljwezre' tue' xetúe':

—¿Bizra zéaje da nigá?

<sup>13</sup> Benne' xula ca' belún le', gulenné':

—Dxelezuzre benne' caní.

### *Da bchalaj Pedro lau benne' ca'*

<sup>14</sup> Nadxa guxasa Pedro nen benne' chinéaj gubáz chee Cristo, na' zizraj bchálajlene' bènneache zaj zra' na'. Dxe'e le':

—Le'e, benne' Judea, ne xúgutele le'e nazrágale xezre Jerusalén. Dخال-la' nézele le'e da nigá. Le xen xanne' ca naca da xapa' le'e. <sup>15</sup> Netu' quebe dxezúzrentu' ca dxéquele le'e. Za gudete xrsila na'a. Netú benne' quebe dxezúzrene' ca ná'queze. <sup>16</sup> Da nigá naca da gunnáqueze Joel, bènnea' bchálaje' waláz chee Dios gate na' gunné':

<sup>17</sup> Caní dxenná Dios: “Lu zra bzebe wasél-laqueza' Be' Lá'azxa chia' chee súalene' xúgute bènneache. Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'.

Na' benne' gula ca' welennéquezenē' xēla.

<sup>18</sup> Ca lu zra na' guzuáqueza' Be' Lá'azxa chia' nen bi wen zrin chia' ca', benne' biu ne nu'ula ca', na' guchálajquezebe' waláz chia' neda'.

<sup>19</sup> Lu be' zran xabáa gulé'equezda' xel-la' waca chia', na' lu xēzr la xu dxe'ela gulé'eda' da xelunna bea na,

dxen, ne xi', ne zren da naca ca beuj gasaj.”

<sup>20</sup> Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra chee da xebánedxu

ne zra na' walé'equezdXu xel-la' szren chee Dios.

<sup>21</sup> Nadxa xeeléa xúgutē benne' ca'

xelenné' Xránadxu lu xel-la' dxeleajlí lazre' chee'.

<sup>22</sup> 'Chee le na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúajē' xrlátaje lau xúgutēle le'e ne chee da ben Dios laule le'e. Lu na' Jesús Dios blé'ene' da zan da dxebánedxu, ne xel-la' waca ca', ne da dxelunna bea na ca ba nézquezle le'e. <sup>23</sup> Gate Dios be'e lataj tu benne' bdee' Le' lu na'le le'e cáteze bache núnqueze' nedxu, nadxa le'e gudél-lale Le', na' bétele Le' gate na' bdele Le' lu na' benne' ca' dxelune' da calela, benne' ca' buludé'e Le' xaga béguaj naga gutiē'. <sup>24</sup> Nadxa Dios bsebanē' Le', bebéaje' Le' lu xel-la' gute. Quebe guxú'u ájala xegá'ane' chalásaze lu xel-la' gute na'. <sup>25</sup> Ca naca da nigá bchalaj wenná bea David ca naca chee Jesús na', gate gunné':

Belé'equezda' Xrana' lawa' nigá.

Le' zuē' cuita' xabēla, chee quebe bi guchebe na neda'.

26 Chee le na' gubéle'eda', ne bil-la' lu xel-la' dxebe chia'.

Chee le na' guxrén lázrequeza' Le' gate gatia',

27 lawe' da quebe xucá'anaquezu' neda' lu lataj chee benne' gate.

Quebe güéquezu' lataj guzru bel-la' dxen chia' neda',

naca' benne' wen zrin chiu', ne benne' nazrí'inu'.

28 Blé'equenezu' neda' ca dxal-la' guna' chee zrué'eda' xel-la' nabán,

na' gúnnale'u neda' xel-la' dxebe lawe' da zúalenu' neda'.

29 'Le'e, bi bícha'dau'. Naca bea na gute xra xrtáudxu David, na' bulucaché' le' lu xedxu ba chee' da zúaqueze na na'a nagá zúadxu. 30 David na' guque' tu benne' bchálaje' waláz chee Dios, ne gunézene' ca da nachebe lázrequeze Dios guné'. Gunné lie' tu benne' zri'ine zre sua David na' gaque' Cristo, Bénnea' nna béaqueze', xequé'e lawe' chee David. 31 Ca' guca, David nigá belé'equenez' nedxu ca naca da dxal-la' gaca chee Cristo, na' bchálaje' ca guca gate bebán Cristo, gunné': "Benne' nigá quebe xegá'anaqueze' lataj chee benne' gate, ne quebe gúzruqueze bel-la' dxen chee'." 32 Caní guca, Dios bsebane' Jesús nigá, na' netu' dxexeché'entu' da li ca guca da nigá. 33 Ca' guca, Dios bzue' Jesús lu xabáa chee' nen xel-la' waca chee', na' be'e Le' lataj gusel-le' Be' Lá'azxa chee' nigá ca nachebe lázrequeze' nedxu guné', na' xúgute da caní dxelé'ele le'e, ne dxenle zaj naca na da dxun Be' Lá'azxa na'. 34 David na' quebe begüéne' xabáa, san léqueze' guné':  
Xránadxu Dios guzre' Xrana':

“Gudxe'e cuita' xabela nigá

<sup>35</sup> ca zrindxa zra guzúa' benne' dxedábague' lue' chee nna be'enu le'.”

<sup>36</sup> 'Xúgutele le'e, benne' Israel, dxal-la' nézquezle da nigá: Jesús nigá, bénnea' bda'le le'e xaga béguaj, Dios ba nune' Le' Xránale ne Cristo chee, Benne' guselé' le'e.

<sup>37</sup> Gate benne' ca' belenne' da nigá, na' belexewí'ine lazre', na' buluchebe' Pedro, ne benne' gubáz ca' chee Jesús, dxelé'e le':

—Benne' bíchentú, ¿ájazra dxal-la' guntu' xca'?

<sup>38</sup> Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunite lau Le' chee le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa chee' chee súalene' le'e. <sup>39</sup> Da nigá nachebe lazre' Dios naca na chee le'e, ne chee zrí'inele, ne chee xúgute benne' zaj zre'e zitu', xúgute benne' ca' dxaca lazre' Dios nne'.

<sup>40</sup> Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da calela caní.

<sup>41</sup> Ca'an guca, benne' ca' guléajle'e chee da bchalaj Pedro belexedxúe' nisa, na' lu zra na' belaca tuze ca chi dxua gaxúa benne' nen benne' ca' ba dxeléajle'e chee Jesús. <sup>42</sup> Na' xúgute benne' ca' gulezúa típaqueze' ca da dxulusede benne' gubáz chee Jesús le', na' gulezúe' tuze nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca guca gate gute Cristo.



*Ca belún benne' nedxu ca', benne' guleajlí lazre' Cristo*

<sup>43</sup> Xúgute benne' ca' gulezrebe' gate belelé'ene' xel-la' waca zante, ne da dxelunna bea na da dxelún benne' gubáz chee Jesús. <sup>44</sup> Xúgute benne' ca' dxeléajle'e chee Jesús gulaque' tuze, ne bulunézruje' da de chee' tue' xetúe'. <sup>45</sup> Belutie' xúgute da zaj nape', ne bulunézruje' dumí na' chee benne' ca' ca da dxelexájrjene'. <sup>46</sup> Xugu' zra belexezrague' lu xudau', ne cá'anqueze lu lízre cha chee', chee xelawe' da dxusá lázredxu ca guca gate gute Cristo. Gulawe' tu zrente lu xel-la' dxelebé, ne dute xel-la' dxelexruj lazre' chee'. <sup>47</sup> Belúe lá'ane' Dios, na' xúgute bènneache guléquene' benne' ca' ba lá'ana. Tu zra tu zra Xránadxu bzane' benne' ca' chee Cristo ca dxelezí' lu ne'e tu tue' Cristo.

### 3

*Dxexaca tu benne' zrinnaj*

<sup>1</sup> Tu zra xjaque' Pedro ne Juan lu xudau' dxexedá' chunna, da naca na gate dxululáwizraj bènneache Dios lu xudau'. <sup>2</sup> Tu zra tu zra zua tu benne' na' naque' zrinnaj ca nálajte'. Dxeleché' benne' ljwezre' le' xudau' na', ne dxelebeche' le' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'. <sup>3</sup> Gate benne' zrinnaj nigá blé'ene' Pedro ne Juan, dxelu'e xudau', na' gunabe' guna' lau benne' caní. <sup>4</sup> Nadxa Pedro ne Juan gulenné'e le', na' Pedro guzre' benne' na':

—Gunná' netu'.

<sup>5</sup> Benne' na' gunná' xánnie' le' lawe' da dxéquene' bi xulunezruje' le'. <sup>6</sup> Pedro guzre' le':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

<sup>7</sup> Nadxa Pedro guqué'e na' benne' zrinnaj na' da zua xabela, ne bechise' le', na' ca bene' caní, belexezúa chacha ni'e, ne béchajdu chee' ca'. <sup>8</sup> Nadxa benne' zrinnaj na' guxrítie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexrítie', ne dxue lá'ane' Dios. <sup>9</sup> Xúgute benne' zaj zre'e na' belelé'ene' le' dxedé', ne dxue lá'ane' Dios. <sup>10</sup> Belexebánene', ne belezrebe' ca da belelé'ene' guca na, lawe' da zaj núnbe'e benne' zrinnaj na', ne zaj nézene' naque' bènea' dxebé'e dxenabe' guna' ga dxelexú'u bèneache xudau', da na' nazí le na Da Xrtante.

### *Da bchalaj Pedro la chila da nazí le na La Chila Chee Salomón*

<sup>11</sup> Benne' zrinnaj na', benne' ba bexaque', quebe bsane' na' Pedro ne Juan, na' xúgute benne' dxexebánene', ne xjaque' naga nazí le na La Chila Chee Salomón, naga zaj zra' Pedro ne Juan. <sup>12</sup> Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebéanele le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? <sup>13</sup> ¡Cabí! Dios chee xra xrtáudxu Abraham, ne Isaac, ne Jacob bca'ana szrene' Zrí'ine', Jesús, Bènea' bdele le'e lu na' benne' xu'u lawe'. Gate guca lazre' Pilato gusane' Le', le'e quebe guca lázrele. <sup>14</sup> Bzúale chalá'ala Benne' na' naque' lá'azxa ne xrlátaje, na' gunábale la tu benne' wen da zrinnaj. <sup>15</sup> Ca'an guca, bétele

le'e Bénnea' dxunne' bènneache xel-la' nabán, san Dios bsebane' Le' ládujla benne' gate, na' netu' dxexechébentu' chee da nigá. <sup>16</sup> Guca lu La Jesús nigáqueze, u nnadxu guca na lawe' da guxéajle chee La Jesús, chee bezí' le dipa benne' nigá dx-elé'ele, ne núnbeale le'. Lawe' da guxéajle'e chee Jesús, ba bexácatequeze' ca dxelé'ele le'e xúgutele.

<sup>17</sup> 'Le'e, Bi bicha', nezda' gate le'e, ne benne' xíchajē ca' cheele bétele Jesús, quebe guque be'ele ca da dxunle. <sup>18</sup> Dios bene' guca caní chee guca li ca da ba gunné' nédxute gate buluchalaj waláz chee' benne' ca', na' gulenné' dxal-la' si' saca Cristo chee Dios. <sup>19</sup> Chee le na', le xebí'i lázrele, ne le xexaca Dios tuze, chee xusule' dul-la nabágale. Nadxa Xránadxu Dios gunne' le'e lataj xexaca chawe' xichaj lázrdaule. <sup>20</sup> Sel-le' cheele Jesús, Bénnea' guchebe lazre' sel-le' cheele nédxudaute. <sup>21</sup> Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálajē waláz chee' nédxudaute. <sup>22</sup> Ca' naca na, lawe' da gunná Moisés, guzre' xra xrtáudxu ca': "Sel-la Xránadxu Dios cheele tu benne' guchálajē waláz chee'. Gaque' tu benne' ládujla bi bíchele ca', na' sel-le' le' cheele ca gusel-le' neda'. Le xen xanne' xúgute da xē'e le'e, <sup>23</sup> lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

<sup>24</sup> 'Xúgute benne' ca', benne' buluchálajē waláz chee Dios, guzú lau na gate zua Samuel, ne zeaj na, buluchálajē chee zra caní. <sup>25</sup> Le'e dxezile ca da gulenná benne' ca' buluchálajē waláz chee Dios,

ne nácale tuze lu xel-la' wezríá da ben Dios nen xra xrtáule ca', ca guzre' Abraham: "Lu na' benne' zri'ine zre su' gaca chawe' chee xúgute bénneache zaj zre'e lu xezr la xu." <sup>26</sup> Gate Dios bsebanē' Zrí'ine', gusel-le' Le' nedxu laule le'e chee gaca chawe' chee, chee gusanle tu tule le'e da calēla da dxunle.

## 4

*Pedro ne Juan dxelezrine' lau benne' xu'u lawe' ca'*

<sup>1</sup> Pedro ne Juan ne dxuluchálajlene' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'. <sup>2</sup> Dxeleze're' lawe' da dxulusede Pedro, ne Juan benne' ca', dxelenné' welexebán benne' gate lawe' da bebán Jesús. <sup>3</sup> Nadxa gulēl-le' Pedro ne Juan, na' guleché'e le' lizre xia ca zrindxa zra xula lawe' da ba dxezré' zra na'. <sup>4</sup> Guléajle' benne' zan ládujla benne' ca' belénne' da bchalaj Pedro, na' cátite benne' ca' dxeléajle'e chee Jesús zaj naque' ca gazxu' cue' chi gaxúa benne' biu.

<sup>5</sup> Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxuzájle'e da nadxixruj bea na, belezrague' lu xezre Jerusalén <sup>6</sup> nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'. <sup>7</sup> Nadxa gulenná be'e xeajlexrí'e Pedro ne Juan, na' buluzé' le' laduj naga zaj zre'e, na' buluchebe' le':

—¿Bi xel-la' dxenná bea, u nu lu La dxunle da caní?

<sup>8</sup> Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca', <sup>9</sup> le'e dxuchébele netu' chee tu da chawe' da guca chee tu benne' we', chee nézele ájala guca bexaca bénnea'. <sup>10</sup> Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bénnea' bda'le le'e le'e xaga béguaj, na' Dios bsebané' Le' ládujla benne' gate. <sup>11</sup> Jesús nigá naque' xiaj na', le'e, benne' wen xu'u bzúale chalá'ala, san na'a Léqueze' naque' xiaj blau chee xu'u. <sup>12</sup> Quebe nu chilá' bénneache seque' guselé' dxi'u lawe' da quebe ne gunna Dios xetú La bénneache lu xezr la xu nigá, benne' séquene' guselé' dxi'u.

<sup>13</sup> Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaje ca', san guleque bé'ene' zaj naque' benne' guledálene' Jesús. <sup>14</sup> Cá'anqueze bénnea' bexaque' ze' na' nen Pedro ne Juan, na' chee le' na' quebe gulezéquene' bi xelenné' chee'. <sup>15</sup> Nadxa gullenná be'e belexedxúaj benne' gubáz ca' ládujla le'. Cate' belexegá'ana leze' buluchebe ljwezre', <sup>16</sup> dxelenné':

—¿Ájazra gundxu chee benne' caní? Xúgute benne' zaj zre'e Jerusalén zaj nézene' belune' xella' waca zren nigá, na' quebe gaca tábagadxu na. <sup>17</sup> Na'a, chee québedxa zriluj da nigá lávela bénneache, guxrúsadxu benne' caní chee québedxa

nu xuluchálajlene' lu La Jesús.

<sup>18</sup> Nadxa gulenná be'e belexezrín Pedro ne Juan, na' gulenná bé'ene' le' québedxa nu xuluchálajlene', ne quebe nu xulusédenē' lu La Jesús. <sup>19</sup> Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios. <sup>20</sup> Netu' quebe gaca gusantu' gucháljantu' ca naca da blé'entu', ne da bémentu'.

<sup>21</sup> Nadxa benne' xu'u lawe' ca' buluxruse' Pedro ne Juan, san bulusane' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute' bēnneache Dios ca naca da ba guca. <sup>22</sup> Bēnnea' bexaque' ne chee xel-la' waca zren nigá ba gudéē' chua iza.

*Benne' ca' dxeléajle'e chee Jesús dxelenabe' lau Dios gunézruje' le' xel-la' dxuluxrén lazre'*

<sup>23</sup> Gate bulusane' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute' da gulenná benne' xíchaje ca' chee bxruze ca', ne benne' gula sina ca'.

<sup>24</sup> Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute' da zaj nnita lataj ca'. <sup>25</sup> Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee na' dxelasa bēnneache xezr la xu ca', na' bēnneache dxelegú'u lazre' da quebe bi zaj zaca?

<sup>26</sup> Benne' wenná bea ca' chee xezr la xu gulune' tuz, na' benne' blau ca' chee xezr ca' belezrague'

chee xeledábage'e Xránadxu Dios, ne Cristo chee'.

<sup>27</sup> 'Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábage' Zri'inu' Lá'azxa, Jesús, Bénnea' bzúaquezu' Lue'. <sup>28</sup> Ca'an guca, benne' ca' belune' xúgute' ca da ba núnquezu' Lue' dxalla' gaca na. <sup>29</sup> Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrébentu', <sup>30</sup> ne benna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¡Ca'an gaca!

<sup>31</sup> Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale Be' Lá'azxa le', na' buluchálaje' xrtizra' Dios dute' xel-la' dxuluxrén lazre' chee'.

*Xúgute' dxelune' tuze ca naca da zaj nape'*

<sup>32</sup> Benne' zan ca', benne' dxeléajle'e chee Jesús gulaque' tuze lu xichaj lázrdawe'. Netúe' quebe gunné' cheeze' naca da nape'. Xúgute' da zaj nape' zaj nune' tuze. <sup>33</sup> Benne' gubáz ca' chee Jesús, nen dute' xel-la' dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute' benne' ca'. <sup>34</sup> Quebe nu guzúa ládujla benne' ca' bi bxázejene' lawe' da caní belún xúgute' benne' zaj nape' xezr la xu ca' u xu'u ca'. Belutié' na, na' belú'e dumí na', <sup>35</sup> ne xeajlenézruje' na lu na' benne' gubáz ca', chee xelexele'e na tu tu benne' ca' ca da dxelechínene'. <sup>36</sup> Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau'

le na. Benne' nigá, buluzúa gubáz ca' le' Bernabé, da zéaję na benne' dxexúe zrene'. <sup>37</sup> Benne' nigá betie' tu xęzr la xu da nape', na' bi'e dumí na', ne bnézruje' na lu na' benne' gubáz ca'.

## 5

### *Dul-la da belún Ananías ne Safira*

<sup>1</sup> Xetú benne' le' Ananías nen zru'ule' Safira, betie' tu xęzr la xu cheę'. <sup>2</sup> Benne' nigá bequé'e late' dumí na', na' da begá'anaze bi'e lau benne' gubáz ca', ne gunné' ca naca na'. Zru'ule' ca naca na nézene'. <sup>3</sup> Nadxa guzre Pedro le':

—Ananías, ¿bizr cheę na' be'u lataj Satanás guxú'u na lu xichaj lázrda'u cheę si xe'u Be' Lá'azxa, na' beca'u late' chiu' ca naca da guzi'u cheę xęzr la xu na'? <sup>4</sup> ¿Quebe guca xęzr la xu na' chiu'? Na' gate betiu' na, ¿quebe guca dumí na' chiu'? ¿Ájazra guca bęnu' da nigá? Díos guzı́ xe'u, quegá bęneache.

<sup>5</sup> Ca ben Ananías da nigá, na' guzré'e gútete'. Xúgutę benne' belén da nigá belezrébele'e. <sup>6</sup> Nadxa gulebiga bal-la bi cuide' ca', ne buluchélabe' le' tu ladxe', na' belúabe' le' cheajlecáchebe' le' lu ba.

<sup>7</sup> Ca guca chunna hora gudé na', guxú'u zru'ula Ananías na', ne quebe nézene' bi ba guca. <sup>8</sup> Pedro bchebe' le':

—Gunná, ¿bétéle le'e xęzr la xu na' ca dxennale guzile na?

Gunná Safira na':

—Awe', ca naca na'.

<sup>9</sup> Nadxa Pedro guzre' le':



—¿Bizr chee na' benle le'e tuze dizra' gúquele si xele Be' Lá'azxa? Chale'aj na' ba zesí'aca bi ca' xea-jlecáchebe' benne' chiu', na' na'a xelúatequezebe' lue'.

<sup>10</sup> La' ná'queze nu'ula na' guzré'e gútete' zran ni'a Pedro. Gate belú'u benne' cuide' ca', na' belelé'ebe' le' ba gutie', na' belexebéajbe' le' xea-jlecáchebe' le' cuita ba chee benne' chee'. <sup>11</sup> Xúgute benne' ca' zaj nazrague' na', ne xúgute bénneache, benne' belén da caní belezrébele'e.

*Benne' gubáz ca' dxelúnle'e xel-la' waca chee xabáa*

<sup>12</sup> Benne' gubáz ca' belúnle'e xel-la' waca chee xabáa, ne da dxelunna bea na lau benne' ca', na' xúgute' belezrague' La Chila Chee Salomón, da naca na chee xudau'. <sup>13</sup> Netú benne' ca', benne' quebe dxeléajle'e chee Jesús, quebe belexázrene' gune' benne' ca' tuze, san xúgute bénneache belape' benne' caní ba lá'ana. <sup>14</sup> Benne' zandxa gulezú lawe' dxeléajle'e chee Xránadxu, benne' biu ne nu'ula ca'. <sup>15</sup> Ca' guca na, belebéaje' benne' we' ca', zaj de' lu da dxeláta'ne', ne da'a chee', na' gulíxrue' le' la neza ca' chee gate te Pedro na', na' te zrula chee' lawe' benne' ca'. <sup>16</sup> Cá'anqueze benne' xezre walizre ca' belelé'e lu xezre Jerusalén, zaj nu'e benne' we' chee' ca', ne benne' ca' zaj xu'e be' xriwe' ca', na' xúgute' belexexaque'.

*Benne' gubáz ca' dxelu'e lizre xia*

<sup>17</sup> Nadxa bxruze blau, ne benne' saduceo ca' zaj zúalene' le', gulaque' xa lazre', <sup>18</sup> na' gulel-le' benne' gubáz ca', ne buluzré'e le' lizre xia. <sup>19</sup> Na' tu gubáz chee xabáa chee Xránadxu gusalaje' dxa xu'u

chee lizre xia na' chizrela, na' bebéaje' benne' ca', ne dxē'e le':

<sup>20</sup> —Le chjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

<sup>21</sup> Ca belenne' da nigá, zra xula belú'e chila xudau' che zílala, na' gulezú lawe' dxulusédenē' benne' zaj zre'e na'.

Dxácatē na', bxruze blau na', ne benne' zrálenē' le', buluchague' benne' ca' chee xu'u lawe' blau, ne benne' gula sina ca' chee xezre Israel, na' gulenná be'e xelexebéaje' gubáz ca' zaj xu'e lizre xia. <sup>22</sup> Gate belezrín bi xra'aga chee xudau' na', quebe nu beelé'ene' lu xu'u lizre xia, na' belexezrine', ne buluzenne' benne' ca', <sup>23</sup> dxelennē':

—Gate bzrintu' lizre xia na', naxezxuj tipa na, na' benne' dxjaque' wedil-la zaj zre'e dxu'a dxa xu'u na', ne dxuluxúe' na, san gate gusálajntu' na, quebe nu bezrélentu' lu xu'u na'.

<sup>24</sup> Gate bxruze blau, ne benne' xíchaje ca' chee bxruze ca', ne xíchaje chee bi xra'aga ca', belenne' da nigá, na' buluchēbe ljwezre' ga cheajsé da nigá.

<sup>25</sup> La' ná'queze bzrin tu benne' guzre' le':

—Benne' ca' bzra'le le'e lizre xia zaj zre'e lu chila xudau', dxulusédenē' bēnneache.

<sup>26</sup> Nadxa benne' xíchaje chee bi xra'aga chee xudau' guxíajlenē' bi xra'aga ca', na' xea'jlexrí'e gubáz ca'. Quebe bi belúnene' le' lawe' da belezrebe' bi xelún benne' ca' dxelennē' chee gubáz ca', lawe' da dxeléquene' xelu'e le' xiaj. <sup>27</sup> Gate xea'jlexrí'e gubáz ca', na' buluzré'e le' lau benne' xu'u lawe' blau, na' gunná bxruze blau na', dxē'e benne' gubáz ca':

28 —Netu' bZRúnantu' le'e quebe guchálajledxale bēneache lu la bēneā'. ¿Bizra na' bēnle? Ba bzenle ca naca benne' zaj zre'e zezre Jerusalén ca naca da dxusédele, ne dxaca lázrele gusebágale netu' xel-la' gute chee benne' na'.

29 Nadxa belexechebe Pedro, ne xezícadxa benne' gubáz ca':

—Dxala' guzúantu' xrtizra' Dios, quegá xrtizra' bēneache. <sup>30</sup> Dios chee xra xrtáudxu ca' bsebanē' Jesús, Bēneā' bētele le'e bda'ale Le' xaga béguaj. <sup>31</sup> Dios bca'ana szrene' Le' chalá'a xabela chee', ne bene' Le' Benne' Blau, ne Weselá, chee gata' lataj chee benne' Israel xelexebí'i lazre' chee gunite lau Dios dul-la chee'. <sup>32</sup> Chee le na' netu' dxexechēbentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúe' dizra' chee'.

<sup>33</sup> Gate belenne' da nigá, na' belezré'e, ne gulaca lazre' xelútiē' gubáz ca'. <sup>34</sup> Ládujla benne' xu'u lawe' ca' zua tu benne' fariseo le' Gamaliel. Naque' benne' dxuxuzájle'e da nadxixruj bea na, na' dx-elápale'e bēneache le' ba lá'ana. Benne' nigá guzé', na' gunná bé'ene' xelexebéaje' gubáz ca' chalé'ajla tu chí'idau'. <sup>35</sup> Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. <sup>36</sup> Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácale ca tapa gaxúa benne' biu le'. Na' belutiē' le', na' xúgute benne' ca' gulaca le' tuze belexase dinnaje' ca', na' gudé chee da na'. <sup>37</sup> Gudé na', lu zra gate belú'u bēneache xiche, na' bla' Judas, benne' Galilea, na' benne' zan xjácalēne' le'. Cá'anqueze belutiē'

bénnea', na' xúgute benne' gulede'e le' belexase dínnaje'. <sup>38</sup> Chee le na', le gusán benne' caní, ne quebe guchixre chee nen benne' ca'. Che da nigá naca na da dxun beneácheze, wadé chee na. <sup>39</sup> Che naca na da dxun Dios, quebe séquele le'e guzría xile na. Le guxúe xanne' chee quebe tíl-lalele Dios.

<sup>40</sup> Xúgute' belexaque' tuze. Nadxa gulenná be'e belú'u gubáz ca' da xula, na' ca belú'u benne' ca', na' buluzrone' le' québedxa nu xuluchálajle benne' ca' lu La Jesús. Gudé na' bulusane' le'. <sup>41</sup> Na' benne' gubáz ca' belexedxúaje' naga zaj zra' benne' xu'u lawe' ca', dxelebélé'ene' lawe' da be' Dios lataj guledé'e xel-la' zi' lawe' da zaj naque' Jesús tuze. <sup>42</sup> Quebe bulusane' dxuluchálaje', ne dxulusédene' bénneache ca naca chee Jesucristo xúgute' zra, lu chila xudau', ne lu xu'u ca'.

## 6

### *Dxuluzúe' gazre benne' xelune' zrin chee benne' zaj de'e Cristo*

<sup>1</sup> Lu zra ca', gate zaj dxan benne' ca' zaj de'e Jesús, na' benne' ca' dxeleonné' dizra' griego gulate' zria benne' ca' dxeleonné' dizra' hebreo. Dxeleonné' quebe nu dxunezruj xanne' da xeláw nu'ula ba gulate benne' chee' zaj zre'e ládujla le' gate dxelisié' xel-la' wagu tu zra tu zra. <sup>2</sup> Nadxa benne' gubáz ca' buluchague' ca naca benne' ca' dxelájle'e chee Jesús, na' gulé'e le':

—Quebe naca xrlátaje gusantu' guchálajntu' xrtizra' Dios chee gudentu' xel-la' wagu. <sup>3</sup> Chee le na', biche ljwézrentu', le quilaj gazre benne' lálwela le'e, benne' zaj naque' du lazre', ne dxelájni'ine',

ne zúale Be' Lá'azxa le', na' le gusebague' zrin nigá.  
 4 Netu' tu guchálajlezquezentu' Dios, ne gusédentu' bèneache xrtizra' Dios.

5 Xúgute' gulaza lazre', na' gulequé'e Esteban, tu benne' dxéajle'e dutē lázrdawe' chee Jesús, ne zúale Be' Lá'azxa le'. Cá'anqueze gulequé'e Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquía, benne' nédxute bexaque' tuze benne' judío ca'. 6 Na' guleché'e benne' caní lau benne' gubáz ca', na' le' bululáwizre' Dios, ne buluzé ne'e lawe' benne' gazre caní.

7 Xrtizra' Dios zeaj dxezriluj na, na' benne' ca' dxeléajle chee Jesús guxánle'e lu xezre Jerusalén, na' bxruze zan chee judío ca' guléajle'e chee'.

### *Dxelel-le' Esteban*

8 Esteban, tu benne' nápalē'e xel-la' waca, ne naque' chawe' lau Dios, bene' xel-la' waca ca' chee xabáa, ne da dxelunna bea na chee da ca' lau bèneache ca'. 9 Nadxa bal-la benne' chee xu'u naga dxelezraga bèneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee ga nababa Cilicia, ne Asia, gulezú lawe' dxulutíl-lalēne' Esteban dizra'. 10 Quebe gulezéquene' bi xelenné' chee xrtizra' Esteban lawe' da bchálaje' nen dutē xel-la' sina chee Be' Lá'azxa. 11 Nadxa gulízruje' bal-la benne' ca' chee xelenné' belenne' gunné Esteban dizra' schanni' chee Moisés, ne chee Dios. 12 Caní belune', ne gulu'e xel-le' bèneache ca', ne benne' gula sina ca', ne benne' dxuluxuzájle'e da nadxixruj bea na, na' gulebía di'e Esteban. Gulel-le' le', ne guleché'e le'

lau benne' xu'u lawe' blau. <sup>13</sup> Cá'anqueze gulílaĵe' benne' wĕn lazre' xelenné' cheĕ Esteban, na' gu-lenné':

—Benne' nigá quebe dxusane' dxenné' schanni' cheĕ xudau' lá'azxa nigá, ne cheĕ da bdxixruĵ bea Dios. <sup>14</sup> Ba bentu' gunné' ca gun Jesús, benne' Nazaret, dxenné' guzría xi'e xudau' nigá, ne guché'e ca naca da zéajlĕdxu da bca'ana Moisés.

<sup>15</sup> Nadxa benne' xu'u lawe' ca', ne xúgute benne' zaj zre'e na', gate gulenné'e Esteban, belelé'enge' lawe', naca na ca lau tu gubáz cheĕ xabáa.

## 7

### *Dxexechebe Esteban lau benne' xu'u lawe' ca'*

<sup>1</sup> Nadxa bxruze blau bchebe' Esteban:

—¿Zaj naca da li da caní'?

<sup>2</sup> Na' Esteban bechebe':

—Le'e, benne' gulá, ne le'e biche ljwezra', le xene. Xradxu zue' xabáa ble'e lawe' lau xra xrtáudxu Abraham gate ne zue' lu xezr la xu Mesopotamia, nédxudxa gate quebe ne xezé'e cheajzezúe xezre Harán. <sup>3</sup> Dios guzre' le': "Bsan lázriu' ne xúgute xrtia ljwezru', na' guxíaj lu xezr la xu da gulé'eda' lue'." <sup>4</sup> Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a. <sup>5</sup> Dios quebe bí bnézruĵe' cheĕ Abraham naga sue' lu xezr la xu nigá, ne naga gune' lizre', san guchebe lazre' gunézruĵe' le' xezr la xu nigá, na' gate te gate le', na' gaca na cheĕ zrí'ine', lácala lu zra na' quebe ne galaj nu zri'ine Abraham. <sup>6</sup> Cá'anqueze Dios guzre' le' xelezúa zri'ine zre sue' ca benne' zitu'

tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza. <sup>7</sup> Cá'anqueze guzre Dios le': "Neda' chuga' ca gaca chee xezr la xu na' guchine na zri'ine zre su', na' te na' xelexedxúaje' ga na', ne xelúe lá'ane' neda' lu xezr la xu nigá." <sup>8</sup> Dios bene' tu xel-la' wezría nen Abraham, na' gunná bé'ene' le' chugu látedu weaj belá' chee benne' biu ca' lu bel-la' dxen chee', tu da guzúa chuchu na xel-la' wezría na'. Chee le' na' gate gulaj Isaac, zri'ine Abraham, guchugue' látedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

<sup>9</sup> 'Zri'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutię-be' chee chu'ube' lu na' benne' guchínene'-be' lu xezr la xu Egipto. Dios guzúalene' José, <sup>10</sup> na' bselé'-be' lu xúgutę da zi' da xa'. Bnézruje'-be' xel-la' dxéajni'i, na' ben Dios bezaca ba lázrele Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne' xu'u lu ne'e xezr la xu Egipto na', ne benne' walizre Faraón na'.

<sup>11</sup> 'Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezrélene' da xelawe'. <sup>12</sup> Gate ben Jacob de' zrua' xtila lu xezr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. <sup>13</sup> Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea chee Egipto ga benne' José na'.

14 Nadxa José gunná bé'ene' xeajlexrí'e xre', ne ca naca xrtia ljwezre', zaj naque' ga xun chínué'.

15 Ca'an guca, Jacob xeajsúe' Egipto naga gutie', ne naga gulátequeze xra xrtáudxu ca'. 16 Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guzí' Abraham nen dumí da gudízruje' bi ca' zri'ine Hamor lu xezre Siquem na'.

17 Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto gulánle'e. 18 Nadxa guzú lau dxenná bea tu wenná bea lu xezr la xu Egipto, benne' quebe núnbe'e José. 19 Wenná bea nigá guzí xe'e benne' ljwézredxu, ne bzálaje' xra xrtáudxu ca', na' gunná bé'ene' le' cheajleca'ane'-be' bidu dxe'ene chee' ca' chee xelátebe'. 20 Lu zra ca' gulaj Moisés, ne gúcabe' tu bidau' bezaca ba lazre' Dios chee'be', na' xra xrnabe' bulusegule'-be' lizre' chunna beu'. 21 Gate bzrin zra zxalla' cheajlega'ane'-be', na' bi nu'ula chee wenná bea na' bequé'e-be', ne bsegule'-be' ca' zri'inequeze'. 22 Chee le' na', Moisés guzédebe' ca' naca xel-la' sina chee Egipto, na' gúcabe' tu benne' nape' xel-la' dxenná bea ca' naca da gunné', ne da bene'.

23 Gate bzrie' chua iza, Moisés guca lazre' cheajnné'e benne' ljwezre', benne' Israel ca'. 24 Blé'ene' tu benne' Egipto dxu'e tu benne' Israel. Chee gúcalene' benne' na', ne chee bebéaj lazre' bénnea', betie' benne' Egipto na'. 25 Moisés gúquene' benne' lazrie', benne' Israel ca', xeleque bé'ene' Dios guselé' benne' ca' ne chee le'. Benne' ca' quebe guleque bé'ene' na. 26 Zra xula Moisés blé'ene' chupa benne' Israel dxeledil-le', na' lawe' da



guca lazre' xelezrá zrie' benne' ca', na' guzre' le':  
 “Le'e nácale biche ljwézrele. ¿Bizr chee' na' dxu'e benne'  
 ljwézrele?” 27 Nadxa benne' na' dxu'e benne'  
 ljwezre' bzigue' Moisés, na' guzre' le': “¿Nu bzua  
 lue' ca benne' xíchaje cheentu' chee' guchi'u ca da  
 dxuntu'? 28 ¿Dxaca lazru' gutiu' neda' ca benu'  
 neaje, betiu' benne' Egipto na'?” 29 Ca ben Moisés  
 da nigá, na' bzrúnnaje' zexíaje' lu xezr la xu chee'  
 benne' Madián ca'. Na' guzúe' ca tu benne' zitu',  
 na' bchaga ná'lene' nu'ula, na' gulaj chupa zrí'ine'.

30 'Ca gudé chua iza, gate zue' le'e xixre' lawe'  
 lataj da zua na' gagu lu xi'a Sinaí, na' ble'e lau tu  
 gubáz chee' xabáa le' tu lu xi' da dxu' lu xeche'  
 bisigá. 31 Moisés bzrebe' ca naca da blé'ene',  
 san gate gubigue' chee' le'e xánnene', benne' chí'i  
 Xránadxu, dxenné': 32 “Neda' naca' Dios chee' xra  
 xrtá'u ca', Dios chee' Abraham, ne Dios chee' Isaac,  
 ne Dios chee' Jacob.” Nadxa Moisés guzú lau  
 dxezrízie' lu xel-la' dxezrebe, na' quebe bexázejene'  
 nne'e. 33 Xránadxu guzre' le': “Guleaj zrelu' xu'u  
 ni'u lawe' da naca lá'azxa lataj naga dxeléaju'.  
 34 Neda' ba ble'eda' ca naca da dxelezaca zi'  
 bénneache chia' zaj zre'e lu xezr la xu Egipto.  
 Dxenda' ca dxelebezre xache', ne ba bla'a chee'  
 guselá' benne' ca'. Gudá lue', sel-la' lue' lu xezr la  
 xu Egipto.”

35 'Lácala benne' ca' buluzúe' Moisés chalá'ala,  
 gulé'e le': “¿Nu bzua lue' ca benne' xíchaje cheentu'  
 chee' guchi'u ca da dxuntu'?” Dios gusel-le' le' ca  
 benne' xíchaje, ne benne' guselá le', ne chee' gubáz  
 chee' xabáa na' ble'e lawe' le' lu xeche' bisigá.  
 36 Moisés na' bebéaje' xra xrtáudxu ca' lu xezr la xu  
 Egipto, ne bene' xel-la' waca ca', ne da gulunna bea

na da bene' lu xezr la xu na', ne lu nísadau' Xrna, ne le'e xixre' lawe' lataj da chua iza na'. <sup>37</sup> Moisés nigáqueze guzre' benne' Israel ca': "Dios sel-le' tu benne' guchálaje' waláz chee', benne' gálaje' ládujla xrtia ljwézrele le'e, ca gusel-le' neda'. Chee Le' le xen." <sup>38</sup> Cá'anqueze Moisés nigá, bénnea' guzúale benne' ca' le'e xixre' lawe' lataj, tu zren nen gubáz chee xabáa na' bchálajle le' lu xi'a Sinaí, guzúalene' xra xrtáudxu ca', ne guzi'e dizra' chee xel-la' nabán chee bdee' na cheentu'.

<sup>39</sup> Xra xrtáudxu ca' quebe gulaca lazre' xuluzúa dizra' chee Moisés, san buluzúe' le' chalá'ala, ne gulaca lazre' xelexezrine' Egipto. <sup>40</sup> Gate cabí zue' Moisés ga na' gul'é Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bénnea' bebéaje' netu' lu xezr la xu Egipto." <sup>41</sup> Nadxa belune' tu bedáu' guca na ca tu bézredau', ne belutie' be xixre'du ca' lau bedáu' na', ne gulebene' chee da zaj nune'. <sup>42</sup> Nadxa Dios becuase' nen benne' ca', na' be'e le' lataj belúe lá'ane' belaj zaj zria zran xabáa. Ca'an naxúaj na lu xiche chee benne' ca' buluchálaje' waláz chee Dios. Dxelenné':

Le'e, benne' Israel ca', ¿guzríale-ba' chia' neda' be xixre'du ca' bétele  
dute chua iza gate na' guzúale le'e xixre' lawe' lataj?

<sup>43</sup> ¡Cabí! Bíale xudau' xide zra be xixre' chee dios chee, Moloc,  
ne xudau' chee belaj nazí le na Renfán, dios chee, bedáu' ca' bénquezle le'e chee be lá'anale na.  
Chee le na' cuéaja' le'e lu xezr la xu chee,  
ne sel-la' le'e dédedxa ca naga dxe' Babilonia.

44 'Le'e xixre' lawe' lataj na' xra xrtáudxu ca' belunē' tu xudau' xide naga buluzrá chawē' blaga' xiaj naga naxúaj da nadxixruj bea na. Belunē' na ca naca da ble'e Dios Moisés, gate guzre' le' gunē' na ca naca da na' ba blé'ene'. 45 Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee belequē'e xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézruje' xezr la xu nigá chee xra xrtáudxu ca'. Ca'an guca ca bzrinte zra ca' zua David. 46 Wenná bea David na', Dios bezaca ba lazre' chee', na' guca lazre' David gunē' tu xudau' naga sua Dios chee Jacob. 47 Salomón, zri'ine David, bene' lizre Dios na'. 48 Dios szrente quebe zuē' lu xudau' ca' da zaj nun bēnneache. Caní gunná tu benne' bchálaje' waláz chee Dios, gunné':

49 Xabáa naca lataj naga dxe'a,  
na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná  
Xránadxu.

¿Ájazra naca lataj naga dxal-la' xezí' lazra'?

50 ¿Quegá neda' bēnqueza' da ca'?

51 Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. 52 Xra xrtáule ca' buluzría xi'e xúgute benne' ca' bu-luchálaje' waláz chee Dios. Belutie' benne' ca' bu-luchálaje' nédxudaute ca dxal-la' gaca chee benne' xrlátaje nigá, na' gate ble'e, lé'equenzele bdele Le' lu

na' benne' ca' guledábague' Le', ne bétele Le'. <sup>53</sup> Le'e guzile da nadxixruj bea na da benna gubáz chee xabáa dxi'u, san quebe dxuzúale dizra' chee na.

### *Dxelutię' Esteban*

<sup>54</sup> Gate belén benne' ca' da caní, na' gulagu lazxe' lu xel-la' dxelezá'a Esteban. <sup>55</sup> Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren chee Dios, na' Jesús ze' chalá'a xabęla chee Dios. <sup>56</sup> Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bénneache ze' chalá'a xabęla chee Dios.

<sup>57</sup> Benne' ca' bulusézxuje' nague', na' gulebezre xe'e, ne xeajlechía che'e Esteban na'. <sup>58</sup> Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lanę' lu na' tu benne' cuide' le' Saulo. <sup>59</sup> Dxácatę dx-uluzríe' le' xiaj, Esteban na' bláwizre' Dios, gunné':

—Xrana' Jesús, bezí' lu na' u be' nácaqueza'.

<sup>60</sup> Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutię'.

## 8

### *Saulo dxenáu zi' xuzre' benne' ca' dxeléajle'e chee Jesús*

<sup>1</sup> Saulo guque' tuze nen benne' ca' belutię' Esteban.

Lu zra ná'queze gulezú lawę' dxelau zi' xuzre' benne' ca' dxeléajle'e chee Jesús, benne' ca' zaj zre'e xezre Jerusalén. Xúgute' belexase dinnaje' ca

naca xezre ca' zaj nababa Judea, ne xezre ca' zaj nababa Samaria. Benne' gubáz ca' belexegá'ane' xezre Jerusalén na'. <sup>2</sup> Bal-la benne' ca' zaj naque' chee Dios bulucache' Esteban na', ne gulebézrele'e chee'. <sup>3</sup> Dxácatę na' Saulo dxenáu zi' xuzre' benne' ca' dxeléajle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

*Dxuluchálaje' dizra' chawe' chee Jesús naga nababa Samaria*

<sup>4</sup> Benne' ca' chee Cristo, benne' buluzrúnnuje' Jerusalén, buluchálaje' dizra' chawe' chee Jesús gáteteze na' zjaque'. <sup>5</sup> Felipe, tuę' benne' ca', guxíaje' tu xezre naga nababa Samaria, na' guzú lawe' dxuchálajlene' benne' ca' ca naca chee Cristo. <sup>6</sup> Benne' ca' zaj nazrague' belén xánnene' ca da dxuchalaj Felipe, ne belelé'equezne' ca naca xel-la' waca ca' da dxune'. <sup>7</sup> Benne' zan, benne' zaj xu'e be' xriwe' belexexaque', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'e, ne benne' zrinnaj ca' belexexaque'. <sup>8</sup> Ca'an guca, gulebéle'e xúgute benne' ca' lu xezre na'.

<sup>9</sup> Zua na' tu benne' le' Simón, nédxute guque' benne' wazrá', ne guzı xę'e benne' Samaria ca', dxenné' naque' tu benne' szren. <sup>10</sup> Xúgute' belén xánnene' chee', benne' cazraze ca', ne benne' blau ca', gulenné':

—Benne' nigá nape' xel-la' szren chee Dios.

<sup>11</sup> Gulape' le' ba lá'ana lawe' da lu xel-la' wazrá' chee' na' guzı xę'e benne' ca' zane' iza. <sup>12</sup> Gate guléajle'e chee dizra' chawe' da dxuchalaj Felipe

ca dxenná bea Dios, ne ca naca chee La Jesucristo, xúgute', benne' biu, ne nu'ula ca', beledxúe' nisa. <sup>13</sup> Cá'anqueze Simón na' guxéajle'e chee Jesús, ne gudxúe' nisa, na' guzú lawe' zéajlene' Felipe, na' dxexebánene' ca naca xel-la' waca da za xabáa da dxun Felipe.

<sup>14</sup> Gate benne' gubáz ca' chee Jesús, benne' zaj zre'e Jerusalén, belenne' gulezí' lu na' benne' Samaria ca' xrtizra' Dios, na' gulesel-le' Pedro ne Juan na'. <sup>15</sup> Gate belezrine' na', na' belenabe' law Dios chee benne' Samaria ca' dxeléajle'e chee Jesús chee xelezí'e Be' Lá'azxa. <sup>16</sup> Quebe ne xida Be' Lá'azxa súalene' netú benne' ca'. Tuze beledxúaze' nisa lu La Xránadxu Jesús. <sup>17</sup> Nadxa Pedro ne Juan buluzé ne'e lawe' benne' ca', na' gulezí'e Be' Lá'azxa.

<sup>18</sup> Gate ble'e Simón bla' Be' Lá'azxa gate gubáz ca' buluzé ne'e benne' ca', na' guca lazre' gunézruje' gubáz ca' dumí, <sup>19</sup> gunné':

—Le gunna neda' xel-la' waca nigá chee gate guzéa' na'a lawe' núteteze benne', na' si'e Be' Lá'azxa.

<sup>20</sup> Nadxa guzre Pedro le':

—Wabía xi' dumí chiu' na' nen lue' lawe' da dxéquenu' wazéquenu' ga'u nen dumí ca da dxúnnaze Dios. <sup>21</sup> Quebe naca chiu', ne quebe napu' lataj lu da nigá lawe' da quebe naca xrlátaje xichaj lázrda'u lau Dios. <sup>22</sup> Bsan ca naca da calela chiu' nigá, ne guta' xue Dios chee gunite lawe' chiu' ca da gúquenu' lu xichaj lázrda'u. <sup>23</sup> Dxeque be'eda' nazrate xichaj lázrda'u da calela, na' da calela na' nuchéaj na lue'.

<sup>24</sup> Na' bechebe Simón:

—Le gata' xue Xránadxu chia' neda', chee quebe gaca chia' ca da gunnú'.

<sup>25</sup> Ca gudé belexechebe' chee Jesús, ne buluchálaje' dizra' chee Dios, na' benne' gubáz ca' buluzenne' bèneache dizra' chawe' chee Jesús lu xézredu ca' zaj nababa Samaria, na' ca gudé na' belexezrine' Jerusalén.

*Felipe dxuchálajlene' tu benne' chee xezr la xu Etiopía*

<sup>26</sup> Gudé na' guzre tu gubáz chee xabáa chee Xránadxu Felipe:

—Guxasa, guxíaj chalá'a naga dxedé gubizra beu' zaga ca', naga zrua neza chee Jerusalén da zeaj xezre Gaza, da dxedé na le'e xixre' lawe' lataj.

<sup>27</sup> Felipe guxase', na' guzé'e zéaje', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná bé'ene' xezr la xu Etiopía. Ba guxíaj benne' nigá Jerusalén chee be lá'ane' Dios. <sup>28</sup> Na'a zexíaje' Etiopía na', dxe'e lu carreta chee' da dxelecá'a bzrina', ne dxulabe' xiche naga zaj naxúaj xrtizra' Isaías, benne' bchálaje' waláz chee Dios. <sup>29</sup> Nadxa gunná Be' Lá'azxa, guzre' Felipe:

—Gubiga gagu cuita carreta na'.

<sup>30</sup> Gate gubiga Felipe na' benne' dxulaba bènea' xiche chee Isaías, na' bchebe' le':

—¿Dxéajni'inu' ca naca da dxulabu'?

<sup>31</sup> Benne' biu na' guzre' le':

—¿Ajazra gaca chéajni'ida' che quebe nu chilá' guzéajni'i neda'?

Na' guzre' Felipe cuene' cué'lene' le'.

<sup>32</sup> Naga dxulabe' lu xiche chee Dios dxenná na caní:

Beleché'e Le' naga gati'e ca tu zrila'dau',  
na' ca zrila' na' dxátaba' zrize lau benne' ca' dxu-  
luchibe' zraba',  
ca' bénqueze Le', quebe bi gunné'.

<sup>33</sup> Bulucá'ana ditje' Le', ne quebe belú'e lataj nu  
guchi'a chee',  
ne quebe nu gaca guchálaje' ca naca chee zri'ine  
zre sue',  
lawe' da belutie' Le'.

<sup>34</sup> Na' benne' Etiopía na' bchebe' Felipe:

—Gunná, ¿nuzra chee dxenná benne' nigá,  
cheéqueze' na', che chee xetú benne' xula?

<sup>35</sup> Nadxa guzú lau Felipe bzéajni'ine' le' ca naca  
naga dxulabe', ne bchálajlene' le' dizra' chawe' ca  
naca chee Jesús. <sup>36</sup> Gate guledée' tu naga de nisa,  
na' gunná benne' Etiopía na':

—Nigá de nisa. ¿Quebe gaca chua' nisa, zra?

<sup>37</sup> Felipe guzre' le':

—Che dxéajle'u dute lázrda'u, waca.

Benne' na' bechebe':

—Dxéajle'a naca Jesucristo Zri'ine Dios.

<sup>38</sup> Nadxa gunná bé'ene' guleza carreta na', na'  
dxúpate' gulu'e lu nisa, na' Felipe bchue' le' nisa.

<sup>39</sup> Gate belexedxúaje' lu nisa na', na' Be' chee  
Xránadxu beche'e Felipe naga xula. Benne' Etiopía  
na' québedxa blé'ene' le', na' bexu'e neza chee' dute  
xel-la' dxebe'. <sup>40</sup> Felipe na' guque bé'ene' ba zue'  
xezre Azoto, na' gudée' tu tu xezre dxuchálaje'  
dizra' chawe' ca naca chee Jesús cadxa bezrine'  
Cesarea.



## 9

*Saulo dxexaque' benne' chee Jesús*  
*(Hch. 22.6-16; 26.12-18)*

<sup>1</sup> Dxácatę na' Saulo quebe dxusane' dxune' ba xuzre gutię' benne' ca' dxeléajle'e chee Xránadxu. Chee gunę' caní guxíaje' xeajchálajlene' bxruze blau. <sup>2</sup> Gunabe' xiche da dxulé'e na nape' xella' dxenná bea da gu'e chéaje' xudau' ca' zaj nnita xezre Damasco, chee séquene' cheajxedílaje' benne' ca' dxeléajle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lizre xia lu xezre Jerusalén. <sup>3</sup> Na' gate ne xu'e neza zéaje', ne ca ba zua zrine' xezre Damasco, na' bsaní' tu xi' naga zéaje' da za' xabáa. <sup>4</sup> Saulo xeajcházie' lu xu, na' benne' chi'i tu benne' dxę'e le':

—Saulo, Saulo, ¿bizr chee na' nau zi' xuzru' neda'?

<sup>5</sup> Nadxa Saulo bchebe':

—¿Nuzra Lue', Xran'?

Na' bėnnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun bezure gate dxulíbeba' lawe' xágala da dxáduę'-ba'.

<sup>6</sup> Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xelęqueze' lue' da dxal-la' gunu'.

<sup>7</sup> Benne' ca' zjácale Saulo belezrébele'e lawe' da belenne' chi'i benne' na', san quebe nu' belelé'ene'.

<sup>8</sup> Nadxa Saulo bexase' lu xu na', na' gate guxá' lawe', quebe guca lé'ene'. Ca' guca, belequę'e ne'e,

ne guleché'e le' lu xezre Damasco. <sup>9</sup> Guzúe' na' chunna zra quebe dxelé'ene', ne quebe bi güe'e gudawe'.

<sup>10</sup> Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

<sup>11</sup> Nadxa gunná Xránadxu, dxé'e le':

—Guxasa, guxíaj neza da nazí le na: Neza Li, na' lizre Judas guchebu' chee tu benne' Tarso, le' Saulo. Benne' nigá dxuláwizre' Dios. <sup>12</sup> Tu lu da blé'ene', ba blé'ene' tu benne' le' Ananías chu'e guzé ne'e le' chee xelé'ene'.

<sup>13</sup> Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgutę da caleła da dxune' chee benne' ca' dxeléajle'e chiu' Lue' lu xezre Jerusalén. <sup>14</sup> Na'a ble'e nigá nape' xel-la' dxenná bea chee benne' xíchaję ca' chee bxruze ca', chee che'e lizre xia xúgutę benne' dxelenné' Dios lu Lau' Lue'.

<sup>15</sup> Na' Xránadxu guzre' le':

—Guxíaj. Neda' ba gucá'a benne' na' chee cheazenne' benne' xezr la xu ca', ne benne' wenná bea ca', ne benne' Israel ca', ca naca chia' neda'.

<sup>16</sup> Neda' gulé'eda' le' ca naca da zante da saque'e ne chia' neda'.

<sup>17</sup> Nadxa Ananías guzé'e zéaje' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasele-le' neda' chee xelé'enu', ne chee súale Be' Lá'azxa lue'.

<sup>18</sup> Ca' guca beléxrujete lu xiaj lawe' da zaj naca ca xrlacu bela, na' belé'ene'. Na' bexasa Saulo, ne gudxúate' nisa. <sup>19</sup> Gudé na' gudawe', ne bedipe'. Begá'ane' tu chupa zra nen benne' Damasco ca dxeléajle'e chee Jesús.

### *Saulo dxuchálaje' chee Jesús lu xezre Damasco*

<sup>20</sup> Nadxa guzú lau Saulo dxuchálaje' chee Jesús lu xu'u ga dxelezraga judío ca' zaj nnete' Damasco, dxenné' Jesús naque' Zri'ine Dios. <sup>21</sup> Xúgute' benne' beléne'e' chee' belexebáne'e', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e' Jerusalén, benne' ca' dxelenné' Dios lu La Jesús? ¿Quegá léqueze' na' ble'e' nigá chee che'e' benne' ca' xezre Jerusalén chee gudé'e' le' lu na' benne' xíchaje' ca' chee bxruze ca'?

<sup>22</sup> Saulo bchálajdxé' du lazre' chee Jesús, ne dxulé'ene' Jesús naque' Cristo chee Dios, na' bzua zrie' benne' judío ca' zaj zre'e' Damasco.

### *Saulo dxelé' lu na' benne' judío ca'*

<sup>23</sup> Ca' gudé zane' zra, benne' judío ca' belune' tuze dizra' xelúti'e' Saulo. <sup>24</sup> Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bèneache xezre na', chee xelúti'e' le'. <sup>25</sup> Nadxa benne' ca' dxeléajle'e' chee Jesús gulegú'e' Saulo tu lu xcuite lba zren, na' buluxulé'taje' le' chizrela le'e' ze'e da naxechaj na xezre. Ca' guca, gulá Saulo.

### *Saulo dxezrine' Jerusalén*

<sup>26</sup> Gate bezrín Saulo Jerusalén, guca lazre' gunē tuze benne' ca' dxeléajle'ē chee Jesús, san benne' ca' dxelezrebe' le' lawe' da quebe dxeléajle'ē ba dxéajle'ē Saulo chee Jesús. <sup>27</sup> Bernabé guché'ē Saulo, ne bze' le' lau benne' gubáz ca' chee Jesús. Na' bchálajle Bernabé gubáz ca' ca ble'e Saulo Xránadxu la neza, ne ca ben Xránadxu bchálajle'ē Saulo, ne ca bchalaj Saulo du lazre' lu xezre Damasco nen xel-la' dxenná bea chee La Jesús. <sup>28</sup> Nadxa Saulo begá'ane' Jerusalén, dxedále'ē benne' ca'. <sup>29</sup> Bchalaj Saulo du lazre' lu La Xránadxu, dxuchálajle'ē benne' ca' dxelenné' dizra' griego, san benne' caní gulaca lazre' xelútie' le'. <sup>30</sup> Gate guleque be'e biche ljwézredxu da caní, na' guleché'ē Saulo lu xezre Cesarea, na' lu xezre na' gulesel-le' le' xezre Tarso.

<sup>31</sup> Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gulaque' Xránadxu tuze, na' lawe' da gúcale Be' Lá'azxa le', gulane'.

### *Pedro dxexuné' Eneas*

<sup>32</sup> Gate dxedá Pedro dxeajnné'ē biche ljwézredxu ca', na' guxiájqueze' xejnné'ē benne' ca' dxeléajle'ē chee Jesús lu xezre Lida. <sup>33</sup> Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj. <sup>34</sup> Na' gunná Pedro, dxé'ē le':

—Eneas, Jesucristo ba bexuné' lue'. Bexasa, ne butube da'a chiu'.

Na' bexásate Eneas na'. <sup>35</sup> Belelé'e xúgute benne' le', benne' zaj zře'e xezre Lida, ne xezre Sarón, na' belexaque' chee Xránadxu.

*Dorcax dxexebane' ládujla benne' gate*

<sup>36</sup> Lu zra na' zua tu nu'ula le' Tabita lu xezre Jope. Dxéajle'e chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalene' benne' xache' ca'. <sup>37</sup> Lu zra ca' guxú'u Dorcas xel-la' we', na' gutie'. Na' bulugazje' le', ne belexrué' le' tu lu xu'u naga zua gudxupe' cuía dx-ala. <sup>38</sup> Xezre Jope na' zua na' gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajleguezre' le':

—Gudázega xezre Jope.

<sup>39</sup> Nadxa Pedro guxíajlene' benne' ca'. Gate bzrine' na', na' beleché'e le' naga zrua Dorcas na', na' xúgute nu'ula ca' ba zaj nate benne' chie' zaj naxéchaje' Pedro dxelebezre', ne dxululé'ene' le' zra nu'ula, ne zra benne' biu, da ca' ben Dorcas na' gate ne zue' nen benne' ca'. <sup>40</sup> Nadxa guleaj Pedro xúgute benne' ca', na' bzu zribe' bchálajlene' Dios. Na' gunné'e nu'ula gate na', gunné':

—Tabita, bexasa.

Nadxa nu'ula na' bexá' lawe', na' gate blé'ene' Pedro, bexase' gudxé'e. <sup>41</sup> Na' Pedro bequé'e ne'e, bechise' le'. Nadxa gunné' biche ljwézredxu ca', ne nu'ula ca' ba gute benne' biu chee', na' blé'ene' benne' ca' le' naca bane'. <sup>42</sup> Ca guca da nigá belén ca naca benne' zaj zře'e xezre Jope, na' benne' zan guléajle'e chee Xránadxu. <sup>43</sup> Pedro begá'ane' zane'

zra lu xezre na' lizre Simón, tu benne' dxucá'ana chawe' xide zra be xixre'.

## 10

### *Pedro ne Cornelio*

<sup>1</sup> Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Italia Zjaque' Wedil-la. <sup>2</sup> Benne' nigá, ne benne' zaj zre'e lizre' dxulucá'ana szrene' Dios, ne dxelezrebe' Le'. Cá'anqueze dxunézrujle'e dumí dxácalene' benne' judío ca', ne tu dxuchálajlezqueze' Dios. <sup>3</sup> Tu zra gate dxexedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee xabáa naga zue', na' guzre' le':

—Cornelio.

<sup>4</sup> Cornelio guzúe' dxenné'e gubáz chee xabáa na' dute xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'. <sup>5</sup> Gusel-la benne' chjaque' xezre Jope, cheajlenné' Simón, bénnea' léqueze' Pedro. <sup>6</sup> Zue' lizre xetú benne' le' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

<sup>7</sup> Gate bezá' gubáz chee xabáa na' bchálajlene' le', na' gunné Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'. <sup>8</sup> Na' bchálajlene' benne' ca' ca naca da ba guca, na' ca gudé na' gusel-le' le' chjaque' xezre Jope.

<sup>9</sup> Zra xula, dxácatę zaj xu'e benne' ca' neza, ne ba dxezrinę' gagu naga dxe' Jope, na' guluén Pedro chju'u sibe du wagubizra cheę guchálajlęne' Dios. <sup>10</sup> Ba dxedúnle'e, ne guca lazre' gawe', na' dxácatę ne dxulucueze' da gawe', blé'ene' tu da ble'e Dios le'. <sup>11</sup> Blé'ene' naxalaj xabáa, ne dxetaj lu xęzr la xu da naca na ca tu ladxe' zren nadxéaj na dápatę la'a cheę na. <sup>12</sup> Lawe' ladxe' na' zaj zria xúgute cue' bę xixre', bę zria tapa ni'a na'ba', ne bę snia ca', ne bę zua xrila ca'. <sup>13</sup> Nadxa benne' tu chi'i benne' dxę'e le':

—Guxasa, Pedro. Bęte tu bea ca' cheę gagu'-ba'.

<sup>14</sup> Pedro bechebe':

—Cabí, Xran. Neda' cabata' ne gawa' da quebe nun Dios gagu bęnneache, ne quegá da naca na sban.

<sup>15</sup> Benne' na' bchálaję' da xula, dxę'e le':

—Da ba nucá'ana chawe' Dios, quebe nnau' lue' naca na sban.

<sup>16</sup> Da nigá guca na chunna lasa, na' ladxe' na' begüén na xabáala. <sup>17</sup> Dxácatę dxe' Pedro dxulaba lazre' bi zéaję ca naca da blé'ene', na' belezrín benne' ca' nasel-la Cornelio dxu'a dxa xu'u, dx-uluchebe' ga zua lizre Simón. <sup>18</sup> Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bęnnea' léqueze' Pedro. <sup>19</sup> Gate Pedro ne dxulaba lazre' ca naca da blé'ene', na' Be' Lá'azxa guzre' le':

—Gunná'xque, chunna benne' dxelexílaję' lue'.

<sup>20</sup> Guxasa, bęxetaj. Guxíajle benne' ca', ne quebe gun chupa lazru' lawe' da nasel-la' neda' benne' ca'.

<sup>21</sup> Nadxa Pedro bexétaję' naga zaj zra' benne' ca' nasel-la Cornelio, na' guzrę' le':

—Neda' na' dxexílajle le'e. ¿Bizra cheę za'le?

<sup>22</sup> Benne' ca' belexechebe':

—Za'ntu' waláz cheę Cornelio, benne' dxenná be'e lu wedil-la. Naque' benne' xrlátaje, ne dx-ezrebe' Dios, na' xúgute benne' judío ca' dxelape' le' ba lá'ana, ne zaj nazrí'ine' le'. Tu gubáz cheę xabáa cheę Dios guzre' le' dxal-la' sel-le' benne' xedajlenné' lue' xidu' lizre' cheę xenne' ca da dxal-la' xu'u le'.

<sup>23</sup> Nadxa Pedro bzre'e benne' ca' xu'u na', na' belexegá'ane' nen le' xęla na'. Zra xula guxíajle Pedro benne' ca', na' xjácale bal-la biche ljwézredxu le', benne' zaj zre'e Jope.

<sup>24</sup> Zra gudxupe' zra belezrine' xęzre Cesarea naga zua Cornelio dxebeze' le', ne zrale bal-la benne' xrtie' le', ne xezícadxa benne' ljwezre', benne' ca' gunné'. <sup>25</sup> Gate bzrin Pedro chale'aj, bdxuaj Cornelio guzí' lu ne'e le'. Bzu zribe' lau Pedro cheę gucá'ana szrene' le'. <sup>26</sup> Pedro bechise' le', dxenné':

—Guzé. La gázqueze neda' naca' bėnneache ca lue'.

<sup>27</sup> Dxácate dxuchálajle Pedro Cornelio, gulu'e lu xu'ula, na' blé'ene' benne' zan zaj nazrague' na'.

<sup>28</sup> Nadxa gunná Pedro, dxę'e le':

—Nézquezle le'e quebe dxunna da nadxixruj bea cheę judío ca' neda' lataj gaca' tuze nen benne' quebe zaj naque' judío u chu'a lizre'. Na'a Dios ba blé'ene' neda' quebe dxal-la' nnia' cheę netú benne', quebe nnia' naque' sban, u naque' benne' quebe gapa' ba lá'ana. <sup>29</sup> Cheę le' na', gate gulenné'



neda', la guzá'tea', ne quebe ben chupa lazra'. Dxaca lazra' nezda' bi chee na' gunnele neda'.

<sup>30</sup> Nadxa bechebe Cornelio:

—Ba zeaj tapa zra ca zúadxu na'a, zua' lizra' nigá dxuna' gubasa, ne dxuchálajlenu' Dios, gate ble'e lau tu benne' neda', nacie' zra lane' da dxácatite na. <sup>31</sup> Benne' na' guzre' neda': “Cornelio, Dios ba benne' da dxuchálajlenu' Le', na' nézene' ca da dxunu' dxácalenu' benne' xache' ca'. <sup>32</sup> Gusel-la benne' chjaque' xezre Jope, cheajlexri'e Simón, bènea' léqueze' Pedro. Zue' lizre xetú benne' le' Simón, benne' dxucá'ana chawe' xide zra be xixre' ca', na' zua lizre' dxu'a nísadau'. Gate xidē' nigá, na' guchálajlene' lue'.” <sup>33</sup> Ca'an guca, gusél-latea' benne' ca' bedajlexedílaje' lue', na' benu' da chawe' bla'u nigá. Na'a xúgutentu' zrantu' nigá lau Dios, ne dxaca lázrentu' xénentu' xúgute ca da gunná be'e Xránadxu lue' guchálajlenu' netu'.

### *Da bchalaj Pedro lizre Cornelio*

<sup>34</sup> Nadxa guzú lau Pedro dxuchálaje', dxenné':

—Na'a dxéajni'ida' Dios quebe dxebéaje' bál-laze bèneache, <sup>35</sup> Na' xúgute xezr la xu Dios dxezí' lu ne'e benne' ca' dxelezrebe Le', ne dxelune' da xrlátaje. <sup>36</sup> Dios bchálajlene' zri'ine zre sua Israel ca', ne bchálaje' dizra' chawe' chee xel-la' dxebeza zri lazre', da dxezidxu ne chee Jesucristo, Bènea' naque' Xrana xúgute bèneache. <sup>37</sup> Le'e ba nézquezle ca naca da guca du ca naca lu xezr la xu chee benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bèneache nisa. <sup>38</sup> Nézele ca ben Dios, bnézruje' Jesús, benne' Nazaret, xel-la' waca chee

Be' Lá'azxa, ne ca gudá Le' dxune' da chawe', ne dxexune' xúgute benne' dxelezaca zi'e lu na' da xriwe'. Da nigá bene' lawe' da guzúale Dios Le'.  
 39 Netu' dxexeché bentu' chee da caní, xúgute da ben Jesús naga nababa Galilea, ne da bene' lu xezre Jerusalén. Gudé na' belutie' Le', gate buludé'e Le' xaga béguaj, 40 na' Dios bsebane' Le' gate guca chunna zra, na' be'e lataj ble'e lau Jesús netu'. 41 Quebe ble'e lawe' xúgute bèneache, san launtu' nétu'ze, nácantu' benne' ca' guleaj Dios nédxudaute chee xeché bentu' chee da caní. Netu' güe'e gudáguntu' nen Le' gate gudé bebane' ládujla benne' gate. 42 Gusel-le' netu' guchálajlentu' bèneache, ne xeché bentu' ca da nun Dios, nuzúe' Jesús nigá chee guchi'e chee benne' ban ca', ne chee benne' gate ca'. 43 La gázqueze nédxudaute gulenná xúgute benne' ca' buluchálaje' waláz chee Dios, buluchálaje' ca dخال-la' gaca chee Jesús, gulenné' xúgute benne' xeléajle'e chee Jesús, na' ne chee Le' Dios gunite lawe' xtul-la benne' ca'.

*Benne' quebe zaj naque' judío dxelezi'e Be' Lá'azxa*

44 Ne dxuchalaj Pedro gate bzin Be' Lá'azxa bedajsúalene' xúgute benne' ca' dxelenne' da dxuchalaj Pedro. 45 Benne' judío ca' dxeléajle'e chee Jesús, benne' ca' zá'acalene' Pedro, belexebánene' gate guleque bé'ene' ba zúale Be' Lá'azxa benne' ca' quebe zaj naque' judío. 46 Dxeleque bé'ene' na lawe' da belenne' dxuluchalaj benne' ca' dizra' chee benne' xula, ne dxelúe lá'ane' Dios. 47 Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezí'ē Be' Lá'azxa ca bentu' netu'?

<sup>48</sup> Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ane' nen le' tu chupa zra.

## 11

*Pedro dxuzenne' benne' gubáz ca' zaj zre'e Jerusalén ca naca da bene'*

<sup>1</sup> Benne' gubáz ca', ne biche ljwézredxu ca' zaj zre'e Jerusalén belenne' ba gulezí' lu na' benne' quebe zaj naque' judío dizra' chee Dios. <sup>2</sup> Gate bezrín Pedro xezre Jerusalén, gulezí' tizra' benne' ca' le', benne' ca' dxelenné' dxal-la' chugu late' be'la' chee benne' ca' zaj naque' chee Dios. <sup>3</sup> Benne' caní buluchebe' Pedro:

—¿Bizr chee na' guxíaju' xeajsúalenu' benne' ca' quebe zaj naque' judío, ne gudágulenu' le'?

<sup>4</sup> Nadxa Pedro bzenne' benne' ca' xúgutę da guca cha chee na, gunné':

<sup>5</sup> —Neda' zua' lu xezre Jope, na' gate dx-uchálajlena' Dios, ble'eda' tu da ble'e Dios neda'. Ble'eda' tu ladxe' zren nadxéaj dápatę la'a chee na, da dxetaj na xabáa, ne bedajsé na lawa'. <sup>6</sup> Gate gunná' xánnia' chee ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrílabá'. <sup>7</sup> Na' benda' tu chi'i benne' guzre' neda': “Guxasa Pedro, bete tu bea ca', na' gagu'-ba'.” <sup>8</sup> Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu bėnneache, ne quegá da

naca sban. <sup>9</sup> Nadxa bēnnea' dxenné' xabáa gunné' neda' da xula, na' guzre' neda': "Da ba nucá'ana chawe' Dios, quebe nnau' lue' naca na sban." <sup>10</sup> Da nigá guca na chunna lasa, na' ca gudé na' xúgute da ca' belexegüén na xabáa. <sup>11</sup> Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Cesarea chee zedajlexedilaj neda'. <sup>12</sup> Be' Lá'azxa gunná bé'ene' neda' chéajlęna' benne' ca', ne quebe gun chupa lazra'. La gázqueze gusiá'cale xrupa benne' biche ljwézredxu caní neda'. Xúgutęntu' guxú'untu' lizre tu benne'. <sup>13</sup> Le' bchálajlęne' netu' ca blé'ene' lizre' tu gubáz chee xabáa, zę ní'e, ne guzre' le': "Gusel-la benne' chjaca xęzre Jope chee cheajlenné' Simón, benne' léqueze' Pedro. <sup>14</sup> Benne' nigá xę'e lue' aja gunu' chee lau' lue', ne xeelé xúgute benne' zaj zre'e lizru'." <sup>15</sup> Gate guzú lawa' dxuchálajlęna' benne' ca', na' bzrin Be' Lá'azxa guzúalęne' benne' ca', ca blę'e guzúalęne' dxi'u nédxudautę. <sup>16</sup> Nadxa xeajsá lazra' ca gunná Xránadxu, gunné': "Da li Juan bchue' bēneache nisa, na' gaca chee da zéaję xel-la' dxedxúa nisa, súalę Be' Lá'azxa le'e." <sup>17</sup> Che Dios bnézruje' chee benne' ca' ca bęnne' dxi'u, guxéajlędxu chee Xránadxu Jesucristo, ¿nuzra naca' neda' chee tábaga' Dios?

<sup>18</sup> Nadxa gate biche ljwézredxu ca' zaj zre'e Jerusalén belenne' da caní, na' gulezúa zrie', ne gulezú lawę' dxelúe lá'anę' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexebí'i lazre' chee xezezi'e xel-la' nabán zeajlí canna.

*Benne' dxeléajle'e chee Jesús zaj zre'e xezre Antioquía*

19 Gate belutië' Esteban, na' belau zi' xuzre' xezícala benne' dxeléajle'e chee Jesús, na' bal-le' buluzrúnnaje', xjaque' xezre Fenicia, ne lu xu Chipre, ne xezre Antioquía. Gate belezrine' lataj ca', na' buluchálaje' dizra' chee Jesús lau benne' judío cá'aze, ne quegá lau benne' quebe zaj naque' judío. 20 Nadxa bal-la benne' dxeléajle'e chee Jesús, benne' Chipre, ne benne' Cirene, belelé'e xezre Antioquía, na' buluchálajle' benne' ca' quebe zaj naque' judío, ne buluzenne' le' dizra' chawe' ca naca chee Xránadxu Jesús. 21 Xel-la' waca chee Xránadxu guzúale na benne' ca', na' ca'an guca, benne' zan belexexaque' chee Xránadxu.

22 Gate belén benne' ca' da nigá, benne' dxeléajle'e chee Jesús zaj zre'e Jerusalén, na' guleselle' Bernabé xezre Antioquía. 23 Gate bzin Bernabé na', blé'ene' ca da chawe' da dxun Dios chee benne' ca', na' gubéle'ene'. Na' bsízrene' xúgute benne' ca' chee xelezúa chúchue' lu da naca chee Xránadxu. 24 Bernabé naque' benne' xrlátaje, na' zúale Be' Lá'azxa le', ne dute lázrdawe' dxéajle'e chee Jesús. Ca'an guca, ne chee le' guléajle benne' zan chee Xránadxu.

25 Gudé na' guxíaj Bernabé xezre Tarso, zea-jxedílaje' Saulo, na' gate bezrelne' le', beche'e le' Antioquía. 26 Gulezúe' na' tu iza naxá' nen benne' ca' dxeléajle'e chee Jesús, na' bulusédené' benne' zan. Lu xezre Antioquía na' guca na da nedxu gulé'e benne' ca' dxeléajle'e chee Xránadxu, Benne' Cristiano.

27 Ca lu zra ca', bal-la benne' dxelenné' waláz chee Dios besiá' que' Jerusalén, xjaque' Antioquía. 28 Tu benne' ca' le' Agabo guzé' lówela biche ljuwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma. 29 Nadxa benne' ca' dxeléajle'e chee Jesús, benne' zaj zre'e Antioquía belún zi' lazre' xeleselle' da gácale na biche ljuwézredxu zaj zre'e xezre ca' zaj nababa Judea, ca da xezezeque' tu tue' xulunézruje'. 30 Ca'an belune', na' beleselle' tu guna' lau benne' gula ca' chee Cristo zaj zre'e Judea, na' Bernabé ne Saulo belú'e na na'.

## 12

### *Dxelutie' Jacobo ne dxelegú'e Pedro lizre xia*

1 Lu zra ca' guzú lau wenná bea Herodes nau zi' xuzre' bal-la benne' ca' dxeléajle'e chee Jesús. 2 Gunná bé'ene' belutie' Jacobo, biche Juan nen xia nalá. 3 Gate ble'e Herodes dxelexezaca ba lazre' benne' judío ca' ca naca da bene', na' gudél-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj chee xeta xtila. 4 Ca gude gudél-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. 5 Ca'an guca xu'u Pedro lizre xia naga dxuluxúe xánnie' le', na' benne' biche ljuwézredxu ca' buluchálajlequeze' Dios du lazre'.

*Dios dxuselé' Pedro lizre xia*

<sup>6</sup> Dxela xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásie' laduj chupa benne' dxjaque' wedil-la, nadxéaje' chupa du xia, na' xebal-la benne' dxjaca wedil-la zaj zre'e dxu'a dxa xu'u dxuluxúe' lizre xia na'. <sup>7</sup> Nadxa ble'e lau tu gubáz chee xabáa chee Xránadxu, na' ca naca lizre xia na' guxaní'. Na' gubáz chee xabáa na' bte' le'e Pedro, ne bsebané' le', na' guzre' le':

—Guxásache.

Ca'an guca, du xia ca' belexexezre na na' Pedro.

<sup>8</sup> Na' gunná gubáz chee xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz chee xabáa na' le':

—Guxrúa xicha chiu' cuxru', ne gudále neda'.

<sup>9</sup> Pedro bedxúaje' cuzru gubáz chee xabáa na', ne quebe nézene' che naca da li che cabí ca da dxun gubáz chee xabáa na'. Dxéquene' dxelé'ene' tu da dxulé'e Dios le'. <sup>10</sup> Belexedé'e' naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' leze na bخالaj na. Belexedxúaje', na' ca gudé besia'que' belezrine' xetú neza xula chee xezr na', na' bca'ana gubáz chee xabáa na' leze'. <sup>11</sup> Nadxa guque be'e Pedro ba bedxúaje', na' guzá' lazre', gunné': Na'a dxelé'eda' naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúgute da gulaca lazre' judío ca' xelune' chia'.

12 Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalene' Pedro. 13 Gate gunné Pedro dxu'a dxa xu'u na', bzrin na' tu bi nu'ula lebe' Rode zeajnabe' nu na'. 14 Gate bexúnbeabe' chi'i Pedro, quebe gusalajbe' dxa xu'u. Xel-la' dxebé cheebe' zexíaj chégube' naga zaj nazraga benne' ca' chee zeajézrebe' benne' ca' ze Pedro dxu'a dxa xu'u. 15 Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

16 Dxácatę na' ze Pedro tu dxennézqueze' dxu'a dxa xu'u. Na' gate gulesálaje', ne belelé'ene' Pedro, na' belexebánene'. 17 Pedro guchisa ne'e chee xelezúa benne' ca' zrize, na' bchálajlene' benne' ca' ca ben Xránadxu bebéaje' le' lizre xia. Na' guzre' benne' ca':

—Le guzén Jacobo, ne biche ljwézredxu ca' ca naca da nigá.

Nadxa bezé'e zexíaje' naga xula.

18 Gate guxaní', gulezúale'e stebe benne' dxjaque' wedil-la ca' lawe' da quebe zaj nézene' aja guca chee Pedro. 19 Herodes gunná bé'ene' xelex-ilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na' gunná bé'ene' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxíaje' xaajsúe' xezre Cesarea.



### *Dxate Herodes*

<sup>20</sup> Herodes dxezré'e benne' ca' zaj zré'e xezre Tiro, ne xezre Sidón. Benne' chee xezre ca' beluné' tuze dizrá' chee cheajlelé'e cuine' lau Herodes na'. Beluné' Blasto benne' ljwezre'. Naque' tu benne' blau chee wenná bea Herodes, na' guleselle' le' lau Herodes na' chee nabe' le' sua zri ca naca da dxaca chee Herodes nen benne' ca'. Caní beluné' lawe' da nédxute dxelagu benne' xezre Tiro, ne Sidón da guzá' xezre Cesarea naga zua Herodes. <sup>21</sup> Nadxa Herodes bzue' tu zra xelezrín benne' ca' lawe'. Lu zra na' Herodes gucue' zra lane' da zácale'e, na' gudxé'e lataj blau chee', ne bchálajlene' benne' zan ca'. <sup>22</sup> Nadxa benne' zan ca' gulezú lawe' dxelenné' zizraj:

—¡Benne' nigá dxuchálaje' quebe naque' beniácheze! ¡Dios na'!

<sup>23</sup> Zra na'te tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

<sup>24</sup> Bzriluj dizra' chawe' chee Xránadxu, na' benne' ca' buluchálaje' ca naca na gáteteze na'.

<sup>25</sup> Gate belezúe Bernabé, ne Saulo zrin dxeluné' lu xezre Jerusalén, besiá'que' xezre na', zaj naché'e Juan, bi na' léquezebe' Marcos.

## 13

### *Bernabé ne Saulo dxelezú lawe' dxeledé' dxuluchálaje' dizra' chee Dios*

<sup>1</sup> Ládujla benne' ca' zaj nazraga chee Cristo lu xezre Antioquía zaj zra' benne' ca' dxelenné' waláz chee Dios, ne benne' ca' dxulusédene' bèneache

xrtizra' Dios. Ládujla benne' caní zaj zua Bernabé, ne Simón, bénnea' léqueze' benne' gasaj, ne Lucio, benne' xezre Cirene, ne Manaén, benne' gúlalebe' Herodes, benne' xu'u lu ne'e xezr la xu Galilea na', ne Saulo. <sup>2</sup> Tu zra gate benne' caní zaj zre'e dxelúe lá'ane' Dios, ne dxelune' gubasa, Be' Lá'azxa gunné':

—Le cueaj Bernabé, ne Saulo chee xelune' zrin na' da gunnéa' le' xelune'.

<sup>3</sup> Chee le na', ca gudé buluchálajlene' Dios, ne belune' gubasa, na' buluzé ne'e lawe' benne' ca', ne buluzé' le' dizra'.

*Dxupa benne' gubáz ca' dxuluchálaje' dizra' chee Dios lu xezr la xu Chipre*

<sup>4</sup> Gudé na', ca gusel-la Be' Lá'azxa le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxechaj nísadau' da nazí le na Chipre.

<sup>5</sup> Gate belezrine' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajlequezebe' gubáz ca' chee gácalebe' le'.

<sup>6</sup> Na' guledée' xúgute xézredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálaje' waláz chee Dios.

<sup>7</sup> Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeajnné' Bernabé, ne Saulo lawe' da dxaca lazre' xenne' dizra' chee Dios. <sup>8</sup> Na' benne' wazrá' na',

léqueze' Elimas gudábague' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'. <sup>9</sup> Nadxa Saulo, bénnea' léqueze' Pablo, zúale Be' Lá'azxa le', gunná' dxugüe' le', <sup>10</sup> na' guzre' le':

—Guzrí xe, benne' wen da calela. Zri'ine da xriwe', ne benne' dxusezxuj xrneza xúgute bénneache. ¿Bizr chee na' quebe dxusanu' dxusézxuju' neza chee benne' ca' dxelaca lazre' chjácalene' Xránantu'? <sup>11</sup> Na'a, Xránantu' gudé'e lue' ba xa'. Xegá'anu' la chul-la, na' tu chí'iqueze quebe le'enu' xel-la' naxaní' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxelé'ene'. <sup>12</sup> Gate ble'e benne' xu'u lu ne'e xezr la xu na' da nigá, na' guxéajle'e chee Jesús lawe' da bebánene' ca naca da dxusede Pablo ca naca chee Xránadxu.

*Pablo ne Bernabé dxelezzine' xezre Antioquía da nababa xezr la xu Pisidia*

<sup>13</sup> Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezzine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. <sup>14</sup> Gudé na' gubáz ca' besía'que' Perge, na' belezzine' xezre Antioquía da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. <sup>15</sup> Nadxa, ca gudé bululabe' lu xiche naga naxúaj da bdxixruj bea Moisés, ne da gulenná benne' ca' buluchálaje' waláz chee Dios, na' benne' xíchaje ca' chee xudau' na' gulesel-le' benne' xeajezre' Pablo, ne Bernabé:

—Le'e, biche l*jwézrentu'*, che ná*pale dizra'* da gu*zéajni'ile netu'*, waca n*nele na na'a*.

<sup>16</sup> Nadxa Pablo gu*xase'*, na' gu*chisa ne'e chee* xe*lezúa zri benne' ca', na' gunné'*:

—Le xene le'e, benne' Israel, ne le'e d*xezrébele* Dios. <sup>17</sup> Dios chee x*ezre* Israel gu*qué'e xra* x*rtáudxu ca', na' bene' benne' ca' tu cue' benne'* zante gate ne zaj z*re'e ca benne' zitu' ca' lu xezr* la xu Egipto, na' ca gu*dé na' bebéaje' le' lu xezr* la xu na' du*te xel-la' waca chee'*. <sup>18</sup> Dios b*chaga* lawe' benne' ca' chua iza le'*e xixre' lawe' lataj,* <sup>19</sup> na' bzria xi'e gazre cue' b*enneache gulezúa lu* xezr la xu Canaán, chee b*nézruje' xra xrtáudxu ca'* xezr la xu chee benne' ca'. <sup>20</sup> Gu*dé na', lawe'* tapa gaxúa xu gachaj iza gu*nná be'e Dios benne'* ca' lu na' benne' ca' buluchi'e chee', cadxa bzrin zra zua Samuel, benne' b*chálaje' waláz chee* Dios. <sup>21</sup> Nadxa benne' ca' gu*lenabe' Dios sua tu benne'* gaque' wenná bea chee', na' Dios bzue' wenná bea tu benne' le' Saúl, zri'ine Cis, tu benne' chee tu cue' benne' ju*díio zaj naque' zri'ine zre sua* Benjamín. Saúl nigá gu*que' wenná bea lawe' chua* iza. <sup>22</sup> Gu*dé na' Dios begü'e Saúl lataj chee', na'* bzue' David gaque' wenná bea chee', na' chee benne' nigá gu*nné': “Nezda' David, zri'ine Isaí,* naque' tu benne' dxune' da d*xezaca ba lazra',* ne gu*ne' xúgute da dxaca lazra'.”* <sup>23</sup> Tu benne' zri'ine zre sua David nigá naca Jesús, b*ennea' bzua* Dios chee gu*selé' benne' Israel ca', ca ba guchebe* lazre' chee David. <sup>24</sup> Né*dxudxa gate za xida Jesús,* Juan b*chálajlene' ca naca benne' Israel ca', guzre'* benne' ca' dxal-la' xe*lexebí'i lazre', ne xelexedxúe'* nisa. <sup>25</sup> Na' gate ba za cheajsé chee Juan, na'

gunné': "Neda' quebe naca' bēnnea' dxéquele naca', san ca te chia' neda' za xetú benne' quebe naca chia' neda' cuéaja' zrele' da xu'u ni'e."

<sup>26</sup> 'Le'e, biche ljwezra', zri'ine zre sua Abraham, ne le'e dxezrébele Dios. Dios nasele' chee dizra' nigá chee lale. <sup>27</sup> Benne' ca' gulezrá' Jerusalén, ne benne' blau chee' ca', quebe belexúnbe'e nu na' Jesús, ne quebe guléajni'ine' dizra' da buluchalaj benne' ca' buluchálaje' waláz chee Dios da dxe-lenne' xúgute zra dxulupá'ane'. Ca' guca, benne' ca' belún líqueze' ca naca da naxúaj na chee Jesús gate gulechugue' chee' gatie'. <sup>28</sup> Lácala quebe belezrelne' tu da nabaga Jesús chee xelútie' Le', gulenabe' lau Pilato nna bé'ene' gatie'. <sup>29</sup> Nadxa, gate gudé belune' xúgute da naxúaj na lu xiche chee Dios ca naca da dxal-la' gaca chee Jesús, na' buluxulétaje' Le' xaga béguaj, ne bulucache' Le'. <sup>30</sup> Nadxa Dios bsebanē' Le' ládujla benne' gate. <sup>31</sup> Lu zane' zra Jesús ble'e lawe' benne' ca' guledálene' Le' gate bezé'e Galilea dxeaje' Jerusalén, na' na'a, benne' caní dxelexechebe' ca naca chee' lau bēneache.

<sup>32</sup> 'Cá'aqueze netu' dxuzénentu' le'e dizra' chawe' ca naca da guchebe lazre' Dios lau xra xrtáudxu ca'. <sup>33</sup> Ben lie' ca naca da guchebe lazre' cheedxu dxi'u, nácadxu zri'ine zre sua benne' ca', gate bsebanē' Jesús, ca naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." <sup>34</sup> Dios blé'ene' gusebanē' Le' ládujla benne' gate, chee quebe guzru bel-la' dxen chee' gate gunné' lu xiche chee': "Gunna' le'e da chawe' da guchebe lazra' lau David." <sup>35</sup> Cá'aqueze dxenné' xetú lu salmo: "Quebe gu'u lataj guzru bel-la' dxen chee wen zrin chiu', bi nazri'ite lazru."

<sup>36</sup> Da li David bene' zrin chee benne' ca' zaj zre'e gate zua le', ca gunná be'e Dios le', san ca gudé na' gutie', na' bulucache' le' naga belegache xra xrtawe' ca', na' guzru bel-la' dxen chee'. <sup>37</sup> Quebe guzru bel-la' dxen chee Bénnea' bsebán Dios Le'. <sup>38</sup> Biche ljwezra', dxuzenda' le'e, dxal-la' nézele Dios gunité lawe' chee dul-la chee le ne chee Jesús. <sup>39</sup> Ne chee Le', xúgute benne' dxeleajlí lazre' Le', Dios dxunité lawe' chee benne' ca' ca naca xúgute da quebe guca gunité lawe' chee' lácala belune' ca naca da bdxixruj be'e Moisés. <sup>40</sup> Le guxúe xanne' cuínale chee quebe gaca chee le ca naca da buluzúaj benne' ca' buluchálaje' waláz chee Dios, gate gulenné':

<sup>41</sup> Le nna', le'e, benne' wen la, ne le xebane, ne le xenite, lawe' da guna' neda', Dios chee le, lu zra chee le, tu da naca da zrente, da quebe chéajle le lácala nu guzén le'e.

<sup>42</sup> Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupá'ane'. <sup>43</sup> Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelune' da naca chee Dios, xjácálene' Pablo ne Bernabé. Gubáz caní buluzéajni'ine' benne' ca' dxal-la' xelezúa chache' lu xel-la' zri'i lazre' chee Dios.

<sup>44</sup> Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelenne' dizra' chee Dios. <sup>45</sup> Gate benne' judío ca' belelé'ene' benne' zante zaj nazrague' na',

na' belaque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'.  
<sup>46</sup> Nadxa Pablo ne Bernabé gulenné' du lazre', gulé'e benne' judío ca':

—Ben na ba xen bzénentu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee le gápale xel-la' nabán zeajlí canna, chee le na' chéajntu' na'a chálajlentu' benne' quebe zaj naque' judío. <sup>47</sup> Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca',

ne chee gacu' weselá chee bénneache zaj zre'e ca naca xezr la xu.

<sup>48</sup> Gate belenne' da nigá, benne' quebe zaj naque' judío gulebéle'ene', na' gulezú lawe' dxelenné' xrlátaje naca dizra' chee Xránadxu, na' guléajle xúgutę benne' ca' ba nabéaj Dios chee xelape' xel-la' nabán zeajlí canna. <sup>49</sup> Ca' guca, bzriluj dizra' chee Dios du ca naca lu xezre ca' zaj nababa na'. <sup>50</sup> Benne' judío ca' buluchálajlene' bal-la nu'ula blau ca' zjácále' da dxulusédene' chee Dios, ne benne' biu blau ca' chee xezre, na' gulegú'u xelle' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'. <sup>51</sup> Nadxa gubáz ca' belexebibe' bxrte xu da zeajzria na zrele' da dxulé'e na zaj nabaga benne' ca' zria, na' xjaque' lu xezre Iconio. <sup>52</sup> Gulebéle'e benne' zaj zre'e Antioquía na', benne' dxeléajle'e chee Jesús, zúale Be' Lá'azxa le'.

# 14

## *Da belún Pablo ne Bernabé lu xezre Iconio*

<sup>1</sup> Gate belezrin Pablo ne Bernabé xezre Iconio, na' belú'e tu zrentę lu xudau' cheę judío ca', na' ca buluchálaję' dizra' cheę Dios, benne' zante guléajlę'e cheę Jesús, benne' judío ca', ne benne' quebe zaj naque' judío. <sup>2</sup> Nadxa benne' judío ca', benne' quebe dxeléajlę'e cheę Jesús belegú'u xel-lę' benne' quebe zaj naque' judío cheę xelecuídenę' biche ljwézredxu ca'. <sup>3</sup> Lácala belunę' caní, benne' gubáz ca' gulezúaquezę' na' zane' zra, ne du lazre' buluchálaję' dizra' cheę Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' cheę Dios, na' Lę' bnézruję' gubáz ca' xel-la' dxenná bea xelunę' xel-la' waca ca' cheę xabáa ne da dxelunna bea na naca da li da dxelennę'. <sup>4</sup> Benne' ca' zaj zrę'e xezre na' gulaque' chupa la'a. Bal-lę' beledę'e judío ca', na' xebal-lę' beledę'e gubáz ca' cheę Jesús. <sup>5</sup> Nadxa benne' judío ca', ne benne' quebe zaj naque' judío belunę' tuze dizra' nen benne' xu'u lawe' ca' cheę gulennę' schanni' cheę benne' gubáz ca', na' gulaca lazre' xuluzríę' lę' xiaj. <sup>6</sup> Pablo ne Bernabé, gate belenne' ca', buluzrúnnaję' zjaque' naga zaj dxe' xezre Listra, ne xezre Derbe, da zaj nababa Licaonia, na' guledęę' ca naca xęzredu ca' cheę xezre ca' zaj nababa na', <sup>7</sup> na' buluchálaję' na' ca naca dizra' chawe' cheę Jesús.

## *Dxuluzríę' Pablo xiaj lu xezre Listra*

<sup>8</sup> Lu xezre Listra zua tu benne' nazrinnaj ni'e. Dxe'e na' lawe' da gúlaję' nazrinnaj ni'e, ne quebe



dxácaqueze se'e. <sup>9</sup> Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' nape' xel-la' dxeajlí lazre' chee xexaque'. <sup>10</sup> Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. <sup>11</sup> Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bēnneache ba belelé'e naga zúadxu.

<sup>12</sup> Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo. <sup>13</sup> Na' bxruze chee dios Júpiter, zua xudau' chee na ca dxú'udxu xezre na', guché'e bezre ca' ne xiaj zaj nuzé'e na du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútie' bejr ca' lau benne' gubáz ca' ca dxelúnqueze benne' xezre Listra na' chee dios chee'. <sup>14</sup> Gate guleque be'e Bernabé ne Pablo, benne' gubáz ca', na' gulecheze' zra lane' da dxulé'e na dxelezrebe' bi gun Dios, na' gulu'e lávela benne' ca', dxelenné' zizraj:

<sup>15</sup> —Le'e, benne', ¿bizr chee na' dxunle da nigá? Netu' nácantu' bēnneache ca lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajlele chee Dios ban, Bēnea' bene' xabáa ne xezr la xu, ne nísadau', ne xúgute da de lu'ule na. <sup>16</sup> Lu iza da ba guledé Dios be'e lataj xúgute bēnneache guledé' lu xrneza cha chee', na' belune' ca da gulaca lazre', <sup>17</sup> lácala blé'equezne' benne' ca' nu naca Le' ne chee da chawe' da dxune' chee benne' ca'. Le' dxusel-la'

xiuj cheedxu ne ca naca lina xrtante, ne dxunne' da dxechínedxu da gágudxu, ne chee bedxu.

<sup>18</sup> Lácala gulenná gubáz ca' da nigá, gúcale'e na stebe buluzague' benne' ca' chee quebe xelútie' bežr ca' lau le' chee xuluxucá'ana szrene' le'.

<sup>19</sup> Gudé na' belezrín bal-la benne' judío, benne' Antioquía, ne benne' Iconio, na' belegú'u xel-le' bēneache ca', na' buluzríe' Pablo xiaj. Guléquene' ba belutie' Pablo, na' gulezrube xue' le' belebéaje' le' xezre na'. <sup>20</sup> Gate benne' ca' dxeléajle'e chee Jesús belezrague' zaj naxéchaje' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

<sup>21</sup> Ca gudé bchálaje' dizra' chawe' chee Jesús lu xezre Derbe, naga benne' zante gulezí' lu ne'e dizra' chee Dios, na' gubáz ca' belexedée' xezre Listra, ne xezre Iconio, ne xezre Antioquía. <sup>22</sup> Lu xezre caní belún chache' lázrdau benne' ca' dxeléajle'e chee Jesús, ne bulusízrene' le' chjácalene' da naca chee Dios, dxelé'e le':

—Benne' xelu'e naga dxenná bea Dios, xel-la' zi zrente xeledée'.

<sup>23</sup> La gázqueze buluzúe' benne' gula ca' chee xuluxúe' tu tu cue' benne' ca' dxeléajle'e chee Jesús, na' ca gudé na' buluzré'e benne' ca' lu na' Xránadxu, Bēnea' ba guléajle'e chee'.

*Pablo ne Bernabé dxelexezrine' lu xezre Antioquía da nababa Siria*

<sup>24</sup> Ca gudé na' belexedée' naga nababa Pisidia, na' belezrine' naga nababa Panfilia. <sup>25</sup> Buluchálaje' dizra' chee Dios lu xezre Perge, na' ca gudé na' xjaque' xezre Atalia. <sup>26</sup> Na'

belexú'e da dxedá lawe' nísadau', na' belexezrine' xezre Antioquía, naga zaj zra' benne' belegu'e gubáz ca' lu na' Dios chee xelune' zrin na', da ba belezueñe' na'a. <sup>27</sup> Gate belezrine' Antioquía na', na' bulutupe' benne' ca' dxeléajle'e chee Jesús, ne buluzenne' benne' ca' xúgute da ba ben Dios, bchínene' gubáz ca', ne ca' ben Xránadxu, be'e benne' quebe zaj naque' judío lataj xeléajle'e chee Jesús. <sup>28</sup> Na' Pablo, ne Bernabé belexegá'ane' na' zane' beu' nen benne' ca' dxeléajle'e chee Jesús.

## 15

### *Gubáz ca' chee Jesús dxexezrague' Jerusalén*

<sup>1</sup> Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dxelé'e biche ljwézredxu ca' dxal-la' chugu late' weaj bela' chee bel-la' dxen chee benne' biu ca' chee xeledé', ca gunná bea Moisés. <sup>2</sup> Pablo ne Bernabé bulutíl-lale'e le' dizra', na' naga xeajche'te na, biche ljwézredxu ca' buluzú'e Pablo, ne Bernabé, ne xezícala benne' ca' chee chjaque' Jerusalén chee cheajlechálaje' chee da nigá nen benne' gubáz ca', ne benne' gula ca' chee cue' benne' dxeléajle'e chee Jesús zaj zre'e Jerusalén.

<sup>3</sup> Benne' dxeléajle'e chee Jesús, benne' zaj zre'e Antioquía, belexegu'e benne' caní neza, na' belexedé'e xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque' judío, ba belexexaque' chee Dios, na' xúgute biche ljwézredxu belebéle'ene' gate belenne' da nigá.

<sup>4</sup> Gate Pablo ne Bernabé belexezrine' Jerusalén, na' benne' ca' dxeléajle'e chee Jesús ne benne' gubáz ca', ne benne' gula ca' gulez'í lu ne'e le', na' Pablo ne Bernabé buluzenne' le' ca naca da ben Dios lu na' le'. <sup>5</sup> Bal-la benne' fariseo ca', benne' ba guléajle'e chee Jesús, gulezé' gulenné':

—Dxun na ba xen chugu late' weaj belá' chee bel-la' dxen chee benne' biu ca', benne' ba guléajle'e chee Jesús, benne' quebe zaj naque' judío, ne nna be'edxu le' xuluzúe' dizra' da bdxixruj be'e Moisés.

<sup>6</sup> Nadxa belezraga benne' gubáz ca' ne benne' gula ca', benne' dxeléajle'e chee Cristo, chee xulucá'ana chawe' da na' dxaca. <sup>7</sup> Ca gudé buluchálajle ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'é'e neda' nédxute ládujla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajle benne' ca' chee Le'. <sup>8</sup> Dios nézene' ca naca da xu'u lu xichaj lázxdau bèneache, na' blé'ene' dxez'í lu ne'e benne' ca', lawe' da bnézruje' benne' ca' Be' Lá'azxa ca bene' cheedxu dxi'u. <sup>9</sup> Dios quebe dxuché'e ca zrí'ine' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús. <sup>10</sup> Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca gúadxu dxi'u, ne quebe guca xelúa xra xrtáudxu na? <sup>11</sup> Na'a, dxéajledxu dxi'u bache naladxu ne chee xel-la' zri'i lazre' chee Xránadxu Jesús, ne cá'anqueze zaj nalá benne' ca'.

<sup>12</sup> Nadxa xúgute' gulezúa zrie', ne buluzé nague' dxácate dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé láwela benne' ca' quebe zaj naque' judío. <sup>13</sup> Gate bexuzre buluchálaje', na' gunná Jacobo:

—Biche ljwezra', le xene chia'. <sup>14</sup> Simón Pedro bzenne' dxi'u ca ben Dios, be'e lataj benne' ca' quebe zaj naca judío xelexexaque' chee' da nedxu lasa, beque'e ládujla benne' ca' benneache xelexexaque' chee'. <sup>15</sup> Da na' guca naca na tuze nen da buluzúaj benne' ca' buluchálaje' waláz chee Dios, da na' naxúaj na lu xiche chee Dios, dxenné':

<sup>16</sup> Te nigá xelá'a

na' xechisa' ca naca lizre David da nazre'e.

Gucá'ana chawa' da nagá'ana chee na,

na' xechísaqueza' na,

<sup>17</sup> chee xelexíaj xúgute benne' xezica ca' Xrane' Dios,

ne cá'anqueze xelún xúgute benne' zaj zra' xezr la xu ca',

benne' ca' xelenne' chee La' neda'.

<sup>18</sup> Ca' dxenná Xránadxu, blé'ene' da nigá nédxudaute.

<sup>19</sup> 'Chee le na' dxapa' le'e quebe dxal-la' gunle zede benne' quebe zaj naque' judío, benne' ca' dxelexexaque' chee Dios. <sup>20</sup> Dخال-la' guzúajntu' chee benne' ca' dxal-la' xulusane' da naca chee bedáu' xaga ca' u bedáu' xiaj, ne quebe dxal-la' xelune' dul-la chee da dxucá'ana sban benneache, ne quebe dxal-la' xelawe' bela' chee be xixre', be quebe bdxuaj dxen, ne quebe dxal-la' xelawe' dxen cheeba'. <sup>21</sup> Caní dxal-la' xelune' lawe' da ca

ni'i zaj zra' benne' tu tu xezre, benne' dxuluzenne' bènneache ca naca da bdxixruij bea Moisés, da na' dxululabe' lu xudau' ca' chee benne' judío ca' tu tu zra ca' dxulupá'ane'.

<sup>22</sup> Nadxa benne' gubáz ca', ne benne' gula ca', ne xúgute benne' dxeléajle'e chee Jesús belune' tuze dizra' xelequé'e bal-la benne' ca' ládujla le' ne xelesel-le' le' xezre Antioquía nen Pablo, ne Bernabé. Belequé'e Judas, bènnea' léqueze' Barsabás, ne Silas. Chupa benne' caní zaj naque' benne' blau ládujla biche ljuwézredxu ca'. <sup>23</sup> Bulugüé'e benne' ca' tu xiche da dxenná na: "Netu', benne' gubáz zrantu' nigá, ne benne' gula zrantu' nigá, ne biche ljuwézrele zrantu' nigá, dxugápantu' le'e diuzre, biche ljuwézrentu' quebe nácale judío, zrale xezre Antioquía, ne le'e zrale xezre ca' zaj nababa Síria, ne xezre ca' zaj nababa Cilicia. <sup>24</sup> Ba bémentu' bal-la benne' ba besía'que' nigá, ne quebe nasél-lantu' netu' le', na' belune' le'e zede nen dizra' da buluchálaje', ne belún zréajene' le'e, dxelenné' dxalla' chugu late' weaj belá' chee bel-la' dxen cheele, benne' biu ca', ne chéajlele ca naca da bdxixruij be'e Moisés. <sup>25</sup> Chee le' na' dxéquentu' naca xrlátaje cá'antu' bal-la benne' ládujla netu' chee xeelé'e xedajlenné'e le'e nen biche ljuwézredxu Bernabé ne Pablo, benne' ca' nazrí'i lázrele'entu'. <sup>26</sup> Benne' caní belune' zrin chee Xránadxu Jesucristo, xjaque' lu da stebe naga gulaca lazre' bènneache xelútie' le'. <sup>27</sup> Ca' naca na, dxesél-lantu' naga zúale Judas ne Silas, na' benne' caní xuluchálajlene' le'e ca naca chee da nigá. <sup>28</sup> Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen

gunle. <sup>29</sup> Dخال-la' gusanle da naca chee bedáu' xaga, ne bedáu' xiaj ca', ne quebe dxal-la' gunle dul-la chee da dxucá'ana sban bénneache, ne quebe dxal-la' gágule bela' chee be xixre', be quebe bdx-uaj dxen, ne quebe dxal-la' gágule dxen cheeba'. Che gunle ca naca da nadxixruj bea caní, gunle xrlátaje. Dxenábantu' lau Dios gaca chawe' chee.

<sup>30</sup> Nadxa benne' ca' gulesel-le' xjaque' xezre Antioquía. Na' buluchague' benne' ca' zaj naque' chee Dios, ne bulunézruje' le' xiche na'. <sup>31</sup> Gate biche ljuézredxu ca' bululabe' na, na' gulebéle'ene' lawe' da dxue zren na le'. <sup>32</sup> Judas ne Silas zaj naque' benne' dxelenné' waláz chee Dios. Chee le' na' buluchálajlene' biche ljuézredxu ca', belúe zrene' le', ne bulutipe' lazre' le'. <sup>33</sup> Gate gudé guca tu chi'i zaj zre'e na', na' benne' bíchedxu ca' buluzé' benne' ca' dizra', ne gulenabe' Dios sua xel-la' dxebeza zri lazre' nen benne' ca', chee xesí'aque' xelexezrine' naga zaj zra' benne' ca' gulesel-le' le'. <sup>34</sup> Silas gúquene' xrlátaje xegá'ane' na'. <sup>35</sup> Cá'aqueze Pablo, ne Bernabé belexegá'ane' lu xezre Antioquía, na' tu zren nen benne' zandxa gulezúe' dxulusédene' bénneache, ne dxuluchálaje' ca naca dizra' chee Xránadxu.

*Dxezú lau Pablo zéaje' zitu' da gudxupe' lasa guchálaje' chee Jesús*

<sup>36</sup> Ca gudé na', Pablo guzre' Bernabé:

—Xu'u xecha lasa cheajnnadxu biche ljuézredxu ca' zaj zre'e xúgute' xezre ca' naga xeajchálajdxu dizra' chee Xránadxu, chee cheajnnadxu aja dxaca zaj zre'e.

<sup>37</sup> Bernabé guca lazre' che'e Juan nen le', bi na' léquezebe' Marcos, <sup>38</sup> san Pablo quebe guxáza lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxíajlebe' le' lu zrin chee Xránadxu. <sup>39</sup> Na' Pablo, ne Bernabé bulutil-la ljwezre' dizra'. Ca'an guca, belexela'a cha chee'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre. <sup>40</sup> Na' Pablo guqué'e Silas, na' ca' gudé biche ljwézredxu ca' belegü'e Pablo ne Silas lu na' Xránadxu chee' gune' da chawe' chee' benne' ca', <sup>41</sup> na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

## 16

### *Timoteo dxéajlebe' Pablo ne Bernabé*

<sup>1</sup> Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' chee' Jesús, lebe' Timoteo, zri'ine tu nu'ula judío dxéajle'e chee' Jesús, san xrabe' naque' benne' griego. <sup>2</sup> Bi bíchedxu zaj zre'e xezre Listra, ne xezre Iconio dxeleonné' xrlátaje dxgua dx-unbe'. <sup>3</sup> Pablo guca lazre' chéajle Timoteo le', na' guchugue' late' belá' chee' bel-la' dxen chee'be' ca' dxenná bea da bdxixruj be'e Moisés, chee' quebe xelezrá'a benne' judío ca' zaj zre'e naga nababa na lawe' da zaj neze xúgutę benne' ca' naca xra Timoteo benne' griego. <sup>4</sup> Lu xúgutę xezre naga dxeledé'e buluzenne' benne' bíchedxu ca' ca' naca da zaj nadxixruj bea na belún benne' gubáz ca', ne benne' gula ca' zaj zre'e Jerusalén. <sup>5</sup> Ca'an guca bi bíchedxu ca' gulezúa chúchue' ca' dxeleajlí lazre'



Jesús, na' benne' ca' dxeléajle'e chee', tu zra tu zra zeajte dxelane'.

*Dxele'e Pablo tu da ble'e Dios le', dxelé'ene' tu benne' Macedonia*

<sup>6</sup> Be' Lá'azxa quebe be'e benne' gubáz ca' lataj xuluchálaje' dizra' chee Dios naga nababa Asia. Chee le na' guledée' naga nababa Frigia, ne xezre ca' zaj nababa Galacia. <sup>7</sup> Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee Jesús quebe be'e le' lataj. <sup>8</sup> Nadxa guledée' naga nababa Misia, na' belezrine' xezre Troas. <sup>9</sup> Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." <sup>10</sup> Gate ble'e Pablo da nigá, na' benne' ca', ne neda', Lucas, la gudíajntu' ájala guntu' chee chéajntu' ga nababa Macedonia lawe' da gúquequezentu' Dios dxenné' netu' chee cheajchálajntu' benne' ca' dizra' chawe' ca naca chee Jesús.

*Pablo ne Silas dxelezrine' ciudad Filipos*

<sup>11</sup> Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis. <sup>12</sup> Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzúantu' tu chupa zra. <sup>13</sup> Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene'

Dios. Gudxe'ntu' na' ne bchálajlentu' nu'ula ca' zaj nazrague' na' ca naca dizra' chawe' ca naca chee Jesús. <sup>14</sup> Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee Dios, na' benne' cheentu', na' Xránadxu bzani'e lázrdawe' chee guz'í lu ne'e da dxuchalaj Pablo. <sup>15</sup> Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

<sup>16</sup> Tu zra gate zéajntu' naga zeajchálajlentu' Dios, bezrágantu' tu bi nu'ula cuide' xu'ube' be' xriwe', ne dxenné xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchínene' lebe' xadía, na' xránabe' ca' dxelezíle'e dumí da dxezibe', dxenné xa'abe'. <sup>17</sup> Bi nu'ula nigá guzú laube' za'be' cuzru Pablo ne netu', dxennabe' zizraj:

—Benne' caní dxelune' zrin chee Dios szrente, ne dxuluzenne' le'e ájala gunle lale.

<sup>18</sup> Zane' zra benbe' caní cadxa guque Pablo zede, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajte na.

<sup>19</sup> Gate benne' ca' dxuluchínene'-be' xadía guleque bé'ene' québedxa bi xelexezí'e ne cheebe', na' gulél-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau. <sup>20</sup> Na' buluzúe' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zréajene' benne' zaj zře'e xezre cheedxu, <sup>21</sup> ne dxulusédene' ca naca da zjácalene', da quebe gaca sidxu, ne quebe gaca gundxu na lawe' da nábadaxu Roma.

<sup>22</sup> Nadxa benne' zaj zře'e xezre na' guledábague' Pablo ne Silas, na' benne' xu'u lawe' na' gulenná be'e xeledéchaje' zra lana Pablo ne Silas, ne xelu'e le' zrise. <sup>23</sup> Ca gudé belúele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xánnie' benne' ca'. <sup>24</sup> Gate benne' ca gulenná be'e, na' bzře'e le' zane' lézxudxa ne bzře'e ni'a benne' ca' lu xedxu chee cuaga da dxuxru na ni'e.

<sup>25</sup> Gate gula dxela Pablo ne Silas dxu-luchálajlene' Dios, ne dxelul-le' da dxelúe lá'ane' Dios, na' xezícadxa benne' zaj zře'e lizre xia dxuluzé nague' chee'. <sup>26</sup> La' na'te guzrú'le'e da bxrize na ca naca lizre xia, na' belexalaj xúgute dxa xu'u ca', ne belexezezre du xia da zaj nadxéaj ni'a xúgute benne' ca' zaj zře'e lizre xia. <sup>27</sup> Na' benne' xu'u lu ne'e lizre xia na' bebane', ne gate blé'ene' zaj naxalaj dxa xu'u ca' chee lizre xia, gúlaje' xia chee xute cuine' lawe' da dxéuene' ba buluxuzrúnnaj benne' ca' zaj zře'e lizre xia. <sup>28</sup> Pablo gudxezre xe'e, guzre' le':

—Quebe bi gune cuinu'. Xúgutentu' zúantu' nigá.

<sup>29</sup> Nadxa benne' na' xu'u lu ne'e lizre xia gunabe' tu xi', na' guxú'u chégüe', dxezrízequeze' xel-la' dx-ezrebe, na' bzu zribe' lau Pablo ne Silas. <sup>30</sup> Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee la'?

<sup>31</sup> Benne' ca' belexechebe':

—Guxéajle chee Xránadxu Jesucristo, na' lau', ne cá'anqueze benne' zaj zre'e lizru'.

<sup>32</sup> Na' buluchálajleñe' le', ne xúgute benne' zaj zre'e lizre' ca naca dizra' chee Xránadxu. <sup>33</sup> Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca gude na', le' ne xúgute benne' zaj zre'e lizre' guledxúe' nisa. <sup>34</sup> Ca gude na' beche'e Pablo ne Silas lizre', na' bnézruje' da gulawe', na' le' ne benne' zaj zre'e lizre' gulebéle'ene' lawe' da ba guléajle'e chee Dios.

<sup>35</sup> Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusane' Pablo ne Silas. <sup>36</sup> Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

<sup>37</sup> Pablo guzre' bi xra'aga ca':

—Netu' nabá bantu' Roma, na' belú'e netu' lówela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

<sup>38</sup> Bi xra'aga ca' xejlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma. <sup>39</sup> Na' xjaque' lizre xia na', ne gulenabe' Pablo ne Silas xelezí zrene' chee'. Nadxa belexebéaje' le', ne gulata' xuené' le' xelexedxúaje' xezre na'. <sup>40</sup> Gate Pablo ne Silas belexedxúaje' lizre xia na', na' xjaque' lizre Lidia, na' ca gude buluchálajleñe' biche ljwézredxu ca', ne bulutipe' lazre', na' be-siá'que'.

# 17

## *Benne' zaj zře'e xezre Tesalónica dxeledábage' Pablo*

<sup>1</sup> Nadxa Pablo ne Silas guledé'e xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'. <sup>2</sup> Pablo guxíaje' xudau' na', na' ca dxúnqueze' bchálajlene' benne' ca' tu tu zra dxulupá'ane' du chunna da gazre zra. <sup>3</sup> Ca da naxúaj na lu xiche chee Dios, bzéajni'ine' le' ben na ba xen Cristo guzı guzaque', ne gutie', na' ca gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bénnea' dxuzenda' le'e chee', naque' Cristo, Bénnea' guchebe lazre' Dios sel-le'.

<sup>4</sup> Nadxa bal-la benne' judío ca' guléajle'e chee Jesús, ne gulaque' tuze Pablo ne Silas. La gázqueze guléajle benne' zan benne' griego, ne nu'ula zan zaj naque' nu'ula blau. <sup>5</sup> Benne' judío ca', benne' quebe dxeléajle'e chee Jesús gulaque' xa lazre' chee Pablo, na' buluchague' bal-la benne' ca' dxelune' da calela dxeledaze', ne bulutupa ljwezre', na' buluzúe' stebe ca naca benne' xezre. Gulu'e xadía lizre Jasón, dxelexılaje' Pablo ne Silas, chee xelebéaje' le', ne xuludé'e le' lu na' benne' xezre ca'. <sup>6</sup> Gate quebe belexezrelne' Pablo ne Silas lu xu'u na', nadxa beleché'e xadía Jasón ne xebal-la biche ljwézredxu ca' lau benne' xu'u lawe' ca' chee xezre, na' dxelebezre xe'e, dxelenné':

—Benne' ca', benne' ba belún zréajene' ca naca benne' zaj zře'e xezr la xu, cá'aqueze ba belelé'e nigá. <sup>7</sup> Jasón nigá ba gulu'e benne' ca' lizre'. Ca naca benne' ca' dxeledábage' da bdxixruj bea

César lawe' da dxelenné' zua xetú wenná bea, tu benne' le' Jesús.

<sup>8</sup> Gate belenne' da caní, na' benne' xezre ca', ne benne' xu'u lawe' ca' gulezúe' stēbe. <sup>9</sup> Jasón, ne biche ljwézredxu ca' bulucá'ane' dumí chee gulezí'e lataj, na' benne' xu'u lawe' ca' bulusane' le'.

### *Pablo ne Silas dxelezzine' xezre Berea*

<sup>10</sup> Nadxa biche ljwézredxu gulé'e Pablo ne Silas chee xesí'aque' chizrela, chee chjaque' xezre Berea. Gate belezzine' na', na' belú'e lu xudau' chee judío ca'. <sup>11</sup> Benne' judío caní zaj nácadxe' zren lazre' ca' benne' Tesalónica ca' lawe' da du lazre' gulezí'e dizra' chee Dios, na' tu zra tu zra dxululabe' lu xiche chee Dios chee xuluxúe' che naca da li da dxelé'e le'. <sup>12</sup> Ca'an guca, benne' zan benne' judío ca' guléajle'e chee Jesús, ne cá'aqueze benne' griego. Benne' zan guléajle'e, nu'ula blau ca', ne benne' biu ca'. <sup>13</sup> Gate benne' judío ca' zaj zre'e xezre Tesalónica guleque bé'ene' dxuchalaj Pablo dizra' chee Dios lu xezre Berea, na' belezzine' na', ne gulegú'u xel-le' bēneache chee xeledábague' Pablo ne Silas. <sup>14</sup> Biche ljwézredxu ca' la gulesél-la'te' Pablo chéaje' dxu'a nísadau', na' Silas ne Timoteo belexegá'ane' lu xezre Berea. <sup>15</sup> Benne' ca' zjácálene' Pablo beleché'e le' lu xezre Atenas. Nadxa benne' ca' belexezrine' lazrie', ne gulé'e Silas, ne Timoteo chjácazegue' naga zua Pablo.

### *Da dxun Pablo lu xezre Atenas*

<sup>16</sup> Dxácatē na' Pablo dxebeze' Silas ne Timoteo naga zue' lu xezre Atenas, na' guzúale'e stēbe gate blé'ene' ca' naca xezre na', ni' naze nítale'e bedáu'

xiaj. <sup>17</sup> Chee le na' bchálaje' lu xudau' chee judío ca' nen benne' judío ca', ne xezícala benne' ca' zjácáleñe' da naca chee Dios, na' tu zra tu zra bchálajlene' benne' ca' zaj zre'e lawe' xi'a. <sup>18</sup> Bal-la benne' zjácáleñe' ca naca da dxulusede benne' ca' zaj le' benne' epicureo, ne benne' estoico gulezú lawe' dxuluchálajlene' Pablo. Bal-le' gulenné':

—¿Bizra xega benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' chee dios zitu' ca'.

Ca'an gulenné' lawe' da dxuchalaj Pablo dizra' chawe' ca naca chee Jesús, ne ca naca chee xel-la' dxexebán. <sup>19</sup> Nadxa guleché'e Pablo lu lataj nazí le na Areópago, naga dxelezzrágaqueze' bi xuluzén ljwezre'. Na' buluchebe' Pablo:

—¿Waca guzénenu' netu' ca naca da cube nigá da dxusédenu' bénneache? <sup>20</sup> Lue' dxuchálaju' dizra' da quebe ne xénentu', na' dxaca lázrentu' nézentu' bi zéaje ca naca da caní.

<sup>21</sup> Caní gulenné' lawe' da dxuluzé nágaze, ne dxuluchálajze ca naca tu dizra' cube xúgute benne' Atenas, ne benne' zitu' ca' zaj zre'e xezre na'.

<sup>22</sup> Nadxa Pablo guzé' laduj benne' ca' zaj zre'e Areópago na', na' guzre' le':

—Le'e, benne' Atenas, ca naca xúgute da dx-elé'eda', dxulé'e na dxápale'ele ba lá'ana dios chee le ca', <sup>23</sup> lawe' da gate gudá' neda' gunná'a ca zaj naca xudau' ca' naga dxue lá'anale dios chee le ca', na' ble'eda' tu xudáudau' naga naxúaj dizra' caní: Chee Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', chee Dios na' dxuchálajlena' le'e.

24 'Naque' Dios na' bene' xezr la xu nigá, ne xúgute da de lawe na. Naque' Xrane xabáa, ne Xrane xezr la xu nigá. Quebe zue' xudau' da nun ni'a na' benneache. 25 Quebe nachínene' bi da gaca xelún benneache chee Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

26 'Tuze benne' bene' naque' xra xúgute cue' xezr la xu ca' chee che'e du gabí'i xezr la xu, na' blé'ene' zra, ne lataj naga dxal-la' xelezre'e, 27 chee xelexexílaje' Dios chee ájala xelexezrelne' Le' lácala quebe xelúnbea xánnie' Le', san da li Dios quebe zue' zitu' naga zua tu tudxu dxi'u. 28 Ne chee Dios nigá naca bandxu, ne dxedadxu, ne zradxu. Naca ca gulenná bal-la benne' wila cheele, gulenné': "Nácadxu xrtia Dios." 29 Che nácadxu xrtia Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun benneache cáteze dxululaba lázrequeze'. 30 Dios bzue' chalá'ala da belún benneache ca ni'te lu xel-la' quebe zaj neze chee', san na'a dxenná bé'ene' xúgute benne' gáteteze zaj zre'e xelexebí'i lazre'. 31 Dios ba nuzúe' tu zra gate guchi'e chee xúgute benneache lu da xrlátaje chee' lu na' tu benne' ba gucá'a Le', na' chee da nigá bzue' tu da dxunna bea na gate bsebane' bennea' ládujla benne' gate.

32 Gate benne' ca' belenne' dizra' nigá ca naca chee tu benne' bebane' ládujla benne' gate, na' bal-le' belún le' chee', ne xebal-le' gulenné':

—Waca guchálajlenu' netu' ca naca da nigá xetu' zra.

33 Nadxa Pablo bezé'e naga zaj zra' benne' ca'.

34 Bal-la benne' ca' guléajle'e chee Jesús, na' gu-



laque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

## 18

### *Pablo dxezrine' xezre Corinto*

<sup>1</sup> Gudé na' bezá' Pablo xezre Atenas, bexíaje' xezre Corinto. <sup>2</sup> Lu xezre na' xeajxraque' tu benne' judío le' Aquilo, naque' benne' nababe' tu xezre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besiá'que' xezr la xu Italia lawe' da gunná bea César Claudio xelexedxúaj xúgute benne' judío ca' xezre Roma. Pablo guxíaje' xeajnné'e Aquilo ne Priscila, <sup>3</sup> na' lawe' da tuze ca naca zrin da dxelún Pablo ne Aquilo, dxelune' xu'u xide zra be xixre' da dxelútie' chee benne' dxjaca wedil-la, na' begá'ana Pablo nen benne' caní chee xelune' tu zren zrin. <sup>4</sup> Tu zra tu zra gate naca zra dxulupá'ana judío ca', Pablo zéaje' lu xudáudau' chee judío ca' naga bchálaje', ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bénnea' guchebe lazre' Dios sel-le'.

<sup>5</sup> Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' chee Dios, ne dxulé'ene' benne' judío ca' da li Jesús naque' Cristo, bénnea' nase-la Dios, bénnea' dxelebeza judío ca'. <sup>6</sup> Benne' judío ca' gulezú lawe' dxeledábague' Pablo, ne dxelenné' schanni' chee'. Nadxa Pablo guzribe' gabán chee' da dxulé'e na dxebéaj xíchaje' benne' ca', dxenné':

—Le'e nabágale chee xel-la' gute chee benne'du xu'ule. Québedxa nabaga' neda' chee na lawe' da ba bzenda' le'e dizra' chawe' chee Cristo. Ná'atela guchálajlena' benne' quebe zaj naque' judío.

<sup>7</sup> Bezé'e lu xudáudau' na', na' bezrine' lizre tu benne' le' Justo, benne' dxucá'ana szrene' Dios ne zua lizre' cuita xudáudau' chee judío ca'. <sup>8</sup> Na' Crispo, benne' xíchaje chee xudáudau' chee judío ca', ne ca naca benne' zaj zre'e lizre' guléajle'e chee Xránadxu. Cá'anqueze benne' zan benne' Corinto, gate belenne' dizra' chee Dios, guléajle'e ne guledxúe' nisa. <sup>9</sup> Nadxa Xránadxu ble'e lawe' Pablo tu zre' tu lu da ble'e Dios le', ne guzre' le':

—Quebe zrebu'. Bchálajteze, ne quebe sua zriu'. <sup>10</sup> Neda' zúalena' lue', na' quebe nu seque' bi gune lue' lawe' da zaj zrále'e benne' zaj naque' chia' lu xezre nigá.

<sup>11</sup> Ca'an guca, begá'ana Pablo tu iza xugachaj lu xezre Corinto, dxusédenē' benne' ca' dizra' chee Dios.

<sup>12</sup> Lu zra ca' gate naca Galión benne' xu'u lu ne'e xezr la xu na' naga nababa Acaya, waláz chee Roma, na' benne' judío ca' guledábague' Pablo. Belechē'e le' xu'u lawe', <sup>13</sup> ne gulé'e benne' xu'u lu ne'e xezr la xu na':

—Benne' nigá dxedé' dxegú'u xel-le' bēneache chee xelúe lá'ane' Dios, ne xelune' tu da dxedábaga da nadxixruj bea cheentu'.

<sup>14</sup> Pablo ba zue' guchálaje' gate Galión guzre' benne' judío ca':

—Chela naca na chee tu da dxuzúa chalá'ala da bdxixruj bea César u chee tu da zrinnaj zren, na' gun na ba xen xenda' ca da dxennale le'e, benne'

judío. <sup>15</sup> Lawe' da naca na chee dízra'ze, ne chee la tu benne', ne chee da nadxixruj bea na cheézele, le gucá'ana chawe' na lé'equeze, lawe' da quebe dxaca lazra' neda' guchi'e da dxaca chee da ca'.

<sup>16</sup> Nadxa bebéaje' benne' ca' lu xu'u lawe' na'.

<sup>17</sup> Nadxa xúgute benne' griego gulel-le' Sóstenes, benne' xíchaje chee xudáudau' chee judío ca', ne belú'e le' lau benne' xu'u lu ne'e xezr la xu na', le' Galión. Galión na' quebe be' lazre'e chee da na'.

*Pablo dxezrine' xezre Antioquía, na' dxezú lawe' zéaje' da guxunne' lasa zéaje' wen zrin chee Cristo*

<sup>18</sup> Pablo begá'ane' xezre na' xezane' zra. Gudé na' bze' biche ljwézredxu ca' dizra', na' guxú'e tu lu da dxedá lawe' nísadau' zéaje' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'e lu da dxedá lawe' nísadau', Pablo bzuate' xídeze xíchaje', da dxunna bea na zua tu da nachebe lazre' guné' lau Dios. <sup>19</sup> Gate belezrine' lu xezre Efeso, Pablo bsane' Priscila ne Aquilo, na' guxíaje' lu xudáudau' chee judío ca', ne bchálajlene' judío ca' zaj nazrage' na'. <sup>20</sup> Benne' ca' gulata' xuene' le' xegá'anadxé' xetú chi'i, na' le' quebe guca lazre'. <sup>21</sup> Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'e lu da dxedá lawe' nísadau', ne bezé'e Efeso na'. <sup>22</sup> Gate bezrine' xezre Cesarea, Pablo guxíaje' Jerusalén xeajape' diuzre benne' ca' dx-eléajle'e chee Jesús, na' gudé na' guxíaje' xezre Antioquía. <sup>23</sup> Ca gudé guzú'e na' tu chi'i, na' bezé'e

na', gudé' tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajle'e chee Jesús.

*Apolos dxuchálaje' dizra' chee Dios lu xezre Efeso*

<sup>24</sup> Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandría, lu xu Egipto. Naque' tu benne' nupá'ale'e xrtizre', ne núnbeale'e da naxúaj na lu xiche chee Dios. <sup>25</sup> Naxéajni'ilé'ene' ca naca chee Xránadxu, ne dute lázrdawe' dxuchálaje', dxusédene' cáteze naca chee Jesús, lácala dxusédezene' xel-la' dxuchúa nisa ca ben Juan. <sup>26</sup> Apolos guzú lawe' dxusédene' benne' ca' zaj zre'e xudáudau' chee judío ca' du lazre'. Gate belén Priscila, ne Aquilo chee', na' guleché'e le' chalá'ala, ne buluzéajni'idxene' le' cáteze naca dizra' chee Dios. <sup>27</sup> Ca gudé na', gate guca lazre' Apolos chéaje' naga nababa Acaya, bi bíchedxu ca' bulutipe' lazre', ne buluzuaje' tu xiche chee benne' ca' dxeléajle'e chee Jesús zaj zre'e xezre ca' zaj nababa Acaya na' chee xelezí' lu ne'e Apolos na'. Gate bzin le' naga nababa Acaya, gúcalele'ene' benne' ca', na' Dios be'e le' lataj guléajle'e chee Jesús. <sup>28</sup> Apolos blé'ene' lau xúgute benne' ca' ca dxeleque zréaje benne' judío ca', ne blé'ene' ne chee da naxúaj na lu xiche chee Dios Jesús naque' Cristo, Bénnea' nasel-la Dios, Bénnea' dxelebeza judío ca'.

## 19

*Pablo dxezrine' xezre Efeso*

<sup>1</sup> Dxácate zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine'

lu xezre Efeso naga xeajxraque' bal-la benne' dx-eléajle'e chee Jesús. <sup>2</sup> Na' bchebe' benne' ca':

—¿Guzi'le le'e Be' Lá'azxa gate guxéajle'e?

Belexechebe':

—Ne quebe xénetu' che zua Be' Lá'azxa.

<sup>3</sup> Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca ben Juan.

<sup>4</sup> Na' gunná Pablo, guzre' benne' ca':

—Awe', Juan bchue' nisa benne' ca' belexebí'i lazre', san guzre' benne' ca' dxal-la' xeléajle'e chee Bénnea' xide' ca te chee le', da zéaje na, chee Jesús, Bénnea' naque' Cristo, nase-la Dios.

<sup>5</sup> Gate belenne' da nigá, na' beledxúe' nisa lu La Xránadxu Jesús. <sup>6</sup> Gate bze' na' Pablo benne' ca', na' guzúale Be' Lá'azxa le', na' gulenné' dizra' chee benne' zitu' da quebe bulusede', ne buluchálaje' waláz chee Dios. <sup>7</sup> Benne' caní zaj naca chazrínne'.

<sup>8</sup> Lawe' chunna beu' dxeaj Pablo lu xu'u ca' naga buluzraga judío ca' naga bchálajlene' benne' ca' dizra' chee Dios, ne blé'ene' benne' ca' naca da li da dxuchálaje' ca naca xel-la' dxenná bea chee Dios.

<sup>9</sup> Bal-le' belún zide' lázrdawe', ne quebe gulaca lazre' xeléajle'e chee Jesús, na' gulenné' schanni' chee dizra' chawe' ca naca chee Jesús lávela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxeléajle'e chee Jesús lu xu'u ga dxusede tu benne' le' Tiranno, na' lu xu'u na' bchálajlene' benne' ca' tu zra tu zra. <sup>10</sup> Ca' bene' lawe' chupa iza, na' ca'an guca xúgute benne' zaj zre'e xezre ca' zaj nababa Asia belenne' dizra' chee

Xránadxu Jesús, benne' judío ca', ne benne' quebe zaj naque' judío. <sup>11</sup> Dios bene' xel-la' waca zri'a ca' lu na' Pablo lu zra ca'. <sup>12</sup> Ca'an guca, gulequé'e ladxe' ca' da dxuchéaj xichaj Pablo, ne ladxe' ca' da bde'e lachu'e, na' belú'e na naga zaj de benne' we' ca', na' benne' caní belexexaque' ca naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

<sup>13</sup> Bal-la benne' judío ca', benne' dxeledé' dx-elexebéaje' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelexebéaje' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

<sup>14</sup> Caní belún gazre benne' zaj naque' zri'ine tu benne' judío le' Esceva, naque' tu benne' xíchaje chee bxruze ca'. <sup>15</sup> Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

<sup>16</sup> Gate gunná na da nigá, na' benne' biu na' xu'e be' xriwe' na', guxritie' guzría che'e benne' ca', na' dute xel-la' wal-la chee' bucule' xúgute benne' ca', na' bé'le'e benne' ca' cadxa buluzrúnnuje' lu xu'u na' gala' xídeze, ne dxelaque' dxen. <sup>17</sup> Xúgute benne' zaj zre'e xezre Efeso, benne' judío ca', ne benne' quebe zaj naque' judío, belenne' ca guca da nigá, na' chee le' na' belezrébele'e, ne bulucá'ana szrene' La Xránadxu Jesús.

<sup>18</sup> Cá'unqueze benne' zan lówela benne' ca' dxeléajle'e chee Jesús belelé'e dxelxrúalepe' da calēla da belune', <sup>19</sup> na' benne' zan, benne'

belúne' xel-la' wazrá', zaj nu'e xiche chee wazrá', na' buluzezxe' na lau xúgute benne' ca'. Gate bululabe' ca gulezaca xiche ca', na' gulénézene' gulezaca na ca gazxu gaxúa cue' tu gaxúa dumí plata. <sup>20</sup> Ca'an guca, guxíaj bzriluj dizra' chee Xránadxu, ne ble'e na xel-la' waca chee na.

<sup>21</sup> Gudé na' Pablo guca lazre' té'e xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca te chéaje' Jerusalén, na' dxal-la' cheajte' xezre Roma. <sup>22</sup> Nadxa gusel-le' chupa benne' dxelácale le', Timoteo ne Erasto, naga nababa Macedonia, dxácaté begá'ana le' xetú chí'i naga nababa Asia.

### *Benne' xezre Efeso dxeledábage' Pablo*

<sup>23</sup> Ca lu zra na' benne' zan guledábage' dizra' chawe' ca naca chee Jesús, <sup>24</sup> da na' guca na ne chee tu benne' le' Demetrio, benne' gubizre plata. Benne' nigá dxune' níchudu ca' da zaj naca plata ca xudau' chee dios nu'ula le' Diana, na' benne' ca' dxelúnlene' le' zrin nigá dxelezí'le'e dumí. <sup>25</sup> Demetrio na' bchague' benne' caní tu zren nen xezica benne' dxelune' zrin caní, na' guzre' benne' ca':

—Le'e, benne', nézquezle lu zrin nigá dxaca cheedxu da cháwele'e, <sup>26</sup> na' ca dxelé'equezle le'e ne dxenle, Pablo nigá dxedé' dxenné' dios ca' da zaj nun bèneache quebe zaj naca na dios, na' caní ba bsédené' benne' zan, quegá Efeso nigáze, san du ca nababa Asia. <sup>27</sup> Da nigá nácale'e na stebe cheedxu, lawe' da ca naca zrin cheedxu nigá nazruzre cuía xi na, ne la gaze xudau' chee dios nu'ula Diana nazruzre nite xel-la' nuzé chee na,

na' caní xegá'ana ditaj ca naca xel-la' szren chee dios nu'ula, bénnea' dxelúe lá'ana ca naca benne' zaj zře'ę ga nababa Asia, ne du ca naca bénneache zaj zře'ę xęzr la xu.

<sup>28</sup> Gate belenne' da nigá, na' belezrá'alę'ę benne' ca', ne gulebezre xę'ę, dxelenné':

—¡Ga'ana szren Diana, dios cheędxu, benne' Efeso!

<sup>29</sup> Na' ca naca benne' zaj zře'ę xęzre na' guleque zrąjane'. Gulele' Gayo, ne Aristarco, benne' Macedonia dxeledále'ę Pablo, na' gulezrube xue' benne' caní chale'aj xu'u lawe'. <sup>30</sup> Pablo guca lazře' chu'ę na' chee guchálajle'ę benne' ca', san bi bíchedxu ca' quebe gulegú'ę le' lataj. <sup>31</sup> Cá'anqueze bal-la benne' xu'u lawe' chee xęzre ca' zaj nababa Asia gulesel-le' benne' xeajęzře' Pablo quebe dxal-la' chu'ę na'. <sup>32</sup> Dxácatę na', naga zaj nazraga benne' ca', bal-le' gulebezre xę'ę, tu da dxelenné', na' xebal-le' dxelebezre xę'ę, dxelenné' da xula, lawe' da beledxé'ena zraga benne' zan, na' benne' zante quebe zaj nézene' bizr chee na' zaj nazrague' na'. <sup>33</sup> Nadxa benne' judío ca' buluzúe' Alejandro lau benne' ca' chee guzėjni'ine' le' ca naca da nigá, na' le' guchisa ne'ę chee xelezúa zri benne' ca' lawe' da guca lazře' guchálajle'ę benne' zan ca' da gácale na judío ca'. <sup>34</sup> Gate benne' zan ca' guleque bé'ene' naque' benne' judío, na' gulebezre xa'a xúgute' ca chupa hora, dxelenné':

—¡Ga'ana szren Diana, dios cheędxu, benne' Efeso!

<sup>35</sup> Nadxa benne' dxuzúaje' ne chee xęzre na', gate ba bzua zrie' benne' zan ca', gunné':



—Le'e, benne' Efeso. Ca naca bénneache zaj zra' xezr la xu nigá zaj nézene' benne' zaj zre'e xezre Efeso nigá zaj nabague' xuluxúe' xudau' chee dios nu'ula Diana, ne bedáu' chee' da bexruj na zran xabáa. <sup>36</sup> Quebe nu seque' tábaga' da nigá. Chee le na' le sua zrize, ne quebe bi gunle da quebe ne guxúe xánnele. <sup>37</sup> Benne' caní nache'le nigá quebe bi da calela ne xelune', ne quebe bi schanni' ne xelenné' chee dios nu'ula cheele. <sup>38</sup> Che Demetrio, ne benne' ca' dxelune' zrin nen le' dxelaca lazre' xelagu zria chee tu benne', zaj zra' benne' dxuluchi'e da dxaca, ne zaj zua xu'u lawe' ca' naga gaca xelawe' zría chee benne' ca'. <sup>39</sup> Na' che le'e bi xetú da nábale, dxal-la' nábale na naga zaj nazraga benne' xu'u lawe' ca' dxenná bea da bdxixruj bea César. <sup>40</sup> Na'a zúadxu stebe ga gaze nu gagu zria cheedxu ca naca da bendxu, xelenné' dxedábagadxu xu'u lawe' lawe' da quebe seque' bi xechébedxu che nu gagu zria dxi'u ne chee da guca na'a.

<sup>41</sup> Ca gudé gunné' da nigá, na' bze' benne' zan ca' dizra'.

## 20

### *Pablo dxedé' ga nababa Macedonia ne Grecia*

<sup>1</sup> Gate gudé guca da stebe na' lu xezre Efeso, na' Pablo btupe' benne' ca' dxeléajle'e chee Jesús chee guzéajni'ine' le'. Nadxa bze' benne' ca' dizra', ne bnide' le', na' guzé'e zéaje' xezre ca' zaj nababa Macedonia. <sup>2</sup> Xeajné'e bíchedxu ca' zaj zre'e xúgute xézredu ca', ne btípale'e lazre' benne' ca' ne chee dizra' da bchálajlene' le'. Ca gudé na' bezrine' naga nababa Grecia. <sup>3</sup> Begá'ane' na' chunna beu',

na' gudé na' gate ba zuate' chu'e tu lu da dxedá lawe' nísadau' chéaje' xezre ca' zaj nababa Siria, guque bé'ene' ba zaj nun judío ca' ca da xelune' chee'. Chee le na' gulú'u bi'e xezé'e ni'e téé' naga nababa Macedonia. <sup>4</sup> Belún le' tuze Sópater, benne' xezre Berea, ne Aristarco, ne Segundo, benne' xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia. <sup>5</sup> Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas. <sup>6</sup> Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xejzrentu' bi bíchedxu ca' lu xezre Troas, naga guzúantu' gazre zra.

### *Da ben Pablo lu xezre Troas*

<sup>7</sup> Zra nedxu chee da gazre zra bezrágantu' chee gáguntu' da dxusá lázredxu ca guca gate gute Xránadxu, na' Pablo bsédene' bi bíchedxu ca'. Ben na ba xen xeza'ntu' zra xula, na' chee le na' bchálajqueze Pablo cadxa bzrinte dxela. <sup>8</sup> Nazrágantu' tu xu'u da zua chunna cuía sibe, na' zaj zéle'e xi' da dxulusení na. <sup>9</sup> Tu bi cuide' zríabe' ga dxu'u lení', na' gate Pablo bsetúnnadxe' xrtizre', na' guca wásele'e bi cuide' na', na' naga xejchete na, na' dxásetebe' gubíxrebe' chunna cuía sibe, na' xejlechise'-be' ba nátebe'. <sup>10</sup> Nadxa betaj Pablo, na' gulégüe' bequé'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

<sup>11</sup> Nadxa Pablo begüéne' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje' cadxa guxaní'te. Zra na' bezé'e na'. <sup>12</sup> Nadxa bíchedxu ca' belexeché'e bi na' gubíxrebe' ba bexaca banbe', na' xúgute' gulezúe' lu xel-la' dxeleznén lazre'.

*Pablo dxexeze'e xezre Troas xezrine' xezre Mileto*

<sup>13</sup> Netu' guzría launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrágantu' Pablo ca ba nun le' lawe' da guca lazre' zéaje' ní'aze'. <sup>14</sup> Gate bezrágantu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mitilene. <sup>15</sup> Beza'ntu' na', na' zra xula bedentu' le nna' xezre Quío, na' xetú zra, zra xula bezrintu' lu xezre Samos. Na' guzúantu' xezre Trogilio naga bezí' lázrentu', na' zra xula bzrintu' xezre Mileto. <sup>16</sup> Ca' bentu' chee quebe guzré'tecantu' naga nababa Asia. Chee le na' Pablo quebe guca lazre' chéaje' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

*Pablo dxuchálajlene' benne' gula dxeléajle'e chee Jesús, benne' zaj zre'e Efeso*

<sup>17</sup> Ca zrantu' lu xezre Mileto, Pablo gusel-le' tu benne' cheajnné' benne' gula ca' dxeléajle'e chee Jesús zaj zre'e xezre Efeso. <sup>18</sup> Gate belelá' benne' ca', Pablo guzre' le':

—Le'e nézquezle ca bēna' neda' xúgute zra ca gudé bla'a ga nababa Asia. <sup>19</sup> Xúgute zra guzúa' lówela le'e dxuna' zrin chee Xránadxu dute xel-la' dxexruj lazre', ne zane' lasa gudxezra', na' gudéa'

lu zane' da guzaca' ca naca da gulaca lazre' benne' judío ca' xelune' chia'. <sup>20</sup> Bchálajl̄ena' le'e xúgute da naca na xrlátaje, ne bsédeda' le'e lówela benne' zan, ne lízrquezle. <sup>21</sup> Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebí'i lazre' lau Dios, ne xeléajl̄e' chee Xránadxu Jesucristo. <sup>22</sup> Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'. <sup>23</sup> Tuze da nezda', lu xúgute xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'. <sup>24</sup> Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajl̄ena' ca naca da dxuna', ne chee gu-sexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

<sup>25</sup> 'Nézquezda' netule le'e, ba bchálajl̄ena' le'e ca dxenná bea Dios, québedxa lé'ele neda'. <sup>26</sup> Chee l̄e na', dxaca lazra' xapa' le'e na'a, quebe nabaga' zria ne chee tule le'e, <sup>27</sup> lawe' da ba bzenda' le'e ca naca da dxaca lazre' Dios guné', ne quebe bi bcá'ana' da quebe bzéajni'ida' le'e. <sup>28</sup> Chee l̄e na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúe' le'e ládujla l̄e chee chu'u lu na'le guxuele benne' ca' zaj nazrague' chee Xránadxu, benne' ca' naxá'awene' nen dxen cheéqueze'. <sup>29</sup> Nezda' gate xezá'a neda' xeledá' bal-la benne' xelaca lazre' guzrí'a xi'e benne' zaj nazraga chee Xránadxu ca dxelún becu' xi'a, be snia ca' dxuluzrí'a xiba' zrila' ca'. <sup>30</sup> Ládujla le'e weledá' bal-la benne' xulusédene' da wen lazre', ne quegá da li, chee chjácál̄e benne' ca' dxeléajl̄e

chee Jesús le'. <sup>31</sup> Chee le na', le guxúe cuínale. Le gusá' lázrele ca bēna' chun iza, te zra ne chizrela quebe bsana' b'zējāni'ida' le'e tu tule le'e, ne gudxézreteā'.

<sup>32</sup> 'Na'a, biche ljwezra', dxuzúā' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúā na le'e lāwela xúgute benne' ca' ba guleaj Dios cheéqueze'. <sup>33</sup> Quebe guca lazra' neda' si'a chia' dumí ne zra lana nu benne'. <sup>34</sup> Nézquezle le'e ca bēna', bēna' zrin nen ni'a ná'queza' chee guta' da guchíneda' neda', ne da gulechinne benne' ca' gulaque' neda' tuze. <sup>35</sup> Blé'equezda' le'e, ca'an dxal-la' gunle zrin chee séquele gácalele benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunezruj, quézcala chee benne' si' lu ne'e."

<sup>36</sup> Ca gudé gunná Pablo da nigá, na' bzu zribe', ne bchálajlene' Dios nen xúgute benne' ca'. <sup>37</sup> Xúgute' gulebezre', na' bulunide', ne bulunupe' Pablo. <sup>38</sup> Belexewí'inele'ene' lawe' da guzre' le' québedxa xeledé'ene' le'. Na' xjácālene' le' naga bexu'e lu da dxedá lawe' nísadau'.

## 21

### *Pablo dxezrine' xezre Jerusalén*

<sup>1</sup> Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajteczentu' naga dxē xezre Cos, na' zra xula gudentu' naga dxē xezre Rodas, na' gudé na' bzrintu' xezre Pátara. <sup>2</sup> Lu xezre Pátara xeajxrácantu' tu da dxedá lawe' nísadau' da zeaj na naga nababa

Fenicia. Na' guxu'untu' lu da dxedá lawe' nísadau' nigá, na' beza'ntu' na'. <sup>3</sup> Gate gudentu' naga dxe' xezr la xu Chipre, blé'entu' na chala'a xéglala, na' bexíajteczentu', bzrintu' lu xezre ca' zaj nababa Siria. Lu xezre Tiro ben na ba xen xuluxulétaje' xua' da nua da dxedá lawe' nísadau' na', na' chee le' na' bzrintu' na'. <sup>4</sup> Na' bezrágantu' benne' ca' dx-eléajle'ē chee Jesús, benne' zaj zre'ē xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'ē Pablo quebe dxal-la' chéajē' Jerusalén. <sup>5</sup> Gate gudé guca gazre zra ca', na' zua xeza'ntu' na'. Xúgute benne' ca' dxeléajle'ē chee Xránadxu, ne zru'ule' ca', ne bidu chee' ca' gusá'acaleñe' netu' bedxúajtentu' xezre na', na' dxu'a nísadau' na' bzu zríbentu' bchálajlentu' Dios. <sup>6</sup> Nadxa bze ljwézrentu' dizra', ne bnídate ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belex-ezrine' lizre'.

<sup>7</sup> Beza'ntu' Tiro, gudentu' lu nísadau', ne bzrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. <sup>8</sup> Zra xula Pablo, ne netu' zralentu' le' bezá'ntu' na', na' bzrintu' xezre Cesarea. Na' bzrintu' lizre Felipe, benne' dxedá dxuchálaje' dizra' chee Dios. Naque' tu benne' gazre, benne' ca' buluzúa gubáz ca' xelune' zrin chee Jesús. Begá'anantu' nen benne' nigá. <sup>9</sup> Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz chee Dios. <sup>10</sup> Guzúantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálaje' waláz chee Dios. <sup>11</sup> Agabo na' bide' bedajnné'ē

netu'. Guqué'e bazxu dxu'a le'e chee Pablo, na' bchéaje' na ni'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

<sup>12</sup> Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén.

<sup>13</sup> Pablo bechebe':

—¿Bizr chee na' dxebézrele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéaje' neda', san la gázqueze zua' chee gatia' lu xezre Jerusalén ne chee Xránadxu Jesús.

<sup>14</sup> Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

<sup>15</sup> Gudé na' bsení'antu' cheentu', na' guxíajntu' Jerusalén. <sup>16</sup> Na' gusiá'acale bal-la benne' netu', benne' Cesarea dxeléajle'e chee Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajle'e chee Jesús, na' lizre benne' nigá dxal-la' zrintu' súantu'.

### *Pablo zeajnné'e Jacobo*

<sup>17</sup> Gate bzrintu' Jerusalén, bi bíchedxu ca' belezí' lu ne'e netu' duté xel-la' dxelebé. <sup>18</sup> Zra xula Pablo guxíajlene' netu' xeajnná'ntu' Jacobo, na' zaj zrá'queze na' xúgute benne' gula ca' dxeléajle'e chee Jesús. <sup>19</sup> Pablo bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío. <sup>20</sup> Gate belenne' ca', na' belúe lá'ane' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajle'e chee Jesús,

na' xúgute' dxelenné' dxun na ba xen chéajl̥dxu da bdxixruj bea Moisés. <sup>21</sup> Zaj zra' benne' ba gulé'ē benne' judío caní lue' dxusédenu' xúgute' benne' judío zaj zre'ē zitu' québedxa xelunē' ca da gunná be'e Moisés, ne quebe xelechugue' late' béla'dau' chee bel-la' dxen chee bidu biu chee' ca', ne quebe chjácālēnē' ca naca da zéajl̥dxu dxi'u dxundxu. <sup>22</sup> ¿Ájala dxal-la' gundxu? Benne' judío caní welezrague' gate xelennē' ba bla'u. <sup>23</sup> Cháwedxa gunu' da caní: Zaj zra' tapa benne' láwela dxi'u dxal-la' xelunē' tu da zaj nachēbe lazre' lau Dios. <sup>24</sup> Guché benne' caní chjácālēnē' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xicha xichaj benne' caní. Ca'an gaca, xúgute' benne' xeleque bé'enē' quebe naca da li ca da gulenné' chiu', san la gázqueze lue' dxunu' xúgute' ca da dxenná da nadxixruj bea na. <sup>25</sup> Ca naca chee' benne' ca' quebe zaj naque' judío, ba bzúajntu' chee' quebe dxun na ba xen xelunē' da caní, san tuze dxal-la' xulusanē' da naca chee' bedáu' xiaj xaga ca', ne quebe xelawe' dxen chee' bē xixre' ca', ne quebe xelawe' bēla' chee' bē xixre', bē quebe bdxuaj dxen, ne quebe xelunē' dul-la chee' da dxucá'ana sban bēnneache.

### *Dxelele' Pablo lu xudau'*

<sup>26</sup> Nadxa Pablo guché'ē tapa benne' ca', na' zra xula bca'ana chawe' cuine' lau Dios nen benne' ca', na' belexú'ē lu xudau' chee' buluzennē' bxruze ca' gate xexuzre zra ca' chee' da dxulucá'ana chawe' cuine' lau Dios, gate na' tu tue' dxal-la' xelegú'e guna'.



<sup>27</sup> Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. <sup>28</sup> Dxelenné' zizraj:

—Benne' Israel, le gácalę netu'. Benne' nigá dxedé' gáteteze dxusédené' xúgute bénneache xuluzúe' chalá'ala xezr la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxcá'ana dítaje' lataj lá'azxa nigá.

<sup>29</sup> Caní gulenné' lawe' da ba belelé'ene' Pablo lu xezre na' nen Trófimo, tu benne' xezre Efeso, na' dxeléquene' gulú'u Pablo le' lu xudau'.

<sup>30</sup> Ca naca benne' zaj zre'e xezre na' beledxé'ena zrague', ne zá'aca chégüe'. Nadxa gulel-le' Pablo, ne gulezrube xue' le' chale'aj xudau' na', na' bulusézxuje' dxa xu'u chee na. <sup>31</sup> Ba zuate xelútie' Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén. <sup>32</sup> Nadxa benne' nigá bchague' benne' dxjaque' wedil-la nen benne' dxenná bé'ene' le', na' xjaca chégüe' naga zaj nazraga benne' zan ca'. Gate benne' ca' belelé'ene' benne' na' dxenná be'e lu wedil-la, na' bulusane' québedxa buluzálaje' Pablo. <sup>33</sup> Nadxa gubiga' benne' na' dxenná be'e lu wedil-la, na' gudel-le' Pablo, ne gunná bé'ene' xuluchéaje' le' chupa du xia. Gudé na' bchebe' benne' ca' nua' benne' nigá, ne bi ba bene'. <sup>34</sup> Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xelech'e Pablo xu'u naga

zaj zra' benne' dxjaque' wedil-la, benne' zan ca'.  
<sup>35</sup> Gate belezrine' dxa xu'u naga zaj zra' benne'  
 dxjaque' wedil-la, na' benne' dxjaque' wedil-la  
 belexú'e Pablo lu na'ze' lawe' da dxelúe'e benne'  
 zan ca' Pablo, <sup>36</sup> na' xúgute' zá'aque' cuzre na' dxe-  
 lenné' zizraj:

—Gate bēnea'.

*Pablo dxexechebe' lau benne' zan ca'*

<sup>37</sup> Gate dxelegú'e Pablo lu xu'u naga zaj zra'  
 benne' dxjaque' wedil-la, le' guzre' benne' na'  
 dxenná bé'ene' le':

—¿Waca bi nnia'?

Na' bchebe bēnea' le':

—¿Waca nneu' dizra' griego? <sup>38</sup> ¿Quebe nacu'  
 lue' benne' Egipto na' ba zeaj tu chupa iza btupe'  
 benne' ca' guledábague' xu'u lawe', na' guché'e  
 tapa gaxúa benne' dxelutie' benne', xeajzré'e le'  
 le'e xixre' lawe' lataj?

<sup>39</sup> Nadxa Pablo guzre' benne' na':

—Neda' naca' benne' judío, ne nababa' tu xezre  
 blau chee ga nababa Cilicia. Ben culuén gunu'  
 neda' lataj guchálajlena' benne' zan caní.

<sup>40</sup> Benne' na' be'e le' lataj, na' Pablo guzé' lachila  
 chee xu'u na', na' guchisa ne'e chee xelezúa zri  
 benne' zan ca'. Gate gudxé' zri, na' bchálajlene' le'  
 dizra' hebreo, dxenné':

## 22

<sup>1</sup> —Le'e, benne' gula, ne le'e, bi bicha', le xen ca'  
 da xapa' le'e da dxexecheba' chee.

<sup>2</sup> Gate belenne' dxuchálajle Pablo le' dizra' he-  
 breo, na' gulezúadxé' zrize, na' Pablo guzre' le':

3 —Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédenē' neda' cáteze naca da nadxiruj bea na chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a. <sup>4</sup> Nédxute gudáu zi' xuzra' benne' ca' dxeléajle'e chee Jesús, ne bétequeza' bal-le', ne guche'a benne' biu, ne nu'ula chee, na' bzra'a le' lizre xia. <sup>5</sup> Bxruze blau, ne xúgute benne' gula sina waca xelexechébequeze' belunne' neda' xiche chee bi'a na lau bi bíchedxu judío ca' zaj zre'e xezre Damasco. Guxá'a na' xeajxedilja' naga zaj zra' benne' ca' dxeléajle'e chee Jesús chee che'a benne' ca' Jerusalén nigá, chee xeledée' ba xa'.

<sup>6</sup> 'Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. <sup>7</sup> Na' xeajchazia' lu xu, ne benda' chi'i tu benne' guzre' neda': "Saulo, Saulo, ¿bizr chee na' nau zi' xuzru' neda'?" <sup>8</sup> Nadxa bcheba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bénnea' nau zi' xuzru' lue'." <sup>9</sup> Benne' ca' zrálene' neda' belelé'ene' xi' na', ne belezrebe', san quebe belenne' chi'i bénnea' gunné' neda'. <sup>10</sup> Nadxa gunnéa': ¿Bi dxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xelé'e lue' ca da dxal-la' gunu'." <sup>11</sup> Benne' ca' zjácálene' neda' belequé'e na'a zeajntu' Damasco lawe' da bca'ana xi' na' neda' la chul-la.

<sup>12</sup> 'Zua na' tu benne' le' Ananías, benne' dxunē' du lazre' ca naca da bdxiruj be'e Moisés, na' xúgute benne' judío zaj zre'e Damasco dxelenné' cháwele'e ca dxunē'. <sup>13</sup> Ananías na' ble'e naga

zua' neda', na' guzre' neda': "Bicha' Saulo, na'a xe'le'enu'." Lu zra ná'queze belé'etēda', ne ble'eda' benne' na'. <sup>14</sup> Nadxa guzre' neda': "Dios chee xra xrtáudxu guqué'e lue' nédxute chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bénnea'. <sup>15</sup> Lue' guchálaju' da naca chee Le' lau ca naca bēneache zaj zre'e lu xezr la xu, ne guzennu' benne' ca' ca naca da blé'enu', ne da bennu'. <sup>16</sup> Na'a, ¿bizr chee na' dxezrenu'? Guxasa, gudxúa nisa, ne bxren lazre' chee Xránu' Dios chee cuee' dul-la chiu'."

<sup>17</sup> 'Gate bezrina' Jerusalén, guxá'a lu xudau' xeajchálajlena' Dios, na' ble'eda' tu da ble'e Dios neda'. <sup>18</sup> Ble'eda' Xránadxu, na' guzre' neda': "Bdx-uajche Jerusalén nigá lawe' da quebe xelezí'e ca naca da guchálaju' chia'." <sup>19</sup> Nadxa gucha' Le': Xran, zaj nézquezne' guxá'a neda' xúgutē xu'u naga dxelezraga judío ca', ne xeajxri'a benne' ca' dx-eléajle'e chiu', na' bzra'a le' lizre xia, ne bzálajqueza' benne' ca', <sup>20</sup> na' gate belútie' Esteban, benne' wen zrin chiu', na' zéqueza' neda' naca' tuze nen benne' ca' belútie' le'. <sup>21</sup> Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

*Da ben benne' dxenná be'e lu wedil-la*

<sup>22</sup> Dizra' caní belenne', san lu dizra' nigá gulezú lawe' dxelebezre xe'e, dxelenné':

—¡Gate benne' nigá! ¡Québedxa dxal-la' gaca bané'!

<sup>23</sup> Na' gulebezre xá'aqueze', ne buluzale' sibe zra lané', ne belequé'e bxrte xu da buluzale' sibe.

<sup>24</sup> Chee le' na' benne' na' dxenná be'e lu wedil-la

gunná bé'enē' xelegú'ē Pablo lu xu'ula, ne xelu'ē le' chee nne' da li, bizr chee na' gulebezre xa'a benne' zan ca' chee le'. <sup>25</sup> Gate bexuzre buluchéaje' na' Pablo, chee xelu'ē le', Pablo guzre' tu benne' dxeaje' wedil-la zue' na':

—¿Naca chee le'e güele tu benne' nababe' Roma, ne quebe ne guchí'ale aja naca chee'?

<sup>26</sup> Gate ben benne' dxeaje' wedil-la da nigá, na' guxíaje' xeajezre' benne' dxenná be'e lu wedil-la:

—Guxúe xánniu' bi na' gunu', lawe' da nababa Roma benne' nigá.

<sup>27</sup> Nadxa benne' nigá gubigue' naga ze Pablo, na' bchebe' le':

—¿Da li na' nababu' Roma?

Pablo bechebe':

—Awe'.

<sup>28</sup> Na' benne' dxenná be'e lu wedil-la gunné':

—Neda' da zrente gudízruja' chee gubaba' Roma. Na' Pablo gunné':

—Neda' nabábaqueza' Roma gate gúlajtea'.

<sup>29</sup> Gate belenne' da nigá, na' benne' ca' ba zaj ze' xelu'ē Pablo belexecuase' cuita le', na' la gaze benne' na' dxenná be'e lu wedil-la, gate guque bé'enē' nababa Pablo Roma, bzrebe' lawe' da nuchéaje' le' du xia.

*Pablo dxezrine' lau benne' xu'u lawe' blau ca' chee judío ca'*

<sup>30</sup> Zra xula, benne' na' dxenná be'e lu wedil-la guca lazre' nézene' bi chee na' dxelagu zria judío ca' Pablo, na' bequé'ē du xia na' nadxéaj na' Pablo, na' gunná bé'enē' xelezraga benne' xíchaje ca' chee bxruze, ne xúgute benne' xu'u lawe' blau. Nadxa guléaje' Pablo, na' bze' le' lau benne' ca'.

## 23

<sup>1</sup> Pablo gunné'e benne' xu'u lawe' blau ca', na' guzre' le':

—Le'e, bi bicha', ca naca xúgute da ba bena' neda', zua zri xichaj lázrdawa' lau Dios.

<sup>2</sup> Nadxa Ananías, bxruze blau, gunná bé'ene' benne' zaj ze' na' xelegape' dxu'a Pablo. <sup>3</sup> Na' Pablo bechebe':

—Dios güe'e lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxixruj bea Dios. ¿Bizr chee na' dxunu' da dxedábaga da bdxixruje', dxenná be'enu' xelu'e neda'?

<sup>4</sup> Benne' ca' zaj zre'e na' gulé'e Pablo:

—¿Caní schanni' dxennáu' chee bxruze blau chee Dios?

<sup>5</sup> Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'e lázriu'.

<sup>6</sup> Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj nau'e fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

<sup>7</sup> Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutila ljwezre' dizra', na' gulaca chupa la'a ca naca benne' ca'. <sup>8</sup> Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz chee xabáa ca', ne quebe nu chilá'

bénne'du xu'u bēnneache, san benne' fariseo ca' dxelájle'e dxata' xúgute da ca'. <sup>9</sup> Xúgute' gulebezre xe'e, na' gulezé bal-la benne' dxuluxuzájle'e da nadxixruj bea na, benne' zaj naque' fariseo, na' gulenné':

—Benne' nigá quebe bi da calela ne guné'. Che nu bēnedu xu'u bēnneache, u tu gubáz chee xabáa ba gunné' le', quebe dxal-la' nñdxu chee Dios.

<sup>10</sup> Na' bulutíl-lalē'e ljwezre' dizra', na' benne' na' dxenná be'e lu wedil-la bzrebe' xelexe'le' Pablo xuluzúzruje' le'. Chee le' na' gunná bé'ene' benne' dxjaca wedil-la xelexebéaje' le' lávela benne' ca', ne xelexeché'e le' lu xu'u na' naga zaj zra' benne' dxjaque' wedil-la.

<sup>11</sup> Xela xula, Xránadxu ble'e lawe' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la'queze guchálaju' chia' lu xezre Roma.

### *Zaj nun benne' judío ca xelunē' xelútiē' Pablo*

<sup>12</sup> Zra xula bal-la benne' judío ca' belunē' tuze dizra' xelútiē' Pablo. Gulenné':

—Dios cu'e dxi'u de' che bi xi'aj gágudxu, ne quebe ne gútedxu Pablo.

<sup>13</sup> Nadé chua benne' biu ca' zaj nachebe lazre' xelunē' da nigá. <sup>14</sup> Benne' caní xjaque' lau benne' xíchajē ca' chee bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'e netu' de' che bi gáguntu', ne quebe ne gútentu' Pablo.

<sup>15</sup> Na'a, le'e, ne xezícadxa benne' xu'u lawe' blau ca' dxal-la' nábale benne' dxenná be'e lu wedil-la

xedajlegü\_e Pablo wxre zila laule le'e, xe\_bénnea' dxaca lãzrele guché\_be xánnele Pablo, na' netu' se cuásantu' gútentu' le' québela ne xide' nigá.

16 Zri'ine bi zan Pablo benbe' ca naca da nigá, na' guxíajbe' naga zua Pablo cheajézrebe' le'. 17 Nadxa Pablo gunné' tu benne' xu'u lu ne\_e benne' ca' dxjaque' wedil-la, na' guzre' le':

—Guché' bi cuide' nigá lau benne' xíchaj\_e chiu' lawe' da de da dxal-la' xebe' le'.

18 Na' benne' na' xu'u lu ne\_e benne' ca' dxjaque' wedil-la guché'\_e-be' lau xrané', na' guzre' le':

—Pablo, bénnea' nadxéaj\_e gunné' neda', na' gunabe' xedajgu'a bi cuide' nigá naga zu' lawe' da de da dxal-la' xebe' lue'.

19 Benne' xíchaj\_e na' guqué'\_e na' bi cuide' na', na' guché'\_e-be' chalá'ala, ne bchebe'-be':

—¿Bi dxaca lazru' xu'u neda'?

20 Na' gunná bi cuide' na', gúzrebe' le':

—Benne' judío ca' ba zaj nune' tuze dizra' xenabe' lue' che'u Pablo wxre zila lau benne' xu'u lawe' blau ca', xelenné' dxelaca lazre' xuluhebe xánnie' le'. 21 Quebe chéajle'u chee benne' ca' lawe' da nadé chua benne' ca' xelebeze' le' bagácheze, ne ba gulechebe lazre' lau Dios Le' cu\_e benne' ca' de' che bi xele'aj xelawe', ne quebe ne xelúti\_e Pablo. Na'a ba zaj zue' dxelebeze' xrtizru'.

22 Nadxa benne' xíchaj\_e na' bze' bi cuide' na' dizra', na' guzre'-be' quebe nu xebe' ba xeajézrebe' le' caní.

*Dxelesel-le' Pablo lau Félix, benne' xu'u lu ne\_e xezr la xu na'*



<sup>23</sup> Benne' xíchaję na' gunné' chupa benne' chee', benne' xu'u lu ne'e benne' ca' dxjaque' wedil-la, na' gunná bé'ene' le' xulucueze' chupa gaxúa benne' dxjaque' wedil-la, benne' sa'aca ni'e, ne ga xun chi benne' dxjaque' wedil-la, benne' xelebía bzrina', ne chupa gaxúa benne' dxjaque' wedil-la, benne' xelu'e xia tunna, chee chjaque' lu xezre Cesarea dxedá' ga chizrela. <sup>24</sup> La gázqueze gunná bé'ene' xulucueze' bzrina' cuía Pablo, ne gunná bé'ene' xeleché'e le' cháwedau' lau Félix, benne' xu'u lu ne'e xezr la xu na' waláz chee Roma. <sup>25</sup> Gusel-le' tu xiche da belúa benne' dxjaque' wedil-la. Caní naxúaj na:

<sup>26</sup> Neda' Claudio, dxugapa' lue' diuzre Félix, benne' xu'u lu na'u xezr la xu nigá. <sup>27</sup> Benne' judío ca' gulęl-le' benne' nigá ná'tega na'a chee xelútię' le'. Gate gunezda' neda' nababe' Roma, na' guxíajlena' benne' chia' ca', benne' dxjaque' wedil-la, xeajselá' le'. <sup>28</sup> Guca lazra' nezda' bi dxelagu zria le', na' guche'a le' lau benne' xu'u lawe' ca' chee judío ca'. <sup>29</sup> Na' gunezda' dxelagu zria le' da naca chee da nadxixruj bea chee judío ca', san quebe naca na chee xelútię' le', ne chee chu'e lizre xia. <sup>30</sup> Gate benda' ca ba zaj nun judío ca' chee xelútię' le', na' dxusel-la' le' naga zu', ne ba gucha' benne' ca' dxelagu zria le' waca xelawe' le' zria lau lue'. Gaca xrlátaje chiu'.

<sup>31</sup> Nadxa benne' dxjaque' wedil-la belune' ca gunná be'e benne' xíchaję chee', na' beleché'e Pablo chizrela, na' belezrine' xezre Antípatris. <sup>32</sup> Zra xula benne' dxjaca wedil-la, benne' ca' dxeledá' ní'aze, belexezrine' Jerusalén, na' benne'

dxjaque' wedil-la zaj zrie' bzrina' beleché'e Pablo naga dxal-la' zrine'. <sup>33</sup> Gate belezrine' xezre Cesarea, na' bulunézruje' benne' xu'u lu ne'e xezr la xu na' xiche na', ne buludé'e Pablo lu ne'e. <sup>34</sup> Ca bexuzre blabe' xiche na', na' benne' xu'u lu ne'e xezr la xu na' bchebe' ga benne' Pablo. Gate benne' naque' benne' chee xezre nababa Cilicia, <sup>35</sup> na' guzre' le':

—Guchi'a chee da dxaca chiu' gate xeledá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxú'e Pablo naga zua xu'u lawe' chee Herodes.

## 24

### *Pablo dxuzri'e dizra' da dxácale na le' lau Félix*

<sup>1</sup> Ca gudé gazxu' zra, Ananías, bxruze blau, bzrine' xezre Cesarea nen bal-la benne' gula sina ca', ne tu benne' dxenné' waláz chee benne' ca', le' Tértulo. Benne' caní belezrine' lau benne' xu'u lu ne'e xezr la xu na' chee xelagu zria Pablo. <sup>2</sup> Gate xeajlexrí'e Pablo, na' guzú lau Tértulo dxawe' xria Pablo, dxé'e Félix:

—Xcalenu' lue', benne' xu'u lu na'u xezr la xu nigá, lawe' da zúantu' xel-la' dxebeza zri lazre', na' da chawe' dxgua dxaca na cheentu', na' ca dxenná be'enu' netu' lu xel-la' sina chiu' dxexedxúaj na chawe'. <sup>3</sup> Xúgute da nigá dxezí'queze lu na'ntu' gáteteze na', ne dxentu' lue' xcalén cuinu', Félix. <sup>4</sup> Chee québedxa guntu' lue' zédete, dxata' xueda' lue' gun zren lazru' xennu' cheentu' tu chí'idau'. <sup>5</sup> Dxenná'antu' benne' nigá dxúnle'e da calela, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee benne'

ca' zaj da' tu benne' Nazaret. <sup>6</sup> Benne' nigá guca lazre' guzúe' chalá'ala xudau' cheentu', na' netu' gudél-lantu' le', ne guca lázrentu' guchí'antu' da naca chee' ca nadxixruj bea na cheentu'. <sup>7</sup> Na' Lisias, benne' dxenná be'e lu wedil-la, bequé'e le' lu na'ntu' xadía. <sup>8</sup> Na' gunné' che zaj zra benne' xelagu zrie' Le', dxal-la' xeelé'e lau lue'. Lue' gaca guchebu' benne' nigá, na' nézenu' naca da li zria dxáguntu' le'.

<sup>9</sup> Benne' judío ca' zaj zre'e na' gulenné' naca da li xúgute da ca'. <sup>10</sup> Nadxa benne' xu'u lu ne'e xezr la xu na' guchisa ne'e chee' guchalaj Pablo, na' gunná Pablo:

—Dxebéle'eda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca chee' xezr la xu cheentu' ba zeaj zane' iza. <sup>11</sup> Lué'queze waca chéajni'inu' ba zeaj chazrinnu zraze bla'a Jerusalén chee' güe lá'ana' Dios. <sup>12</sup> Quebe belelé'ene' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee' xezre na'. <sup>13</sup> Benne' caní quebe xelezéquene' xululé'ene' naca da li ca zaj naca da dxelawe' neda' zria. <sup>14</sup> Tu da dxexecheba', dxucá'ana szrena' Dios chee' xra xrtáudxu ca', dxuna' ca da dxelenná benne' caní naca na da wen lazre', lawe' da dxéajle'a xúgute da naxúaj na lu xiche chee' da nadxixruj bea na, ne chee' benne' ca' buluchálaje' waláz chee' Dios. <sup>15</sup> Neda' dxebeza lázrqueza' ca da gun Dios, ca dxebeza lazre' benne' caní, dxebeza lázrentu' Dios gusebane' benne' gate ca', benne' xrlátaje, ne benne' ca' dxelune' da calela. <sup>16</sup> Chee' le' na' dxue lazra' sua zri xichaj lázrdawa' lau Dios, ne lau

bénneache ca'.

17 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios. 18 Da nigá dxuna' neda' gate bal-la benne' judío chee xezre ca' zaj nababa Asia belexezrague' neda' lu xudau' ca' gudé bca'ana chawe' cuina' cáteze naca da zéajlentu', san quebe nu benne' bchaga', ne quebe nu benne' guché'ena' zraga. 19 Benne' caní dxalla' xelexé'e nigá chee xelawe' neda' zria che bi zua dxelaca chee' nen neda', 20 san che quebe bi de, na' benne' caní zaj zre'e nigá dxal-la' xelenné' che bi belezrélené' da dxebaga' gate zua' lau benne' xu'u lawe' blau ca' chee judío ca'. 21 Tuze da bena' gate zua' lau benne' ca', gunnéa' zizraj: Na'a dxuchi'ale chia' lawe' da dxejlí lazra' xelexebán benne' gate.

22 Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedilla, na' chéajni'idxeda' chee da nigá dxaca cheele.

23 Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelexegu'e Pablo lu xu'u lawe' na', na' xelu'e le' lataj bi guné', ne xelu'e lataj benne' ljwezre Pablo cheajlenné'e le', ne bi xelune' chee'.

24 Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzrin Pablo chee guchálajlene' le' ca naca xella' dxejlí lazre' chee' chee Jesucristo. 25 Gate Pablo bchálajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios

cheedxu gate cheajsé chee xezr la xu, na' bzebe Félix, ne guzre' Pablo:

—Bexíaj na'a. Gate nalátaja', na' nnéqueza' lue'.

<sup>26</sup> La gaze dxaca lazre' Félix gunezruj Pablo le' dumí chee gusané' le'. Chee le na' gunnéle'e Pablo chee guchálajlene' le'. <sup>27</sup> Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

## 25

### *Pablo dxexechebe' lau Festo*

<sup>1</sup> Nadxa Festo bzrine' xezre Cesarea chee si' lu ne'e gaque' benne' xu'u lu ne'e xezr la xu na', na' gate guca chunna zra, guxíaje' Jerusalén. <sup>2</sup> Lu xezre na' belezrín benne' xíchaje ca' chee bxruze ca', ne benne' judío blau ca' lau le', ne gulawe' zria Pablo. <sup>3</sup> Gulata' xuene' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelútié' Pablo la neza gate zezé'e na'. <sup>4</sup> Bechebe Festo ba xu'u Pablo lizre xia lu xezre Cesarea, na' léqueze' ba nune' chéaje' na' xetú chupa zra. <sup>5</sup> Na' guzre' benne' ca':

—Benne' ca' zaj zre'e lávela le'e, benne' zaj nape' xel-la' dxenná bea, dxal-la' chjácálene' neda' Cesarea, na' che benne' na' zua bi da calēla da bene', waca gágule le' zria.

<sup>6</sup> Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xeajlexrí'e Pablo.

<sup>7</sup> Gate bzin Pablo lau benne' xu'u lu ne'e xezr la

xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li. <sup>8</sup> Nadxa Pablo bechebe' waláz chee', gunné':

—Neda' quebe bi da calela ne guna', quegá chee da nadxiruj bea chee judío ca', ne quegá chee xudau' chee', ne quegá chee César.

<sup>9</sup> Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén chee guchi'a neda' ca naca chiu' na'?

<sup>10</sup> Pablo bechebe':

—Zua' lau xu'u lawe' da nuzúa César naga dxalla' zri'a ca naca chia'. Lue' nézqueznu' quebe bi da zrinnaj ne guna' chee benne' judío ca'. <sup>11</sup> Che ba bena' tu da zrinnaj da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudé'e neda' lu na' benne' ca'. Dxenaba' zri'a chia' lau César.

<sup>12</sup> Ca gudé bchálajlene' benne' dxuluzéajni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

*Pablo dxezrine' lau Agripa, benne' wenná bea*

<sup>13</sup> Ca gudé zane' zra Agripa, benne' wenná bea, ne bi zane' belezrine' Cesarea chee xulugape' Festo diuzre. <sup>14</sup> Gulezúe' na' tu chupa zra, na' Festo bzenne' Agripa, benne' wenná bea na' ca naca chee Pablo. Guzre' le':

—Zua tu benne' nigá, benne' bca'ana Félix lizre xia. <sup>15</sup> Gate guzúa' xezre Jerusalén, na' benne' xíchaje ca' chee bxruze ca', ne benne' gula sina ca'

chee judío ca' gulenné' chee benne' nigá, ne gulen-  
 abe' neda' chuga' chee' gatié'. <sup>16</sup> Neda' becheba'  
 benne' ca', gunnía' benne' xu'u lawe' chee Roma  
 quebe nu benne' dxelechugue' chee' gatié' che  
 quebe zrine' lau benne' ca' dxelawe' le' zria chee  
 xechebe' waláz chee'. <sup>17</sup> Chee le' na', gate belelá'  
 benne' ca' nigá, quebe guzreda', na' zra xula  
 gudxe'a lataj blau chia', ne gunná be'eda' bla'  
 benne' na'. <sup>18</sup> Benne' ca' gulawe' le' zria quebe bi  
 gulenné' chee' ca da gúqueda' neda'. <sup>19</sup> Laze láweze  
 da gulenné' chee' naca na ca naca da dxeléajle'e  
 chee Dios, ne chee tu benne' le' Jesús, benne' gute,  
 san dxenná Pablo naca bané'. <sup>20</sup> Quebe bezréleda'  
 ájala guna' chee da na', na' bcheba' Pablo che dxaca  
 lazre' chéajé' Jerusalén chee zri'a ca naca chee' na'.  
<sup>21</sup> Nadxa le' gunabe' zri'a chee' lau César Augusto,  
 na' gunná be'eda' xegá'ane' lizre xia cadxa séqueda'  
 sel-la' le' lau César.

<sup>22</sup> Nadxa gunná Agripa, dxé'e Festo:

—La gaze neda' dxaca lazra' xenda' chee benne'  
 nigá.

Na' bechebe Festo:

—Wxre xennu' chee'.

<sup>23</sup> Zra xula, gate belezrín Agripa, ne Berenice ga  
 na', belú'e lu dute xel-la' szren nen benne' dxenná  
 be'e lu wedil-la, ne benne' blau ca' chee xezre. Na'  
 Festo gunná bé'ene' xejlexrí'e Pablo, <sup>24</sup> na' gunné':

—Agripa, benne' wenná bea, ne le'e, nazrágale  
 nigá nen netu'. Nigá zua benne' na'. Benne'  
 zan, benne' judío zaj zre'e Jerusalén, ne benne'  
 zaj zre'e Cesarea nigá, gulenné' chee benne' nigá,  
 na' tu gulézqueze' neda' dxal-la' gatié'. <sup>25</sup> Neda'  
 dxéqueda' quebe bi bene' da gudé na le' gatié', san

léqueze' gunabe' zri'a chee' lau César. Chee le na' ba nuna' chee' sel-la' le' lau César. <sup>26</sup> Quebe bi de da guzúaja' chee Xrana' César ca naca chee benne' nigá. Chee le na' dxuzúa' benne' nigá laule le'e, ne da naca bláuqueze, dxuzúa' le' lau lue', wenná bea Agripa, chee guchebu' le' chee gata' late' da guzúaja' ca naca chee'. <sup>27</sup> Dxéqueda' quebe naca chawe' sel-la' tu benne' nadxéajé' du xia, ne quebe nnia' bi da zria nape'.

## 26

*Pablo dxexechebe' lau Agripa, benne' wenná bea*

<sup>1</sup> Nadxa gunná wenná bea Agripa, guzre' Pablo: —Waca xechebu'.

Na' Pablo guchisa ne'e, ne guzú lawe' dxuchálaje', dxenné':

<sup>2</sup> —Dxebéle'eda' dxunu' neda' lataj dxuchálaja' lau lue', wenná bea Agripa, chee xecheba' ca da gulenná benne' judío chia' neda', <sup>3</sup> ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljwézrentu'. Chee le na' dxenaba' lue' xennu' chia' duté xel-la' zren lazre' chiu'.

<sup>4</sup> 'Xúguté benne' judío ca' zaj nézene' ca bēna' lazria', ne lu xezre Jerusalén gate nácatea' bidau'te.

<sup>5</sup> Zaj nézqueze benne' ca', ne waca xelexechebe' che dxelaca lazre', ca nácatea' benne' cuide'te, naca' fariseo. Benne' fariseo ca' zjácalēdxē' ca naca chee da dxeléajle judío ca' chee Dios. <sup>6</sup> Na'a lawe' da dxebeza lazra' gusebán Dios benne' gate ca', ca guchebe lazre' chee xra xrtáuntu' ca', benne' ca' buluzúe' neda' lau xu'u lawe'. <sup>7</sup> Dxelebeza lazre'



chazrinnu cue' zri'ine zre sua Israel xeelé'ene' gaca ca naca da nigá guchebe lazre' Dios, na' chee le na' dxulucá'ana szrene' Dios, ne dxelune' zrin chee' te zra ne chizrela. Na'a, wenná bea Agripa, benne' judío ca' dxelawe' neda' zria lawe' da dxebeza lazra' ca naca da caníqueze da nachebe lazre' Dios. <sup>8</sup> ¿Quebe dxéajle'u gusebán Dios benne' gate ca'?

<sup>9</sup> Nédá'queza' nédxute gúqueda' da zan da dxalla' guna' chee benne' ca' dxeléajle'e chee Jesús, benne' Nazaret. <sup>10</sup> Caní bēna' lu xezre Jerusalén. Lu xel-la' dxenná bea chee benne' xíchajē ca' chee bxruze ca', benne' zan bzra'a lizre xia, benne' dxeléajle'e chee Jesús, na' gate belútiē' benne' ca' neda' bēnqueza' tuze benne' ca' belútiē' le'. <sup>11</sup> Zane' lásate bdea' benne' ca' ba xa' chee xulusane' xel-la' dxeleajlí lazre' chee'. Caní bēna' xúgutē lu xu'u ca' naga dxelezraga judío ca', na' lu xel-la' dxezra' chia' benne' ca', gudáu zi' xuzra' benne' ca' zaj zre'e lu xezre zitu' ca'.

<sup>12</sup> Chee guna' da nigá zexá'a xezre Damasco, zaj nasel-la' benne' xíchajē ca' chee bxruze ca' neda' nen xel-la' dxenná bea chee'. <sup>13</sup> Ca zexá'a xu'a neza na', du wagubizra ble'eda' tu xi' da za' xabáa da nácadxa ca' xel-la' dxenná' chee gubizra, na' gusení na' naga zexá'a neda' nen benne' zjácálene' neda'. <sup>14</sup> Nadxa xúgutentu' xeajcházentu' lu xu, na' benda' chi'i tu benne' gunné' dizra' hebreo, guzre' neda': “Saulo, Saulo, ¿bizr chee na' nau zi' xuzru' neda'? Lue'ze dxun zi' cuinu' ca' dxun bezre gate dxulíbeba' lawe' xágala da dxádue'-ba.” <sup>15</sup> Nadxa gunnéa': ¿Nuzra Lue', Xran? na' Xránadxu guzre' neda': “Neda' naca' Jesús, bēnea' nau zi' xuzru'.

16 Bexasa, guzé, lawe' da ble'e lawa' lue' chee gunu' zrin chia', ne chee xechebu' ca naca da ba blé'enu', ne ca naca da za le'enu' gate te na'a. 17 Guselá' lue' lu na' benne' judío ca', ne lu na' benne' zitu' ca' naga dxusel-la' lue' na'a. 18 Dxusel-la' lue' lau benne' ca' chee sálaju' xiaj lau benne' ca' chee xulusane' da naca chee da chul-la, na' xelune' da naca chee xel-la naxaní', ne chee xelexedxúaje' lu na' da xriwe', ne xelexú'e lu na' Dios, ne chee xeléajle'e chia' neda', na' xunite lau Dios ca naca dul-la chee', ne gaca chee' tu da xelape' lówela benne' ca' ba gucá'a Dios.”

19 'Ca' guca, wenná bea Agripa. Bzua' dizra' ca naca da ble'e Dios neda' da naca chee xabáa. 20 Nedxu bchálaja' dizra' chee Dios lau benne' zaj zre'e xezre Damasco, na' gudé na' lau benne' zaj zre'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelexebí'i lazre', ne xelexequa' chee Dios, na' xelune' da xelunna bea na ca da ba zaj naque'. 21 Chee le na' benne' judío ca' gulel-le' neda' lu xudau', ne gulaca lazre' xelútie' neda'. 22 Dios dxácalene' neda', na' ze chúchuqueza' lu zra na'a zra, dxuchálajlena' xúgute benne' ca naca chee Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaje' waláz chee Dios, ne da gunná Moisés dxal-la' gaca. 23 Gulenné' Cristo dxal-la' si' saque', na' ca te gatie' dxal-la' xebane' ládujla benne' gate nédxudxa ca xúgute benne' ca', na' gulenné' xelén benne' judío ca', ne benne' quebe zaj naque' judío ca naca chee xel-la' naxaní' chee Dios, da dxulé'e na le' ca gaca xeelé'.

*Pablo dxaca lazre' guzéajni'ine' Agripa gaque' benne' chee Cristo*

<sup>24</sup> Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

<sup>25</sup> Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajlędxu, ne da li. <sup>26</sup> Nigá zua wenná bea Agripa. Nézele'ene' ca naca chee da caní, na' chee le na' dxuchálaja' dutę xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca chee da quebe guca na bagácheze.

<sup>27</sup> ¿Dxéajle'u lue', wenná bea Agripa, ca naca da gulenná benne' ca' buluchálaje' waláz chee Dios? Nezda' dxéajle'u.

<sup>28</sup> Nadxa gunná Agripa:

—Xeláteze guzéajni'inu' neda' gaca' chee Cristo.

<sup>29</sup> Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute benne' dxellené' chia' na'a, xelaque' ca néda'queza', san quebe xeledxéaje' du xia.

<sup>30</sup> Ca gudé gunná Pablo da nigá, na' gulexasa wenná bea, ne benne' xu'u lu ne'e xezr la xu na' tu zren nen Berenice, ne xúgute benne' ca' zaj dxee' na'. <sup>31</sup> Belexedxúaje' cheeze' chee xuluchálajle ljwezre' ca naca chee da nigá. Na' gulenné', dxelé ljwezre':

—Benne' nigá quebe bi da calela ne guné' da gudé na le' gatie', ne quebe dxal-la' chu'e lizre xia.

<sup>32</sup> Na' gunná Agripa, guzre' Festo:

—Waca gusandxu benne' nigá chela quebe gun-  
abe' zri'a chee' lau César.

## 27

### *Dxelesel-le' Pablo lu xezre Roma*

<sup>1</sup> Gate ba zaj nune' xelesel-le' netu' lu xezr la xu Italia, na' Pablo, ne xezícala benne' ca' zaj zre'e lizre xia, buludé'e le' lu na' tu benne' dxenná bé'ene lu wedil-la le' Julio, benne' yu'u lu ne'e tu cue' benne' dxjaque' wedil-la nazí le na Benne' Chee Augusto Dxjaque' Wedil-la. <sup>2</sup> Na' guxú'untu' tu lu da dxedá lawe' nísadau' chee xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. <sup>3</sup> Zra xula bzrintu' xezre Sidón, naga Julio bēnle'e da chawe' chee Pablo, na' be'e le' lataj xeajnné'e bi bíchedxu ca' chee bi beluné' chee'. <sup>4</sup> Gate beza'ntu' xezre Sidón, na' gudentu' naga dxe' xezr la xu Chípře da naxechaj nísadau'. Blé'entu' na chalá'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. <sup>5</sup> Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licia.

<sup>6</sup> Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandría da zeaj na xezr la xu Italia, na' bzre'e netu' lawle chee zeajntu' Italia na'. <sup>7</sup> Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéchajntu' naga dxe' xezr la xu Creta da naxechaj nísadau'. <sup>8</sup> Stébele'e gudentu' chalá'ala

naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

<sup>9</sup> Záne'te zra bnítentu' xu'untu' da dxedá lawe' nísadau' na', na' ba naca stebe zéajntu' lu nísadau' na' lawe' da ba dxexú'udxu beu' zaga. Chee le na' bzéajni'i Pablo benne' ca'. <sup>10</sup> Dxenné':

—Le'e, benne', dxelé'eda' wácalē'e stebe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzrete cuía xidxu dxi'u.

<sup>11</sup> Benne' dxenná be'e lu wedil-la guxéajlēdxē' chee xrane da dxedá lawe' nísadau' na', ne chee benne' xu'u na lu ne'e, ca chee Pablo. <sup>12</sup> Na' lawe' da quebe naca lataj na' chawe' súadxu na' beu' zaga ca', na' xúgute' guléquene' nácadxa chawe' xezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chalá'a chee xezr la xu Creta naga dxebía gubizra, na' xegá'anadxu na' beu' zaga ca'.

### *Dxaca be' bdunu' lu nísadau'*

<sup>13</sup> Nadxa guzú lau dxaca lase be' da za' chalá'a naga dxedé gubizra beu' zaga, na' guléquene' waca chéajtezentu' lu nísadau', na' gudentu' gáguze lu xezr la xu Creta na'. <sup>14</sup> Nadxa chíteze guca guzú lau dxácalē'e be' bdunu' da za' chalá'a ga za' be' zaga. <sup>15</sup> Be' na' guzú lau dxuzriga na chalá'ala da dxedá lawe' nísadau' na', na' lawe' da québedxa guca chéajdxantu' naga za' be' na' ben na ba xen bentu' lataj bzriga na da dxedá lawe' nísadau' na'. <sup>16</sup> Na' gudentu' cúzrela tu xezr la xudau' naxečaj nísadau' da nazí le na Clauda, naga québedxa dxácatē na be' na' wal-la, na' stébele'e

gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. <sup>17</sup> Ca gudé bulucueñe' da dau' na', na' buludéē' du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétaje' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. <sup>18</sup> Zra xula, lawe' da ne dxácalēē' be' bdunu', gulezú lawe' dxeledxú'unē' xua ca' lu nísadau', da nua da dxedá lawe' nísadau' na'. <sup>19</sup> Zra guxunne' zra nen ná'quezentu' gudxú'unantu' lu nísadau' da dxuluchínene' cheē da dxedá lawe' nísadau' na'. <sup>20</sup> Zane' zra quebe blé'entu' gubizra ne belaj ca', ne ca naca be' bdunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

<sup>21</sup> Zane' zra gudentu' quebe náguntu', na' guzē Pablo láwela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xezr la xu Creta, ne quebe bi guque da dxedá lawe' nísadau' nigá, na' xua' da nua na quebe guzría xi'. <sup>22</sup> Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá. <sup>23</sup> Ba dxele ble'e lau tu gubáz cheē xabáa cheē Dios neda'. Naca' cheē Dios nigá ne dxuna' zrin cheē'. <sup>24</sup> Gubáz na' guzre' neda': “Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselé' lu xel-la' gute xúgute benne' zaj zra' nen lue' lu da dxedá lawe' nísadau' nigá.” <sup>25</sup> Cheē le na', benne', le gun dipa

lázrele, lawe' da dxuxrén lazra' Dios, ne nezda' waca ca gunná gubáz chee xabáa na' bchálajlęne' neda'. <sup>26</sup> Na'a dxun na ba xen cheajchaze da dxedá lawe' nísadau' nigá tu lu xęzr la xu da naxechaj nísadau'.

<sup>27</sup> Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxęla guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre. <sup>28</sup> Na' buludxixre' cátite situj dxe' nisa na', na' dxe' na galaj esa. Na' xetú chí'idau' gudé buludxixre' da xula, na' dxe' na chinu' ésaze. <sup>29</sup> Belezrebe' cheajtá da dxedá lawe' nísadau' na' xiaj, na' buluzalę' tapa xia da nácale'ę zi'i zran nisa zeaj zranla da dxedá lawe' nísadau' na', na' gulebeze' chaní' dudxuze dxelezrebe'. <sup>30</sup> Nadxa benne' ca' dxulusá da dxedá lawe' nísadau' na' gulęquenę' xelexedxúaje' lu da dxedá lawe' nísadau' na', na' gulezú lawe' dxululętaje' da dau' na' zria lawe' da zren na' dxedá lawe' nísadau', dxelunę' ca benne' xuluzáladxa xia da guxru na da dxedá lawe' nísadau' zren na' da zeaj laula na. <sup>31</sup> Pablo bzenne' benne' dxenná be'ę lu wedil-la, ne benne' dxjaque' wedil-la, dxennę':

—Che quebe xelegá'ana benne' caní lu da dxedá lawe' nísadau', quebe lale le'e.

<sup>32</sup> Nadxa benne' dxjaque' wedil-la gulechugue' du zri'a da nadxęaj da dau' na', na' belú'ę na lataj bexruj na lu nísadau'.

<sup>33</sup> Ca guxaní'sisę' bzęajni'i Pablo xúgutę benne' ca' dxal-la' xelawę' xeta, gunné':

—Ba zeaj chinu' zra quebe dxásele ne quebe dxágule. <sup>34</sup> Dxata' xueda' le'e gágule. Da nigá dxun na ba xen chee lale. Netudxu dxi'u quebe cuía xi' netú xicha xíchajdxu.

<sup>35</sup> Ca gunné' caní, Pablo guqué'e tu xeta xtila, na' guzre' Dios: “Xcalenu”, lau xúgute benne' ca'. Nadxa bzúzruje' na, na' guzú lawe' dxawe'. <sup>36</sup> Nadxa xúgute' belún dipa lazre', na' gulezú lau dxelawe'. <sup>37</sup> Cátite netu' zrantu' lu da dxedá lawe' nísadau' na' nácantu' chupa gaxúa ga xun chinu tuntu'. <sup>38</sup> Ca gudé gulawe' cátite guléljene', na' buluzale' zrua' xtila lu nísadau' chee bezrá' da dxedá lawe' nísadau' na'.

*Dxebía xi' da zren da dxedá lawe' nísadau'*

<sup>39</sup> Gate guxaní', benne' ca' dxulusá da dxedá lawe' nísadau' na' quebe belexúnbe'e xezr la xu na' da zua na le nna' naga zaj zre'e. Belelé'ene' naga dxexú'u nísadau' gachaj lówela xezr la xu na', na' dxu'e na' naca lache'. Na' gulaca lazre' xuluxudé'e da dxedá lawe' nísadau' laduj na'. <sup>40</sup> Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzechaj na da dxedá lawe' nísadau'. Nadxa gulechise' ladxe' da dxecá'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. <sup>41</sup> Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne québedxa gulezéquene' xuluté' na. Da zeaj zranla guzú lau dxuzruj na lawe' da dxeajéle'e xejxruza chee nísadau' na' zran da dxedá lawe' nísadau' na'.



<sup>42</sup> Benne' dxjaque' wedil-la gulaca lazre' xelútiē' benne' zaj nadxéaje' chee quebe xuluxuzrúnnuē' xelezrúe' lawe' nisa na'. <sup>43</sup> Benne' dxenná be'e lu wedil-la guca lazre' guselé' Pablo, na' quebe be'e lataj benne' dxjaque' wedil-la xelútiē' benne' ca'. Na' gunná bé'ene' benne' ca' dxelaque' dxelezrúe' nisa cheajlexexrítie' lu nisa na' chee xelexezrine' lu xu bizre. <sup>44</sup> Benne' ca' xezícala, bal-le' gulequē'e blaga', ne xebal-le' gulequē'e blaga' bizruj chee da dxedá lawe' nísadau' na', na' caní guca, xúgute' belexezrine' lu xu bizre.

## 28

### *Da ben Pablo lu xezr la xu na' nazí le na Malta*

<sup>1</sup> Ca gulá xúgutentu', na' gunézentu' xezr la xu na' da naxechaj nísadau' nazí le na Malta. <sup>2</sup> Benne' zaj zre'e na' belúnle'e netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gu-lenné' netu' cheajsentu' dxu'a xi' chee xezré'entu'. <sup>3</sup> Nadxa Pablo guquē'e tu xrunu zruze xaga, na' ca dxuzré'e na lu xi', bedxúaj tu bēla' da na' dx-u-zrúnnujba' lu da la na', na' gudagu xa'aba' na' Pablo. <sup>4</sup> Gate belelé'e benne' ca' zaj zre'e lu xezr la xu na', nal-la' bēla' na' na' Pablo, na' gulé ljwezre':

—Benne' nigá naque' wete benne' lawe' da lácala gulé' lu nísadau', quebe dxue lataj dios na' nazí'i le' Xrlátaje gaca ban le'.

<sup>5</sup> Pablo guzribe' bēla' na' lu xi', ne quebe bi gúquene'. <sup>6</sup> Xúgute' gulebeze' chee gata' xi' na' Pablo u che'e gatíe'. Ca gudé gulebeze' tu chí'i wal-la, ne belelé'ene' quebe bi gúquene', na' buluché'e

ca da dxeléquene', ne gulezú lawe' dxelenné' naca Pablo tu dios.

<sup>7</sup> Gágute naga zrantu' de xezr la xu chee benne' blau chee xezr la xu na', le' Publio. Benne' nigá guzí' lu ne'e netu', ne bxúele'e netu' cháwedau' lawe' chunna zra. <sup>8</sup> Xra Publio deze', quebe chawe' zue', na' xu'e da la, ne dxaque' xízrawe' dxen. Pablo guxíaje' xeajnné'e le', na' ca gudé bchálajlene' Dios, bze ne'e lawe' le', na' bexaque'. <sup>9</sup> Gate belenne' da nigá, na' benne' ca' xezícadxa, benne' we' ca' zaj zre'e xezr la xu na', belezrine' lau Pablo, na' belexaque'. <sup>10</sup> Gulápale'e netu' ba lál'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute da nachínnentu'.

### *Pablo dxezrine' xezre Roma*

<sup>11</sup> Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na na' dxácate naca beu' zaga ca'. Naca na tu da dxedá lawe' nísadau' chee xezre Alejandría, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux. <sup>12</sup> Bzrintu' dxu'a xezre Siracusa naga begá'anantu' chunna zra. <sup>13</sup> Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteoli. <sup>14</sup> Lu xezre na' bezrágantu' bal-la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma. <sup>15</sup> Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu

xézredau' nazí le na Xi'a Chee Apio, na' xebal-le' belexezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu", ne ben dipa lazre'. <sup>16</sup> Gate bzrintu' Roma, benne' dxenná be'e lu wedil-la bdee' benne' zaj nadxéaje' lu na' benne' xíchaje chee' bi xra'aga ca', san be'e lataj Pablo sue' cheeze' nen tu benne' dxéaje' wedil-la, benne' guxúe' le' chee' quebe xuzrúnnuje'.

*Pablo dxuchálaje' chee' Jesús lu xezre Roma*

<sup>17</sup> Ca gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale xra xrtáudxu ca', san benne' judío ca' zaj zre'e Jerusalén buludé' neda' lu na' benne' Roma ca'. <sup>18</sup> Gate benne' Roma zaj zre'e na' buluchebe' neda', gulaca lazre' xulusane' neda' lawe' da quebe belezrelne' bi da bena' da gun na xelechugue' chia' gatia'. <sup>19</sup> Judío ca' guledábage', na' ben na ba xen gunaba' neda' zri'a chia' lau César. Quebe nacan chee' gawa' zria benne' lázredxu. <sup>20</sup> Chee le' na' gunnéa' le'e chee le'eda' le'e, ne guchálajlena' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

<sup>21</sup> Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da calela dxenné' benu'. <sup>22</sup> Dxaca lázrentu' xénentu' ca da dxéquenu' lue' lawe' da

nézentu' gáteteze na' dxelenné' chee benne' ca' dxeléajle'e dizra' cube nigá.

<sup>23</sup> Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlene' benne' ca' ca naca xel-la' dxenná bea chee Dios che zílatela guxrínnelete. Bene' ba xuzre guzéajni'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. <sup>24</sup> Bal-le' gulezí'e xrtizra' Pablo, san xebal-le' quebe guléajle'e. <sup>25</sup> Quebe belune' tuze dizra', na' gulezú lawe' dxelixedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bénnea' bchalaje' waláz chee Dios, gunné':

<sup>26</sup> Guxíaj, xeajezre benne' ca':

Da li wenle le'e san quebe chéajni'ile.

Da li walé'ele, ne quebe gueque be'ele.

<sup>27</sup> Zaj naca zide' lázxdau benne' caní,

ne quebe dxelenne' chawe'.

Zaj naxezxuj xiaj lawe'

chee quebe xeelé'ene' nen xiaj lawe',

ne quebe xelénene' nen nague',

ne quebe xeléajni'ine' nen lázrdawe',

ne quebe xelexelé'e lawa' neda' chee xexuna' neda' le'.

<sup>28</sup> 'Dxal-la' nézele le'e, na'a ne da za za' xel-la' weselá chee Dios guchálajlentu' benne' quebe zaj naque' judío, na' benne' ca' xelezí'e na.

<sup>29</sup> Gate gunná Pablo da nigá, na' besía'aca judío ca', dxuluchébele'e ljwezre'.

<sup>30</sup> Pablo guzúe' chupa iza lu xu'u da dxízruje',  
ne dxezí' lu ne'e xúgute benne' dxedajlenné'e le'.  
<sup>31</sup> Du lazre' bchálaje' ca naca xel-la' dxenná bea  
chee Dios, ne bsédene' ca naca chee Xránadxu  
Jesucristo, na' netú quebe nu blale' le'.

**Xela wezria cube nen salmo ca’  
New Testament and Psalms in Zapotec, Tabaa  
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

**Copyright Information**

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament and Psalms**

in Zapotec, Tabaa

**© 1981, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

80626b72-93df-58ae-9f5e-9d86733fab46